

卷二目錄

墓志

太學生雲耀望墓志銘

太學生吳溥淵墓志銘

文林郎涂君墓志銘

鴻臚寺卿龔公墓志銘

武翼都尉楊公墓志銘

昭武都尉張公墓志銘

行述

勅封文林郎翰林院編修庠生顯考厚齋府君行述

祭文

祭江神文

目錄

壹

集 文 堂 心 筭

目錄

漢神廟落成祭文

祭宋芷灣前輩文

祭喻公輔觀察同年文

祭湊謙齋同年文

祭蔣礪堂相國文

威容臺洗馬同年哀詞

祭李安人文

祭某公文化

題跋

題手摹海忠介公詩翰卷

又跋

邢湄邱先生遺集後跋

王逸少曹娥碑跋

式

集 文 堂 心 筠

玉版本王子敬書洛神賦跋

唐李北海岳麓寺碑

唐歐陽信本書醴泉銘跋

歐陽信本溫虞公碑跋

唐虞伯施書夫子廟堂碑城武本跋

唐張司直書吳季子碑摹本跋

李北海端州石室記跋

跋所臨張長史耶官石記

跋所臨鼎帖數則

唐集右軍書興福寺碑

唐越國公鍾可大書十寶轉輪王經跋

元趙子昂書大方廣圓了義經序跋

元黃子久秋山圖跋

目錄

卷

筠心堂文集

目錄

明沈石田西嶽圖並自跋

元鮮于伯機自書水荒子詩卷跋

明黃忠端公題謝思忠畫詩跡跋

明董思白畫卷跋

又題草書卷

明陸子淵書跋

明文衡山詩畫冊

跋海忠介手札

陳氏兩孺人傳跋

跋茶亭記

萬文恪師藏諸公手札跋

離著

家訓

目

集 文 堂 心 箴

- 官箴
民則
勸孝
勸慈
勸友
勸恭
夫道
婦職
擇友
集益
崑山族叔像贊
按試鞏昌祈雨祝文
八分山龍神廟禱雨祝文在武昌

目錄

伍

集 文 堂 心 筠

目錄

鄭翁像贊

鄭母像贊

潘明經像贊

顯崔翁像贊

粘直齋贊

捐創張氏大宗祠啓

示鴈峯諸生

禱雨文

詩

古今體詩六十七首

對月

晚眺

感興

陸

李孝子歌

有序

聽何湘文侍御彈琴

詠史

立秋日登鎮海樓

辛未中秋前一夕朱東洲送予至涿郡家稽山茂才招飲其家既經宴

二子乘月送予出城黯然別去對月長歌用誌感懷

涿州早發

渡滹沱

懷秦小峴司寇師三首

平海紀事詩上百菊溪宮保前輩

平山堂

泛舟遊平山堂有懷

過江風作不得泊遠望金山用蘇東坡妙高臺韻

目錄

柒

集 文 堂 心 筠

目錄

二樂圖爲葉培根同年作

贈家雲巢明府二首

過庚嶺謁文獻公祠

峽山寺追次蘇韻

過庚嶺讀韓桂幹中丞詩有題

呈曾賓谷前輩

極樂寺

陰雨連旬寂居寡趣籬間偶得小竹植以瓷瓶望其長也走筆記此

盧綯堂水部夜間以水仙相惠走筆代柬

題文姬歸漢圖

題負米圖

題洪和圃小照

題家阜文先生秋雨賦後

集 文 堂 心 筠

初冬午睡夢中見坡公墨書因賦

坡公生日秦小峴師招同陸給諫言陳編修傳經秦州牧盧水部文錦

敬祀於尙友齋步小峴師韻二首

壽清泉太夫子

壽盧翁

圓勢嶺

挂勝山

香爐墩

大鼓坡

黑嶺

水壇井

獅子山

琴嶺

目錄

致

筠 心 堂 文 集

目錄

乙亥至都和莫衣堂姊丈紹惠喜晤之作

汪益齋同年銘壽喜晤有詩即步其韻

閩先君制後追念傷懷愴然有述

擬李太白東海有勇婦太白集注原曲關東有貞女

早遊寶月臺望七星巖

謁包孝肅祠

夜坐

題陸明府玉關生入圖

書伊呆齋狀後

伊節母狀書後

題畫鵝圖

夏雨

子明九弟航海至端州

拾

筠心堂文集

送子明歸瓊並示諸弟

閩江樓餞別聶心如

聞鬢兒娶婦

宋芝山招飲凌芝泉寓次芝泉韻

桃花庵希賢詩社圖

題珠湖漁隱圖

伏孤記爲宋齋堂刺史題

題宋芝山畫冊

題比玉女史遺冊

邗上送陳玉方侍御南歸

題家藥房前畫冊

又

梧齋琴韻圖步蔣丹林師韻

目錄

拾壹

集 文 堂 心 筭

目錄

題何湘文前輩羅浮面壁圖

牛痘詞贈邱浩川

題費新橋歡容泛海圖

壁嘉亭

題挂月峯圖

題伍青田聞香圖

題塵緣未了圖

萬安十八灘

中秋灘河夜泊

題翟閣齋賞菊圖

送汪益齋同年館講歸粵

邗上哭吳山尊前輩

題崧亭觀察春湖夜泛圖

拾式

集 文 堂 心 筠

題張仙槎寶泛槎圖即次其韻

寶雞旅館

山農歎

獲鹿晚眺

溫泉

牽夫謠

牽翁謠

牽兒謠

大散關

南天門鳳縣南山絕頂曰南天門

嘯邨圖爲黃刺史題

歸棹圖題贈吳蔗鄉大令

題畫白牡丹

目錄

拾陸

集 文 堂 心 箴

目錄

釣鼈圖爲李海颿觀察題

歐陽公生辰同人集吳蘭雪中翰寓齋次醉翁亭韻

挽吳巢松同年

題史忠正公手札後

樓桑邨

題乞食紅袖圖

皖江賑饑圖爲朱恣齋刺史作

又題攀轅圖

抱經草堂圖爲楊鑒泉同年題

靜軒給練小像

顧南雅學士爲陳望坡尙書畫滇南唐梅

題郭蘭石所藏谿山無盡圖

蔣耕青海天清瘴圖

拾錄

筠 心 堂 文 集

送譚石甫瑀佐牧酈州兼簡吳牧蔗孺

送王霞九侍御出守曹州

題姚笙華同年樟遠照

題唐敬楮同年鑑讀父書圖

雜誌

五丁峽歌

同州早春郊行

試竣示同州諸生

銀夏渡河

賀蘭山事夏城西

西涼除夕

永昌西風竟日

甘州校射

目錄

拾伍

筠 心 堂 文 集

目錄

拾陸

張掖郊行

肅州試院作

酒泉贈蓋星僕前輩

肅州竣事東行途次有作

春仲由肅州取道西寧復經甘涼故道至蘭州途閒得詩二十首

滄中使署鴻雪軒那繹堂尙書題額也賦此以贈

題獨絃吟詩彙後

雙烈篇

春波洗研圖爲除星谿都督題

尺五莊宴集次聶蓉峰前輩韻

曾賓谷前輩招同人李氏園看花爲卽席賦此

題顧瀕洲竹趣圖小影南雅前輩弟

夷詩密齋圖爲玉南陔中丞紹蘭作次朱文正公韻

集 文 堂 心 筠

題潘星齋紱廷昆季月底修簫圖

題張南山郡丞維屏黃梅拯溺圖

題沈飴原宮序郊君圖

題查九峰西陲轉饑圖

題譚康侯民部敬昭遠照

和黃霽青太守見懷原韻

哭兄

送家斗峰同年南歸

題劉柏鄰印譜

題朱海谷前輩垣棠陰膏雨圖

題竹溪試研圖

題丁筠浦授經圖

讀鄧簞山先生名宦錄題後

目錄

目錄

石門江行

連陽秋凱圖爲管椒軒都轉題

吳舜華孝子遺冊爲其孫杏舒墨客題

題湯雨生都督令慈楊太淑人吟斂圖

題富海駟中丞松陰補讀圖

十二月八日查賑泰州舟泊繁汝

賑撫江北由繁汝晚泊楊家莊贈玉竹樓大令並示同事諸君

張船山前輩畫冊楊子堅上舍鑄題

題陳碩士侍郎三百三十三亭圖

題陳芝楣方伯鑾棠芝圖

七月十六張家口渡黃河

四月于役黃梅出城口占

丙申夏周閱漢隄舟次蚌湖阻風

拾捌

筠 心 堂 文 集

夏至日蚌湖舟中喜雨

蚌湖卽事與潛江楊宰

漢神廟落成紀事

漢延熹華山碑拓本次朱竹君先生韻爲梁茵憐中丞題

梁芷鄰中丞過鄂同人集黃雀樓中丞有用壁間楊雪椒廉訪韻詩次

韻奉和

送梁芷林中丞撫粵西次程春海侍郎韻

蔣丹林師童子釣遊圖次韻奉題二首

郢中白雪亭懷古二首

春雲

喜晴

郊行

野望

目錄

心 堂 文 集

目錄

潛江勘閩隄工

天門舟中

題徐訪巖廉訪灑江話別圖

送丁興齋同年僕歸滇二首

皆大歡喜堂圖爲程春風廉訪銓題

題韓銅士通守維鏞江上蒼茫獨立時圖

觀我生圖爲羅茗香茂才士彬題

題朱容舫鄂渚望雲圖

題陳碩士侍郎韜光步竹圖遺照

花間補讀圖爲朱久香司成蘭題

送鄧雪帆同年應熊致仕歸里

倚竹看山圖爲于蓮亭前輩克襄題

題抱琴看鶴圖

式拾

集 文 堂 心 筠

戊戌長至閱視沌口入江水道議疏繪以分漢流舟膠淖中舍而登陸
用行到水窮處爲韻詩以紀事並示同行楊蔭南郡守周宜亭別駕

潛江閱河即事

涓口阻風

沌口舟中

沙湖晚泊

袁口登陸

竹根灘有感

排沙渡潛江城數里沙厚成陸

潛江曉發

多寶灣

彭市晚泊

賦

目錄

式登

集 文 堂 心 筓

目錄

葦猗亭賦有序

春霖賦有序

菊屏山賦有序

擬潘岳射雉賦以題爲韻

敬勝怠賦以莊敬日強至誠無息爲韻

竹鞭賦以雨傾沙岸竹垂鞭爲韻

調水符賦以題爲韻

石攻玉賦賦以他山之石可以攻玉韻爲

綱舉網疏以去弊拯民必存簡恕爲韻

摺疊扇賦以金石絲竹匏土草木爲韻

訓士錄

刊印告誠

訓士子立志

貳貳

筠 心 堂 文 集

訓飭學業

釐正文體

運河北行記

公牘偶存

安撫資送災民勿令遠涉苗疆滋事議

飭行各屬札

籌議留養貧民詳文

留養章程

飭各屬留養貧民札

浙江飭正民風札

上閩浙總督

目錄

式卷

集 文 堂 心 笈

目 録

三 肆

筠心堂文集卷二

墓志

瓊州張岳崧子駿著

太學生雲耀望墓志銘

君諱于焜字耀望瓊州文昌人先世繇陝西官瓊因家焉父諱表增廣生父以上皆以詩書醇懋世其家子二長于焜次即君也君幼孤穎晤嗜學爲文章有家法然卒困童子試援例入成均爲人慷慨尙義始祖及其本支祖祠再任勞費克臧厥事歲饑周其里人助鄉興學不吝貲有洋船傷颶奔命者聞君誼敞門望救君詢明多方拯濟存活甚衆船貨不染指予往聞邑人瀕海居者洋番巨艦猝遇颶擊石齧浮沈飄泊貨賄狼籍不得顧里惡因以爲利剽奪攘竊視舟人呼號喘息莫之救幸有援手者卒傾其貲哀丐流離無所告語夫乘人之危而利其有予甚憫焉若君者可以風矣君氣度安雅喜任郵訓子弟不苟生平好直言無所避然

樂聞過故恒忤人而卒鮮非之者今之古人也君生於乾隆某年月日卒於嘉慶某年月日葬文昌藍田山之原子一崇正庠生女四皆適江鄉銘曰

踈跂匪善芻狗安利靈辭弗恣侃而弗憚噓和歛春而不凋賴予銘茲藏著來嗣

太學生吳溥淵墓志銘

嘉慶己未太學生吳君卒越七年而葬又廿年君嗣懋清懋基屬余補志君墓余同里且與君嗣交不獲辭乃志之按狀君姓吳諱光禮字德謙別字溥淵太學生高州吳川縣人先世由江南遷廣州再遷吳川祖式鄒父邦柱以耕讀世其家君生六歲而孤母李氏撫之每輒轉膝下詢父狀母垂泣君輒淚泫泫不自勝見者惻然稍長聰慧者學然家故窳具兄光周銳志於學君方弱冠遠白母不欲以貧累兄學願司會計母不得已許之家稍裕母旋歿哀毀甚顛髮盡脫君才三十耳營窳窳誠信竭力遇忌泣恆竟日凡母族待之厚終身不衰先是君兄以弟子員赴試穗城歸中溼患黃疸甚劇君昕夕侍湯藥每不寐達旦憂悸無措忽狂喜走

篤 心 堂 文 集

白母曰兒遠已白矣因顧母笑母恚曰兒誤矣兒兄道證黃耳兒何眩惑耶兄旋愈既而病足侍疾亦如之兄子患瘰癧侵藥調治罔惜費推家業所有多與兄及兄子無泣然曰吾恨不逮事父母亦旋歿今視兄且父若也爲人恭敬和厚族中無老稚咸愛憚之子弟能樹立者獎進不遺餘力凡周濟事必爲倡息爭崇讓族中數十年少訟牘咸以爲君力喜讀書垂老不倦課子嚴而有法每覽古今人善言善行愾慕如不及族中號淺溪者於君爲叔行君師之比君歿邑人高其義採事蹟入邑志誌行傳殆與淺溪比云君生於雍正甲寅年八月廿三日以嘉慶己未年十一月廿三日卒春秋六十有六配某氏子二懋清嘉慶丁卯副榜庚午舉人懋基癸酉舉人大挑二等候補教職孫東翰東相東彪東章東暘東蟾懋清等葬君於茂名縣章解嶺之原銘曰

鮮民爲孺泣呱呱晷晷弗瘳予懷懷篤行式閭衆所翕嚙惡在乘垂不渝昌後森森羅明珠華表千葉鐫瑤瑜

文林郎涂君墓志銘

乾隆戊戌正月八日涂君淳波卒越十年厥嗣配五舉孝廉授雲南呈貢令嘉慶
己巳

覃恩贈君文林郎如其官又十年配五以母劉孺人憂服闋需次都中泣諭予曰
配五幼承先君訓嚴且勤易簪猶以勉學承先志爲教今先君久卽世祿不逮養
又宦途鞅掌銘幽之事恐就闕如願有請也予以同里誼弗獲辭按狀君諱達賜
以字行淳波其號也先世諱璉者由豫章卜居粵之番禺因號禺山明成化丁未
以第二人及第文行詳粵志文苑璉弟璉是歲同捷南宮嗣是以詩書世其家父
馳贈文林郎樂明公遷惠州羅浮山麓居焉生君兄緝古及君君童時嗜學卷不
釋手中歲蹟名場遂隱居課兒咿粲自娛宴如也篤於天性以失怙恃每諱日必
祭祭恒泣盡哀與兄同居友恭無閒言有田姜風性和而直嘉賓客又居名勝歲
時腴臘設酒食餽里鄰戚友坐恒滿必款洽周摯盡歡怡然多以詩言莊論屈其

座人蓋醇恪老成推重里閭故不僅以言詞著先是乾隆癸巳霖雨潦盛溝塍
沖畷田禾漂沒屋宇半震隨流而圯里人苦之君竭力貸郵多所存活所貸不立
券受者固請卒不聽幼妹適人媼且窶君濟之厚歲不輟俾全其節數施構斂骸
窶之生平慷慨尙義多類此然家止中人賞而致孜然無恠容無德色君子以爲
好行其德豈在富哉故尤以爲難君生於某年月日享壽六十子二長配膏候選
庫大使次配五乾隆戊申科舉人雲南呈貢縣知縣直隸獲鹿縣縣知縣孫七人
曾孫十人元孫二人配膏等葬君於增城蓮塘崗之原銘曰

善無方我所獲義無恆天所臧轉者常郵者媼扶允調歎息彼霑雩以韜益光襲
善休祥鬱蔥佳哉蓮之崗我銘斯藏啓永昌

鴻臚寺卿龔公墓志銘

道光十有五年八月二十三日予年友鴻臚寺卿龔君卒於官越明年其孤淪扶
喪歸葬以遺命遣人走武昌乞予銘幽予與君鄉會試皆同年且同詞館莫逆也

筠 心 堂 文 集

敬辭不文君諱鐘號聲甫其先西江人宋南渡始遷江蘇陽湖縣之賢德里曾祖
守一祖朝棟父詒安皆以君貴 封贈如其官母陸氏與大母皆 封太夫
人封翁有子二長日鈺君其仲也君幼慧五齡父口授史夜就寢輒爲母道姓氏
人咸異之性孝友耆學稍長與兄下雌攻苦爲文操管立就泉湧風發才力英邁
年二十三捷嘉慶甲子順天鄉試己已成進士皆魁其曹改翰林院庶吉士辛未
散館授職編修充文穎館纂修官一時木天撰著之篇玉堂
進御之作清妍博麗名喚藝林丙子轉山東道監察御史丁丑充會試同考官得
士最盛戊寅

仁宗皇帝下詔東巡盛京祇謁

祖陵廷臣以 蹕路遠涉請止

上孝思篤摯

嚴旨切責衆懼莫敢言會四月八日京師晝晦君齋沐繕封

事同列疑君有所陳或沮君曰子親老恐不測君不答駕車赴 掖園瀝行目其

僕曰我明午不歸寓若當西望視我耳詰朝啓 奏奉 旨畱中無所問

篤 心 堂 文 集

君之愚忠

上實鑒之八月充順天鄉試考官已卯充河南鄉試正考官劉公斯帽副焉其
年大霖雨河決馬營壩驛路淹沒君冒雨疾馳泥淖千餘里抵黃河口洪濤際天
不辨兩岸往來阻絕不得渡敗艇繫樹杪公亟呼檣楫舟子踞止之君大言於副
使曰此王事也豈以險辭且試士盈萬吾不渡必且改期爲寒士累遂促渡中流
溜急如箭舟簸側將覆從人股栗公神色自若甫及岸艇隨流漂散人以爲神且
服君膽識也庚辰乞假省親母病瘵甚劇君禱於城隍願減己算夜夢仙醫病尋
愈以父嚴促不得已出山遷刑科給事中旋聞父訃哀毀不自勝歸里營葬族衆
許耐祖塋君捐錢三十萬爲祖塋增祭田將治兆族有發父塚爭葬者且訟君君
卒棄其地所捐錢亦弗問也物議譴之乙酉服闋授順天府丞復以母喪哭踊聞
關羸瘠骨立辛卯彊起補原官尋調奉天府丞兼學政公正廉明士論翕服癸巳
擢太僕寺卿還京甲午授內閣學士兼禮部侍郎與侍郎桂公齡爲順天武鄉試
主考因取中與外場監射不符奉 旨鐫四級降補鴻臚寺卿君心地坦平語

人曰凡人行已立身求無愧吾心即以對君耳君體清臞任奉天苦寒患瘧愈後益羸至此患痺艱轉側醫療罔效竟不起春秋五十有四嗚呼哀哉君砥行勵學風骨峻邁忠誠懇見詞氣閒居處用御樸甚寒素京職廿餘年留眷屬家居侍養而孤榻僧寮蕭然閔寂日以讀書窮理研求經濟爲事國家需才君將建豎惜乎不竟其用爲可傷也元配周夫人繼配盛夫人張夫人皆先君卒子一淦女一適郝銘曰

有隆氣矜厥義焉配有焯菁華厥道焉載或瘖於仗或鳴於崗一士謬誇 九重所藏岵岵江鄉風雨禪屋孝于惟孝因心則篤崇崖峙峻寒潭鏡清國楨時棟胡蚤頽傾宰樹蕭蕭佳城呦呦精靈選還千秋不朽

武翼都尉楊公墓志銘

公楊姓諱登魁字象文號步雲先世秦之華陰人曾祖廷義康熙中由武進士任蜀爲冕寧衛後置縣改治城邑修築著勞績比致仕遂家焉父柏茂官千總子四

筠 心 堂 文 集

公其長也年十五丁父憂善事母及撫諸季負薪易米以養人以爲難乾隆四十年由行伍投効軍臺戍防十餘載授建昌外委隨征廓爾喀等處復督運軍火事平擺會川把總海拔建武千總時黔楚苗亂公隨川督由黔東進攻連破各峒嘉慶元年攻克乾州計在黔從征凡三年復隨征蜀匪又逼賊入楚至馬鞍山等處屢得勝以功授四川順慶守備嘉慶三年以後大師剿賊秦蜀間公必從轉戰千里多所擒獲巨酋如冷天祿羅其清冉爲偉高坤得等以次殲虜公咸有力焉

旨授四川瀘州都司旋攻秦山陽商州手刃賊十餘人生獲高二陳天壽等授直隸正定鎮游擊又征平利之盤龍山得功

賞戴花翎調補重慶營游擊軍政薦卓異十四年以累次辦軍需度支懇轎免官旋有

旨開復補授四川提標浙擊屢權副將復署會鹽游擊計前後三十餘年大小百餘戰積勞成疾遂不起以嘉慶庚辰年三月十五日辰時卒會鹽官署距生於乾隆庚辰年四月初二日申時年六十有一公勇銳無前而待士卒有恩初任重慶

嘗以演武場官地歲租二千餘金歸士卒永爲例蓋前任皆以羨餘自肥者公免官士卒皆涕泣樹石應頌公德事在嘉慶二十年公之施惠逮下如此於乎賢矣公元配賈繼配南皆無子以其三弟之子超任爲嗣超任道光二年副榜就職州判入賞爲布政司經歷八年從辦西陲善後事宜得功議敘州牧選授雲南寧州知州超任葬公冕寧祖塋乞余銘幽乃爲銘曰
關西之陽厥裔克昌我公洸洸義勇莫當楚蜀鷓鴣張是保是障百戰趨殲殄掃攬槍公實子良黷困挾創位不副望身沒名章余銘其藏奕葉詒芳

昭武都尉張公墓志銘

嗚呼和亭與余交廿餘年齒相若居同里又同宗也昔嘉慶壬申余以漏修假歸始識君時君官雷瓊鎮中營千總又七年余被議歸羊城君以守備權肇慶遊擊復晤君道光丁亥君以都司引見又晤君京邸歲已亥余遭繼母喪歸里則君歿七年矣其孫恕以余交君久迺具行狀乞銘君墓余不獲辭案狀君姓張氏

筠 心 堂 文 集

諱必寬字景制號和亭瓊之儋州人也先世由江右仕閩自閩遷儋因籍焉祖諱鳳翱庠生父諱濟明性豪邁任俠好濟人急里鄰稱長者均贈如君官祖母嚴氏紀氏母王氏並贈恭人君生而英俊內行純篤有器識嘗拾白鏹於途以歸遺者君故饗衆服其介云貌魁岸膂力過人善騎射以父命棄儒入伍不數年洊遷千總時洋盜猖獗大府檄君數隨勦捕君身先士卒屢立戰功又出奇計禽獲盜首海甸九及其黨多名奏聞奉

旨交兵部以頭等軍功優敘歷任永靖徐聞守備護理肇慶城守副將道光八年引 見奉

旨許預保以遊擊題補署理連陽營遊擊旋署督標後營參將又委瓊州鎮右營都司竟以勞勩卒於官君服官三十餘年歷十有餘任一以潔已奉公整飭訓練爲務性敦樸無它好居恆無疾言厲色未嘗酷待一卒枉受一錢每去任兵民攀送感頌如出一口復喜濟急卒之日一無餘蓄人以爲賢嗜書史昔在京邸諄屬余爲購書多種叩之則曰將以自娛且課孫耳君生乾隆辛卯年正月廿日以道

光癸巳年七月廿一日卒春秋六十有三子達先君卒孫恕廩生以某年月葬君於某山之原銘曰

武不怕死文不愛錢武穆有論未揆厥全文武殊途本廉則一誰謂將帥而肆貪悖每覆軍書半皆空籍供帳送箕斂如額季廩月縉先期羅爬餽口無資遑問室家脂膏幾何堪茲浚剝執司園外貪墨召鹽耿耿我君棄命揮鋤洗洗我君仗劍禽渠秉茲介節冀建殊勳厥用不竟時命則然蔚彼松楸永此後嗣我銘茲藏以風有位

行述

勅封文林郎翰林院編修庠生顯考厚齋府君

行述

嗚呼不孝等獲戾蒼穹，既降云階，延及府君，溘然見背，痛哉！既不能色養承歡，俾府君久事庭除之樂，不孝之罪大矣。嗚呼！尙忍言哉！尙何言哉！獨是府君畢生醇樸嘉言，篤行闔里，所共式族鄰，所周知。敢就遺忘，以重厥咎。敬濡淚述梗槩，用備悉覽焉。

府君姓張氏，諱某，偉字杰，人一字厚齋，瓊州定安人也。先世繇閩，令瓊山，因家焉。由瓊之東岸遷定安高林里者，自先祖諱宏範公暨府君始。其始來遷也，府君甫及成童，步行隨先祖。比至足跟踏，不能立，益以風瘴苦癢，經年當是時，國家承平數十年矣，而瓊地僻，稀土未盡墾定。高林距郡百里許，山谷峻，僧林鬱鬱，熊羆之所居，豺獍之所嗥，盜賊嘯聚，瘴癘間作。至者恒懷慄而府

集 文 堂 心 箴

行述

一四

君幼穉獨能助 先祖闢草披荆相度寧宇以有今日人以爲難 府君幼嗜學沈潛善悟兼齊力絕人善騎射矜弓數鈞以所居多荆棘厭伏爲難確試弓馬竟於吳提學案補武庠然 府君手不釋卷書尤遒勁每論文一宗理法面治筆尤其要義曉暢空靈獨出機軸時屬文自課屢爲琼山吳明經國卿楊茂才必權諸公所賞識者咸謂 府君倫文武經濟才矣方 府君壯盛讀書譚藝志存用世既先祖年邁先叔祖蚤逝遺一叔孤露並與 府君同胞叔凡八人姑二人皆幼 府君上事 祖父母下撫諸季屏富家務及爲諸叔教讀婚冠應試遊庠所費不貲卒力助艱難俾有成立 先祖性嚴毅獨 府君偕 先妣周孺人朝夕恪奉克得歡心迨其丁 先祖艱也哀毀如禮遵遺命祔葬先高祖塋右值官事誣罔 府君於瓊澄二令申雪而澄邑尤數十往返將屆一載事獲直蓋至是艱鉅紛投始絕意進取矣 府君中年得足疾伏枕三年旋讀岐黃書針灸並下獲無虞訓不孝等皆口授經書並手錄左傳及諸家古文爲講解大義膏漏數下不休迨就傳值假歸必面究學業評剖課藝無少姑息又訪延名師脩脯供給必豐備

篤 心 堂 文 集

每備 先妣周宜人節衣縮食手口拮据至於家道中落而不悔嗚呼 府君之
用心可謂勞且孳矣無何先祖妣李太孺人謝世 府君靈哀禮如喪 先祖時
及營葬 府君行年六旬矣猶復研鑽地理家秘鑰晝夜無倦容索隱探微默契
元要已乃跋履山川摩銅鼓跨九指窮黎母七星之詭異北眺大海震蕩心目冷
雨淒風備嘗勞動不孝每以 府君素患足恐妨步履而 府君精誠所至每忘
疲困其竭誠盡憤求安先人者如此歲丁未不孝兄弟於關提學歲案同入泮
府君益加策勵乙卯葬先祖妣李孺人而祔以 先妣周孺人先叔妣林孺人又
先二叔八叔皆早世俱 府君躬爲卜地不孝 岳崧以甲子舉於鄉時 府君年
七十有三矣當計偕北上諭之曰吾年雖暮而精力尙健汝勉之績學勵志毋予
毫是念岳崧泣受命乙丑戊辰再試春官皆報罷念場屋屢蹶 親老家寒惶懼
謀歸 府君志益堅郵書止行 府君嘗以形家言謂吾家宜有發甲者及己巳
不孝岳崧以第三人及第入詞垣僉服 府君先見之神而積善種德之報尤不
爽也不孝雖倖獲一官藉慰高堂而海北天南不能迎養亟圖歸省 府君復以

行述

散館期近弗許辛未始克請假南旋壬申至舍 府君年八十矣京師師友贈詩
文介壽者盈篋笥親故畢集見 府君神明矍鑠威榮為不孝等竊意 府君
既喜父子團聚含飴弄孫將優游桑榆坐享期頤矣詎自壬申夏步履漸形困憊
語言少倦飲食稍減然幸無他恙癸酉元日猶扶杖中堂不孝等率二孫羅拜正
月二十日不孝岳崧祭於祖祠越二日歸 府君詢問甚悉扶杖行立就寢如常
夜三鼓忽聞呻吟不孝等急起扶持乃有便秘之患服藥不效廿四日夜益劇元
氣漸頹更服補劑患稍差而精神益耗散連進葠朮終不取驗延至廿九日丑時
見背嗚呼痛哉 府君學生勞瘁性復厭逸而不孝等未盡孝養之忱益增倚閭
之傷至於愛日有懷而悲生風木罔極之痛何時已耶嗚呼痛哉 府君無他腸
無輕諾端簡坦易不喜作戲謔語傲岸語雖與愚賤暴戾者遇卒婉言莊論以正
相規解紛息爭鄉里推服又恬澹自守無一介非分之取無一念自私之見至於
親黨賙通兄弟財產推分愷切人無間言蓋其天性醇篤一往直摯如此 府君
生雍正十年十一月廿四日子時終嘉慶十八年正月廿九日丑時壽八十有二

筠心堂文集

歲配 先妣周孺人先 府君卒繼母氏梁子二不孝岳元 邑庠生娶瓊山岑氏
次不孝岳崧翰林院編修娶瓊山梁氏女三長適梁次適李俱 先妣周孺人出
三適黃繼母梁氏出孫二長 錦不孝岳元出次繼小孝岳崧出女孫一岳崧出

祭文

祭江神文

祭文

一八

維神尊四瀆之長騰九迴之淵稟元氣於靈和壯嶮介於華裔一昨洪流浩淼難安鴻鴈之居繡壤迷漫欲化蛟鼉之窟陳祈靈應貺答響臻斂八風以不翔極千里而播潤遂使楚江練淨稻稈登玉粒之豐周道砥平竹箠時金隄之登澹懷襄而作乂地可由行起饑溺以安全生同再造仰威靈之所庇崇廟貌以維新不日落成望觚稜而煥若瞻雲有恤肅旒袞之儼然用薦香敬揔誠縻庶幾東流軌順永昭報於靈長南紀瀾安奠黔黎於衽席乃爲迎神之歌曰揚桂旗兮旂旒垂蘭佩兮葳蕤風馬翔兮雲輿馳童高陪兮龍馭蹀躞喧歌鼓兮吹參差黍稷馨兮神所詒肥腍備兮神所滋靈之來兮迤邐慰我忙兮毋我遐思又爲送神之歌曰桂殿兮芝房燦輪兮神之堂几筵升降兮旒黠光靈所憑兮吉而康普大矣兮荆襄春無驚濤兮秋瀾無狂蟹稻豐兮蛟鱷藏永歆假兮椒祕香千秋萬歲兮物

旱時昌

漢神廟落成祭文

竊以蟠冢導漾歷秦地而源長漢水爲池鎮楚疆而險設滔滔南紀朝宗並於江流浩浩東奔統漚歸於大別是以雅歌俾彼章天者共仰瞻雲廣詠方思行地者咸稱樂土自馮夷之爲崇致神禹之無功合全楚而昏墊頽咨過三澨而懷襄尤劇自昔岷源西溯早隆廟祀之文即今滄浪東流未紀浮沈之典民旣虞夫蕩析靈或失所憑依某等恭膺守土敢忘民依爰諏吉以鳩工俾棲神而燕處幸丕基之式廓不日經營慶大廈之長支千年俎豆維新廟貌崇殿宇以巍峨式安神居肅冕旒之瞻眎從此闕宮有恤明德維馨風馬雲車永靜蛟龍之氣壘梁鰲柱攸安鴻雁之居神奉天以頌民人資生而報德凜茲昭假永薦馨香謹告

祭宋芷灣前輩文

嗚呼雲黯籐陰月寒楓樹乍鳴驪歌旋傳鵬賦維公德宇大谷曉峰高梧曳漢喬

祭文

松歎風少負不羈豪情俠骨英英翔雲亭亭朗月發爲文辭古心硬語明宜在天
崇朝雷雨或澹于水亦寒如冰鼎俎纂縉恆莫之勝篋槍投醅吐吞頰洞仙才鬼
筆作爲斯弄公晚而達爰領桂宮看花蓬壺霓唱翔空著作承明飛瀉齋馥披蕭
穫蘭鋒車巴蜀賢二千石于滇之南士鼓叱歌懼呼趨趨迺長迺迺予子予季在
阿者莪棲畝有穗維緬之陲土酋芽蘖梟獍豢螫敢肆咆哮吏卒驕黷載恬載嬉
誅求殺越弗謀弗咨公奮老謀傾資募士臥揮露布坐縛虺虺渠魁受馘邊叱載
安酣食飽睡來遑鑿嫺公之才識足雄千夫官吏愧赧氏曰公蘇老守華頭遷巡
楚北大材晚施衆罔不盡嗚呼哀哉淒清一櫓落拓半生有不朽者鼎鼎其名公
詩若文匪脛而走醉墨小箋入寶瓊琇高懷獎善怒爲饑渴矧我紛楡多公激發
見公春秋一別千古琴劍蒼涼腹痛心瘳嗚呼哀哉江漢東流粵雲南望桑梓同
愴薦茲一慟

祭喻公輔觀察同年文

嗚呼蓮社香淒柏臺雲黯嶺海天長楚江波慘嗚呼哀哉往時識君英英人豪大

羅曠朗霓裳曲高奏賦明光千言翻水蓬壺三山去天尺咫既陟諫垣嘉猷入告
鳴鳳天聞騎驄路肅雷瓊海瑞一島波中

天子命君衣繡觀風維瓊荒爲吏飽而驕維瓊凋邈叱瘠以梏君既戾止翬翬罔
懈淫雨壅烟風融日曬頑鼠爰去飛鸞懷音哺餼是月啓牖是日祁祁髦秀載烝
其良翹翹公車言峙其糗高涼端州于役輾轉部民眊君謂君過返胡不愆遺喪
君何速二豎兆祲百身奚贖嗚呼哀哉君誕華宗炳靈江漢堂構崔巍棣華璀璨
韋平世學軾轍家聲治譜作述實詒令名君齒未暮弗克展布君體夙彊濫先朝
露高堂辛酸哲兄永歎君胡歛舉天路漫汗令子星奔逐君自粵佇望成立嗣君
門闕舊雨淒迷晨星零落蓋簪歛歛九原難作山長水遠聊將挽詞靈其返鑿
一卮

祭湊謙齋同年文

嗚呼寒蘿卷風秋槿團露歲識地凶噩占鵲賦嗚呼哀哉維君毓粹皖水華宗劇

山靈氣靈秀焉鍾紹純英奇鳳觀虎視符采瑤瑤聲垂筍縠慈竹蚤摧喬椿垂蔭
翠羽承歡靡靡志順家世載懋任卹勤周維君繼述是備是闕君負英才甄極文
史茗發穎豎鴻鸞鳴舉文壇嘆咄搖珮振琚泮鋒砥錫步光錕鏘選在困敦借君
堯榜霓裳放歌大羅曠朗越載春官射策上第鸞羽初翔驥足爰試畿輔需能望
緊擇宰

天子命君其若予采題令南樂量移津門深州作牧化侖春溫攢守黔中優優
是布振尼卹艱德音載路我井我疆載溶載修我子我弟用威用休折獄惟良
勤卹輿隱治譜成編式昭令聞比時封翁八旬鬢饒就養黔陽翩然化鶴君性
淳摯絕粒哀桐麻衣遠道泣血僵風淒淒荒原筑菴廬墓風樹驚心枯魚永慕爰
洎服除餘曹投牒燕京重來朋簪愛泱君夙豪邁修髯豐軀神明赫奕詞氣閒都
同人曰君德業曷量俟摭蘊藉用孚羣望涼秋九月晨頰倏興引鑿自鏡悲來填
膺歎歎奚爲厲豎奚酷匪藥匪醫不牀不褥嗚呼哀哉朝聆馨歎夕扁泉臺搖落
晨望飄忽寒灰古誰無死奪君胡速半宵淹逝白身誰贖君嗣哀號不疾何侍君

耦江鄉得計且憐人生泡電蒼昊茫茫如君不永行道駭傷夫容何城玉樓何處
儻作九原逢君告語斷琴韻挂劍荒寒興言逝者能弗凄酸良會秋中延君怡
樂羅拜依然君其歌格

祭蔣礪堂相國文

於乎箕尾寒芒台衡韜景墮淚思羊遺碑頌瓌於乎哀哉維公德器大呂黃鍾炳
靈河朔秀峙華嵩蓬閣天高英蕩風駛作督八州灑潤千里爰陟

黃扉馳聲丹徵人擬夔龍出侔方召如公德業彝鼎鼓鐘數難更僕言被自躬躬
被伊何蔭茲茂樾惠風甘霖洋洋百粵公昔繡衣惠潮戾止城號鳳棲化均鱷徙
巍巍節戍開府自東爲哺爲餼我安我童海氣乍滯蘂芽猶甚扶菑卹創爰葆爰
字長隄臥波渺渺桑園魚龍氣驕鴻雁聲喧公籌興修官緝許貸石堰土牛疇廬
焉賴穗城瀕河六脈舊渠戰浚戰淪衽席我居粵山之隙兩學竝建莘莘綏纓公
拔其彥端州登舍門不容軒公張而大文教式振粵集番夷敵樓設險公實捐貲

控制斯善粵夙繁庶稂莠澆萌公令搜逮伏莽無驚粵之鹽筴以疲敝公劑盈
虛無即于匱惟公明哲知人善任惟公廉平體信達順北接梅關南踰瓊徼東身
甌閩西連桂嶠守令服公爭自濯磨婦孺知公飲之醇和莖雨蠻煙豁爾門簪甘
露油雲報以樂歲粵人載公毋我公歸祝公壽考爲我瞻依如何昊天奪此碩德
將無積勞盡瘁是極於乎運巽肆勤酌泉誓志廣平頌碑昌黎姓字古人可作匪
公誰儔年數奄忽鑿烈長留功德在民爰稽祀典椒醕陳情鑿茲不腆

戚蓉臺洗馬同年哀詞

嗚呼自陽春之送君兮牽麻衣而歎歎怨三載之遲會兮詎涉秋而永離羌天道
之緯繼兮穢良而訾好緊荃蕙之不芳兮稿萎先於衆草君諒有此昭質兮醇而
溫良悲四齡而何怙兮又隕涕於陟岡靈靈蕙蕙而撫芘兮形影颯其相依爰紹
亂而逮今兮孽性怙夫慈幃綉媵修以自矢兮竭嗜學之羣毛諒虛沖以切劑兮
喻金鍛而玉錯紛既有此內美兮又重之以文采辭條理而修潔兮芬澤襲於蘭

箚 心 堂 文 集

禮名塲兮再捷蓬壺三山兮拾級皇華馳兮晉齊珊瑚羅兮俊傑泊黔中之視學
兮有頰林之好音拔尤而薦善兮闕惠兼濟夫災祲

皇綸肅其內徵兮直

三天之講幄雖六月之一息兮仍典司夫玉局戴

君恩而念母慈兮情慙愧以自懲勤修省以進德兮固曩哲之所矜方盛年之未
艾兮正

皇路之修平管豪而黼黻兮志攬轡之澄清夫何時命之乖舛兮運慈竹之先悴
也將殉死而兆殃兮匪好修之懋也扶靈艦以南沂兮樂樂見於江鄉夫孰無此
明發兮感至性而遭傷西湖風雨蒸溽不可處兮冢嗣偕伏於苦廬條玉折而蘭
摧兮泣西河之漣如羌蒼昊之降割兮慘胡酷於倫紀恫鬱邑佗僚而店作兮竟
畢命其長已矣嗚呼君敦仁而篤禮兮俛焉以獲外和怨而中介兮藹然以莊年
富體充兮睥炯炯而聲揚瑰軀豐頰兮宣康彊而允臧進將鬱爲時棟兮退猶武
型於家術怨名位之未副兮傷氣類之凋喪士林奔走哭相屬兮雖百身其奚贖

疑天道之報施兮召靈氣其難卜亂曰蓮社荒涼風雨凄兮孤雁南翔何所歸兮
君以孝殉依母慈兮泉路杳冥攜佳兒兮同儕永訣痛難追兮好朋好慶弔君不
遲兮納誨責善君是資兮侃侃譚理君罔疲兮吟席吮毫憶君詩兮銜杯命侶解
君頤兮卅今卅卅俊終古運兮吾儕半衰拜君帷兮執紼無期斷琴悲兮繁詞告哀
冀君知兮尙饗

祭李安人文

於戲瑤草凄秋胡香掩夜並問潛宣蘭儀永謝於戲哀哉維太安人猶龍之支河
魴載詠蒼玉爲姿有蘋有篚有葛施谷紘緹槃匱共水菽尊章載怡兄公敬止
指困免侄以相夫子杳杳刀環凄凄蓬礎一鏡忽破雙珠在襟箴逸敬姜傳教歐
姥嗷嗷二鵝鴛其羽一鵝刷翅亦集頓林一鵝輒鳴薇省懷音循彼蘭陔悠悠
春暉來諗歸止母曰無歸移孝爲忠曰母之烈嶺海燕山詎憐之別於戲古誰無
逝淑儀孔彰搖翟有禕 鸞箋煌煌芳蓀成林鳴珂在里瞻仰壺儀痛心桑梓不

曠牲醴寫我哀思靈其迺返右此一卮

祭某公文代

於戲梅塢煙荒榕海波澗北斗宵冥南臺雨泣於戲哀哉維公幼慧國器之姿斧藻厥德神禪其辭有炳舊文爬羅竊奧黃聿探微蒼牙穉嬰韓魯四詩德聖兩禮拜庚經陳訪酉秘啓末學於道舖槍啜醜爰屏筆輓公則細之匪維糾之迺鑿迺飭若氣在春如璞之玉古者明經綴學焉崇槃槃士子徵公胡宗白華在陳有絮其養芳荃被庭有沃其暘三世儒術至師愈盛繡虎贊龍金心銅行師官於京公則畱侍瓠葉教禮旨蓄供餌男繼女帛屏富厥家濟轍則憚行野鈔嗟藝師論師公用弗怡勉歌北山古也如茲師省祿薄弗肩公憂師悼勞勤弗貽公休師勸公駕行胡不果閩海燕山懼公勞瘁師將棄職敝屣一官謀俾有鳩庶承公歡於戲蒼天竟召公速遊踪宇歷禍云何酷於戲哀哉古誰無逝惟不朽三緬公德望瞻暗名山畜者其遇而豐令名吾師嗣音東觀蜚聲衍公之教式暫留爽流公之澤

篤 心 堂 文 集

亦浸滲決

祭文

皇緒載熙家乘紀懿黼黻光華式究公志某也闇昧師弗舍旃緒聞太邱拜禮章
賢謫焉說鈴弗揚公光靈其亘遐鑒此一觴

題跋

題手摹海忠介公詩翰卷

道光庚寅予官京師有持此卷索題者閱之則吾里有明海忠介公詩蹟也公氣節凜然世所欽仰詞章書跡不足以名公故罕有知者閒有流傳墨跡率皆僞託公名如吾邑莫衣堂中翰所刻公楷書其筆法古樸蒼勁但尾行署名與原文不類頗以爲疑至今未能定耳此卷詩句奇崛書法出入大家游蜂歎元鶴篇得章草遺意其餘樵溪行各篇亦深造王大令及唐賢諸家之室平生所見公手跡無一樞心者唯此不覺斂版起敬也夫以公之品節經濟雖片楮隻子隨手塗抹猶當相桓之况詞翰高古直是至性流露如此卷斷非俗子所能冒託言爲心聲字爲心畫覽此肅然髣髴見公高吟揮翰也卷爲羊城某姓所藏以予爲公同里後學故轉託遠寄數千里求跋予愛不釋手喜得覩公生平傑作因竭數晝夜之力手摹此卷藏之以志景仰并識卷端歲在乙未四月晦日識於武昌官舍

又跋

題跋

或有詰予曰子以此卷詞翰高古及楮墨印章定爲公蹟是則然矣然自昔流傳書家自鍾太傅王右軍以後如唐之褚虞顏柳宋之蘇黃諸公皆以文章德業著聲千古可見人雖不必以書重然書豈不以人而益重今忠介公之人如此而其兼工詞翰又如此乃公之書名自明至今寂寂無傳且有謂公拙於字學之言然則公雖不以書著而書反若以公掩其故何也予曰鼎彝之器非衆目所辨太羹之味非衆口所甘鍾呂之音非衆耳所習欲使公學聲律華藻之詞作柔媚軟俗之字與文采浮薄之流爭角短長非公所能實非公所屑然則公之不以此名正公之所以爲公也况乎公之氣節重古今聲名滿天壤雖婦孺能道之而浮華嫉妒之輩豈盡誠服難免搜求癥疔相爲瑕訾若曰某之爲人尙可其餘無足觀耳以此推之吾瓊邱文莊公文學著名而或短其品行忠介公正直馳譽又將薄其文詞韓黎所謂好議論不樂成人美者往往如是又奚怪焉予故表而出之以爲

尙論者戒至於公之忠直且非爲名况區區詞翰之優劣於公何足增損毫末哉
并書以爲跋

邢湄邱先生遺集後跋

嘉慶壬申年某既序先生文然當時所獲卒業者僅數篇繼得送周推官序一篇併入知先生文必多遺佚因語先生族人共相搜討閱今廿餘年某奉諱歸里先生裔孫維與宗憲等來謁則先生集已一再梓行某前序亦已附刊矣繙讀全帙各體文及詩仍復寥寥且多屬人後人妄增之作噫此淺人欲藉先生爲重而不知適足爲先生累也因爲別擇數四而汰其賸者嗚呼某不敏何足以訂先生文雖然先生之文渾樸古雅詞旨深醇其視賸作如瓊琳瑰璧雖雜之砒硃砂礫中而寶光虹氣璀璨輝映不可混淆此固有目共覩無俟深於文者能辨之矣抑某更有感者邱文莊撰先生墓志云公詩文不多作作必有理趣而黃泰泉通志載湄邱集十卷乃迄今僅存什一何耶余郡居大海中濕熱熏蒸風潮之所侵而蟲

本之所盡不但唐宋謫宦如李衛公趙忠簡蘇文忠諸名賢片楮隻字無復留貽即明文莊忠介諸公手蹟亦復泯然漸沒每憶文莊嘗爲石室藏書嘉惠來學今日不第書不可見並石室亦湮沒無存將地氣使然歟其傳之勿慎歟是可慨已抑又思之古人傳世之作不惟其多惟其精後之學者讀先生茲集如文豹一斑吉光片羽即可愴歎寤思想見先生之所以爲文與其所以爲人則亦無庸鬪靡夸多以爲觀美也已謹釐訂文一卷詩一卷而他人投贈之作附焉

王逸少曹娥碑跋

山陰楷法僅存大畧黃庭樂毅皆然摹勒既多寔以失真良可惜也此本尙具古穆之致雖間有造作未臻自然較它刻爲優矣

玉版本王子敬書洛神賦跋

此帖嚮於京中曾得初搨本行間殊有珠玉精瑩之色人閒希有瓊也予以三百

錢購於肆帖買以重直求予售弗得也後爲竊兒持去越數年又得此本神致稍減然往來江淮間所至搜訪盍求如此者亦復難覩況欲得如舊藏本耶書以志感

漢分書碑刻皆有刀法此帖峭厲陡峻用意如太阿剗截刀法更可觀也玉版本覆刻頗多然挺拔中神氣古穆不可以優孟似也

唐李北海岳麓寺碑

此刻較雲麾碑漫漶尤甚此本猶奮揚中佳者神采尙自可觀

岳麓寺碑圓渾道俊當在李思訓碑上

李北海書俊逸之氣卓絕古今前人謂其學王子敬失於欵側然變化中自成短矐非復游騎野戰漫無紀律者比試覆觀之眞得禊叙神髓米元章具其豪宕尙嫌俗氣趙松雪師其筆意乃涉輒媚然均以傳世矣

唐歐陽信本書醴泉銘跋

信本此碑追蹤內史博大昌明謹嚴淵穆楷法極則也

無錫覆本爲此碑摹刊之冠幾可亂真然矯衆刻癡鈍之失而取勢太盡太露故飛動有餘而沈渾不足可見唐代鈎勒之精非後人所及不但書法也

秦氏覆刻率更帖皆有神韻此本尤精采煥發微嫌太盡較原石鮮靜穆氣象是在學者心知其意原碑漫漶得此可弗寶諸

歐陽信本溫虞公碑跋

彥博碑爲昭陵第一石用筆如太阿剗截然取勢仍是虛和故有裘馬翩翩之態學者不得其意一味平實遂放鈍滯耳

有皇甫碑之縝密而蒼勁過之有醴泉銘之渾厚而堅練過之信本此三石格意略同參觀之可得師矣邕禪師及九歌千文等刻古雅有餘而筆致平實未易效攀蘭臺學父書然道因碑從此得法其故可思

昭陵諸石今醴泉縣見存然漫漶過半褚中令房公碑及此刻尤少完書殊有甘井先竭之歎此蓋百餘年前搨本其中佳處神采奕奕學者得其一二即可意會也近時摹本以秦氏刻爲優然神味薄弱未得真諦余以爲不若學此其餘諸覆本尤木偶可笑貽誤非淺也

唐虞伯施書夫子廟堂碑城武本跋

永興夫子廟堂碑爲唐代碑碣第一顧原石泐損上傳宋代覆刻本此城武本較西安本清挺道折雖搨法未極精妙然邇來頗亦難得北平翁覃谿先生幼學此碑所書予瓊學記頗爲酷肖晚年兼法信本意求謹嚴覺未免重滯之天然韻致乃知學古之難

唐張司直書吳季子碑摹本跋

司直書不多見此碑似李北海而古拙可喜筆勢如太阿劍截又類信本也嘉慶庚辰余客邗江得摹本重仿焉

家司直書樸拙古茂而用筆嶄峭無姿媚態其結體則處處用意變化欵側斡旋饒減歸於整齊知此可以論古矣昔嘉慶乙卯余客蕪城得見吳季子碑摹本於友人所愛而做之郭蘭石同年見而賞焉爲跋語且屬入石比年捧檄外任簿書鮮暇而蘭石已歸道山疇古賞奇斯人罕親覽之大息疇日終當付鐫以存古法也

李北海端州石室記跋

李北海行書變化秀傑力闢異境顧楷法極少此記爲吾粵金石之一又有景福二字書於洞中石壁其大盈丈真奇觀也此記左規右矩古質可喜蓋蘇坡公於此得法耳

跋所臨張長史郎官石記

家長史世稱草聖願所傳書蹟多倣詭縱恣之體難爲楷模易滋流弊正恐多參贗鼎耳茲郎官石記真書準繩規矩不爽毫釐而從容和雅氣韻深穩昔人稱爲

動容周旋中禮不虛也以此推之長史草書必非顛狂自恣漫無紀律者前人妄傳其醉後以頭濡墨作書及醒自以爲神殆俗論耳

跋所臨鼎帖數則

頃見宋搨鼎帖華陽隱居書精采絕倫雖多殘闕然它刊不如也因臨一通薛少保夏熱帖得王大令神髓聊復臨之

楊少師韭花帖道鍊古質是官奴丙含氣味董宗伯專心臨學頗爲得力然樸厚遠不及眞時代限之與余嘗謂須無時俗尙好之意在心目間乃可庶幾古人因臨鼎帖所刻並記

唐集右軍書興福寺碑

此碑與聖教序均集山陰書顧董華亭疑聖教至以爲懷仁書且以黃長睿爲誤據然則此碑亦可謂大雅書耶結體絕類官奴帖然官奴罕佳本諸帖所摹大似米海岳書聖教宕逸此覺謹嚴厚質中生韻秀致正自不乏尤可寶也

唐越國公鍾可大書七寶轉輪王經跋

久傳此爲鍾紹京筆未有確據卻斷不似宋以後人筆意若以鍾法論古質不及兜沙經婉麗不及靈飛經然行筆如奔雷掣電運腕如虎躍龍驤險峭奇拔往往出人意表此又兩經所無者或曰晚唐經生家所作唐經生頗多佳手然多平實樸拙從無此等警闢之作董香光跋靈飛曰書家品韻可望而知不虛也

元趙子昂書大方廣圓了義經序跋

松雪書滿天下求如此生動跌宕復具古拙之致者頗不數見此同年友洪子鈴庵所藏非深於書者不能辨也

元黃子久秋山圖跋

右黃子久秋山圖卷筆致蒼峭林繁蕭澹讀杜工部萬壑樹聲滿千崖秋氣高髣髴得其態度古人命筆意與興驅境與心構此非區區筆墨畦町者所知臨仿家

何處著手耶道光癸巳三月晦日雨窗無事繙閱翰墨漫書其後
題跋詩句不佳字跡亦劣吳仲圭數行尙是率意真筆

明沈石田西疇圖並自跋

此石田老人真跡格意蒼老迴非尋常塗抹家所能髣髴此當於氣韻辨之可爲
知者道也

道光癸巳予得斯圖於武林客疑其僞予曰僕亦未親見石田翁吮毫攝管何以
知其非僞客曰然則何取乎予曰以君之目爲僞也而取之客顧而笑予亦爲莞
爾也書而藏之

有人評此跋爲佳書者其人必不知書有人評此跋爲拙書者其人必不知書悟
此可以論書可以論石田畫

余前收石田翁花果長卷筆墨入化爲友人取去今獲此卷無意抒寫而蒼莽縱
橫千百筆中無筆不老無筆不花此等境界自關胸次非可跡求明大家唯元宰

稍近其疎古衡山老筆猶傷局促况實父以下乎

元鮮于伯機自書水荒子詩卷跋

道光二年視學關中得此卷爲有明來陽伯舊物卷端損去二十餘字署名後又闕印記以此委敗麗塵盆中鮮遇問者因以廉直得之拂拭審視精采燦然眞太常醉後輿到之作詩亦沈鬱懷壯各極其妙良可寶也

明黃忠端公題謝思忠畫詩跡跋

石齋先生書法古質超邁殆如其人此題畫詩尤爲奇特似僧懷素格意而隨手得趣所謂折釵股屋漏痕奔赴腕底目無全牛技進乎道此繇書味在胸古情在骨非區區筆札工拙閒事以眈顛僧其得心應手當不是過明人多有師懷素而塗抹詭譎適形惡劣者益不足論此當于格韻求之可爲知者道耳

明董思白畫卷跋

右董思翁做米敷文筆意濃潤深翠是海岳家法稍就清秀耳嘗數見思翁臨北

宛其合作處駁相敵余嗜其畫殆甚於書思翁之論衡山亦爾

又題草書卷

香光此頓率意所書自謂得長史十之三四氣味在工拙之外深於此道者自知所言不虛也

明陸子淵書跋

陸子淵真跡凡廿二篇後半冊尤佳妙者如柳誠懸學二王筆豈可易到耶附香光二札真率意筆亦自天趣也

明文衡山詩畫冊

此冊文衡山繪凡八幅自題絕句書法純熟秀逸真跡也畫設景運思清致殊勝用筆較平日稍爲腴潤名手隨興所適要自斐然可觀不知者鑿舟求之不足與言鑒別也

跋海忠介手札

忠介公氣節凜然有明至今數百年雖婦穉所隸亦耳公名願書翰罕得市買往往以惡劣筆札僞託予所見絕少真跡此書寥寥片簡而辭旨嚴婉字體雄勁以擬顏平原論坐書文詞筆畫均非貌似也莫書農同年欲重摹勒石爲跋數語

陳氏兩孺人傳跋

余讀兩傳歎陳氏多賢母也傳言王太孺人之誠孝李太孺人之相夫行善意矣常人得一賢母猶積善以昌其後况乎姑婦兩代若合一轍閨闈之內義匹師友其彰美於前而傳香於後者可不謂難歟或曰姑年二十五而寡婦之寡也三十九耳視白首偕老者天奚啻于賢母哉然其子孫衆且賢科名仕宦鼎鼎木艾鬱而必發積而愈光賢母之食報抑何豐也吁是可法已某跋

跋茶亭記

余友陳君樸庵示此記因白亭爲其祖與伯祖承曾祖遺命所建余素至廣寧然

讀之如蔭暘于樹品泉于甌也一介之士心存濟物豈在大設樓庵筮仕邑宰其濟物砥此亭矣同里高陸亭先生有積學郭蘭石同年工書皆可傳者某跋

萬文恪師藏諸公手札跋

右尺牘一卷先師萬文恪公所藏諸公手札也忠告之勲情意之聖讀之使人增友誼之重詞翰工雅其餘事耳時泉學士先師長子裝池成帙寶而傳之先澤長存心交可溯有兼美焉瓊州張某跋

雜著

家訓

嘉慶癸酉輯修譜牒既成族人屬補撰家訓竊惟匪言之艱行之維艱良用內愧顧以聞者足戒風人之義謹撮大畧冀交勉焉

官箴

讀聖賢書任國家事一命亦堪濟物大官豈以庇身既教養之恩受諸 朝典況忠愛之義得自性生凡內外之攸司胥恪共其職分八柄以駁榮辱一皆 君恩六計尚廉操守先乎巨節荷簠簋弗飾既蠹國而病民況貪賂有條將殞身而辱族清慎動入官之本才智勇應務之資勿徇私而誤公勿見利而忘害勿偏執一己之見勿輕信窠友之言勿聽僮僕而驕縱爲奸勿信役胥而騷擾爲害事上惟敬勿諂諛以取榮接下思恭勿凌傲以肆志勿視其位如旅舍雖一日亦我官常勿謂其職有尊卑雖一民皆我赤子刑可除暴明斷以濟仁慈儉可助廉用度毋

忘寒素畧舉梗概推廣設施勵循良以報 國恩建勳名而光族黨

民則

王臣王土均居臣庶之班爾宅爾田胥沐 朝廷之澤食太年之福雖雞犬亦慶
恬熙况開創以來我祖父先蒙樂利守禮正俗即以恪奉 王章戒訟息爭無非
敬尊憲典凡州縣及命吏皆父母乎吾儕賤母自專則鄉曲豈可武斷下毋訕
况告訐何敢公行 國課早完庶急公趨事之義家修克謹即循禮奉法之民

勸孝

天地之性人爲貴倫常之本孝爲先念子身所自來報親恩而罔極父兮生我母
兮育我豈一念之可寬不得乎親不順乎親雖百行而奚贖自襁褓至成立高堂
之汗血幾何由學業至修爲垂暮之精神已竭每爲念此能不泣然且夫定省溫
清不足酬親之鞠育而撫摩也酒饌甘旨不足酬親之口哺而手飼也愉色婉容
不足酬親之心驚而瞻悻也令名顯揚不足酬親之焦心而瘁志也雖供職而豈

能報親况肆行而何堪爲子是故念風木之痛則養貴及時念斑衣之娛則容宜承順凜受杖一節則勞無怨心謹扶持一儀則禮無違節至於過則諫善必歸親出之以至誠要之以能久家室和者父母順則毋致詬誶之聲爲不善者辱及親尤嚴絕匪僻之行甚或同生而異愛當思自取之由雖繼續亦毋儀尤宜曲盡其道生事盡祭禮數所以無違愛敬敦崇慢惡于焉悉化異子言孝敢縷舉以相規事父未能輒臨書而隕涕

勸慈

慈易於孝固世俗之常談愛而勿勞豈義方之明訓苟溺愛等於禽犢將釀惡甚於鴟梟固由不孝者多半亦不慈所致故少儀有教必豫於嬰孩天性未漓宜引其愛敬飲食衣服有常節首戒奢華拜跪坐立有常儀嚴防浮肆男課耕讀女課絲麻則逸欲之端絕言必誠實行必篤厚則醇謹之習成訓誨必延良師毋惜脩脯之費婚娶湏求佳偶豈圖財帛之豐少而習焉長而安焉將下愚亦可轉移而

美質自成大器

勸友

手足之愛兄弟是依既居次序之先當盡克友之道以父道爲兄職則訓誨自所必誠撫弱弟如已見則財產自所不計幸高堂之無恙則率以共服事之歡苟怙恃之早違則待之均父母之愛毋無分乎異同母無殊乎嫡庶皆吾父骨肉。遺弟無論乎男女弟無論乎從堂皆吾身休戚之誼苟篤恩於予季何至視如秦人

勸恭

瞻望則曰兄兮情有必至徐行必後長者禮在則然念天顯而克恭惟人倫之庸敬凡事必須請命出言務期遜卑雖賢智萬不敢相先況庸愚尤亟需受教涕泣而道至戚關其天良鄉黨之稱立本徵乎士品若此者既念同氣敢有異心夫友生之情誼與同體執親財帛之有無與倫常執切意氣之小乖與天性執重話言之小忿與至愛孰關是非之辨揆理尤貴原情嫌隙之萌能忍不如能化不藏怒

不宿怨和氣聚於門庭毋犯齒毋犯尊風化推之宗族

夫道

正位嚴乎男女倫紀重乎夫妻先明倡化之原始盡齊家之道房幃之愛情以汨溺而多昏牀第之談言以浸潤而易惑豈知婦言是用即爲家庭啓釁之原夫道不端必致嬖寵奪嫡之禍相愛不如相敬則家範宜嚴用情切莫過情則閭儀自肅要在即其言而折之以理導以義而動之以誠教之初來則豫防其漸喻之至切則易啓其明慎此觀型庶彰風範

婦職

以正爲義者夫之綱以順事人者婦之職幽閑貞正者婦德豈以才智爲能溫柔篤實者婦言首戒華辯之說婦容則安和整潔豈重繁華婦功則酒食絲麻勿尚奇技敬舅愛姑盡其禮相夫訓子合其宜嚴出入之嫌篤族黨之誼以嚴而恕者待婢僕以慈而恤者接親鄰處常則敬戒無違遇變則堅貞自凜有姦闖德永播

徵音豈必習乎詩書惟此申之訓誡

擇友

同道爲朋同志曰友先明慎交之義更陳集益之方孔子論友戒便僻柔佞之儔馬援訓兒有刻鵠畫虎之喻嬉遊縱恣即酖毒之媒惻樸真誠多金石之契是故苦言藥石也甘言冰疾也侈汰者防其浮華也黨同者防其蠱惑也暫交者慮其終變也泛交者慮其多雜也脂韋之輩貌合而情疏市道之交利盡而心懈君子之交如水豈效酒食徵逐之風同心之言如蘭亦非誓日指天之約惟茲審夫結納攝以威儀庶五倫藉以相成三益于焉成集

集益

人之資友善廣友之益人無方仕者有寮采之助故正言證論可聞學者有講習之功故直諒多聞可恃曲藝豈無結納農畝豈廢知交善勸過規其大者在倫紀綱常之要觀摩砥礪其深者卽身心學問之資要之勢不可恃恃勢者友豈我親

志不可滿志滿者友先我棄求教未誠何有善言之入聞過不改豈有正論之陳先祛傲慢之端務盡虛衷受至於我之視友易地皆然忠告善道所以全交久要不忘所以示信若夫祇承師表尊並君親匪惟講解藝文尤以防閑德性略舉十事原本五常既用自箴亦以共勉云爾

崑山族叔像贊

肅乎其儀儼乎其思敦乎不欺泊乎自怡誰歎古之鬚眉曰此吾叔之風徽蓋南金東箭之奇隨和璠璣之姿理昭哲而無疑才肆應而不羈乾隆云萎護草春暉滋棣鄂之芳枝蔭芹香于璧池匪者匪顧胡不懲遠徒丹青之留貽將徘徊而神追

按試鞏昌祈雨祝文

伊昔祈禱仰藉神庥爰沛甘膏雲雨油油嗟茲槁壤澗澤難周既閔旬時焦竭爲憂旱麥已枯晚田望秋黃苗埋沙青穗難抽矧聞電傷降于荒邱厥害靡已民其



篤 心 堂 文 集

無鳩吏之弗職神無民警民之多辟神無盡劉某也涼德屢省傷尤冀與學校教化焉脩維彼士心踴躍可謀轉移變化庶其有瘳濯赫濯明神撫茲力州尙克相之令行風流甘澤佇降民無窮愁教養可施用惠我疇再三之告漬娶爲羞尙鑒微誠俯允所求

八分山龍神廟禱雨祝文

在武昌

歲日月湖北布政使張某謹昭告于龍神之靈曰維神功參棗籥德協正中歟江吸海走雲驅風茲山幽邃靈氣攸鍾灑甘布潤爰助天工吁嗟旱魃偶降鞠凶野枯苗萎病我三農具官不德待罪楚封政乖職失咎叢厥躬蚩蚩無辜蠢茲顛蒙爲民請命無俾困窮仰瞻廟貌齊肅敬恭精靈鼓盪風雲景從甘霖普潤歲稔年豐敬當告請

宸翰褒崇佇慰民望用昭神功靈其來格鑒茲微衷謹告

權著

五一

鄭翁像贊

有翠者兒惡則祇之有禱者儀祜則臚之
伾伾英歲左韜右鈐載潛閱閣衆府衡
權鄂不萎止屏當鈇攬蘭蓀芳止滋培
威蕤樂石磊磊吉雲徘徊頰毫有暉言規
悠哉

鄭母像贊

善心曰窈善容曰窈君子之遠式淑且皎
男鑑女帛肅祇溫郵截髮卻辰而設沒防
佚名花在檻秋露團兮碧芹在頻春雨兮
溥藹藹蘭儀溫溫薰問式瞻丹素永惟
壺訓

潘明經像贊

沉精德園棲神藝圃經明行脩媿盤姬篋
悵怯義嵩將母緘華家術肅祇式柔式
嘉榮郁之學曰世厥煒燁燁緜止公登壺
止九烈無神攀桂天高歸臨桃李春風
調刁蒦翠英璧詢予秋駕願言奮飛于門
則大予別十稔公召玉樓式炳丹青我

思悠悠

題崔翁像贊

皤皤崔翁醇樸爲儔觀光槐市笈敵杯 醜眞倪素杖履夷翁菊圃松徑 皋西
疇行吾素位和氣與游載植蘭蓀職駉驛入貢成均燕翼貽謀康疆逢吉福祿
是道古稀聖鑒期頤增壽壽願茲鬚眉懷葛可侔

粘直齋贊

猗歟先生浩乎氣淵匪雕匪鏤曰維神全古松蒼蒼維石介介肅外惠中罔毫而
懈相時察物克豐厥家門禱恭懿式是柔嘉藹藹荃蓀庭則麓之青芹藻則
滋之匪唯滋之既碩用長又何麓之孫枝盎盎吾遊翔矣先生已矣言覘頰毫增
仰止矣

捐創張氏大宗祠啓

竊聞立廟萃渙懷槍霜雨之心繼別曰宗葉葉雲仍之澤邇本原者宜崇派別思

祖德者尤念宗功我二世祖元教授府君者秉懿華資誕奇清嘒嗣康訪之後雅號龍孫總令尹庭用光燕翼溯令尹滄溟鳴徙止宣猷布化之時偕我祖奇旬營遷助闢草披荆之烈洎乎覺宮司鐸臯比授經雲覆壇堂球筮魚龍欲變風過馬帳珠崖之桃李皆春經師人師教忠教孝遂使冠纓鳳翽簪笏蟬聯文苑蜚其華聲鄉賢光乎祀典至於牛刀作宰循蹟章章鵷序隨班科名鼎鼎凡令尹祖昌後之匪貽得教授祖支分而益盛厥功茂矣厥世縣矣然而祠宇闕如蒸嘗曠若雖蓮塘耐太祖之祭而專廟未崇况博門衍仲祖之支而馨香久盛揆厥所元至於今日良以托村分五支之脈瓊定開二邑之宗麻塲實屬長支蓮塘乃爲次脈馬坡則三支散處龍門則五支嗣興代有遷移勢難聯集不然豈有世閱百餘人踰千數而忍令功德之祖飄零弗祀不其惡哉某追維曩議創宗祠倣托村之舊基擇高林之吉地其地也背依峻嶺面映方塘遠市井之囂喧得高原之勝槩護田一水分綠當門遠郭千山送青入几每當曉風遲日春煦秋陰草樹鬱其蘼葱景物滌其澄廓諒棲靈之勝境萃族之名區乎特以崇芋寧之所必極壯麗

之親良裘集千腋而成廣廈匪數椽可恃所望本支各脈共效匡勳盛者千金百
錙竭報本追遠之誠弱者斗粟尺絲亦睦族敦宗之美某以圖終始竭駑駘之
於榱桷功程歲時祭費所當條陳細目徧告老成用備稽查罔滋浮冒凡樂捐
名允當壽以碑銘紀美今茲流馨後葉庶幾辛勤續述千年昭輪奐之輝子姓聯
翩百代啓冠裳之盛云爾

示鴈峯諸生

搆藝之方遲速攸異彌衡草奏于當食阮瑀制書于據鞍速之工者也平子研京
以十年太沖練都于一紀緩之善者也然才思雖有敏鈍時日豈可怠荒諸生未
嘗著論衡而潛思宛若賦甘泉而驚夢一篇初搆數宿乃成閉無己之門何曾寬
句吮長卿之筆真欲腐臺揆厥所由畧悉其故大抵人心靜則專專則摯故徑路
絕而風雲通人心動則貳貳則馳故意象起而鴻鶴至若夫義在咫尺而思隔山
河豈苦慮之有益况乎學不敏求而思廢寢食誠冥索之徒勞既悟前非將觀後

效何俟鐘鳴燭盡悔不十年讀書所希鉢響詩成等之百夫決拾聽春蠶之食葉
幸各杼柚予懷老馬之知途當毋河漢斯言

禱雨文

某等謹以酒醴牲帛之儀致祭於社稷山川風雨之神而言曰維神厚德資生功
崇粒食出雲降雨吹枯澤物維天惠民維神奉若祛沴布和群生命托頻年楚北
數患沈菑殘傷已酷化離可哀方慮水深又虞火熱今夏亢陽旱魃爲孽赫曦蒸
鬱蘊隆如焚草枯苗萎降此炎氛螟蠹並興蠶食是懼禾稼將空更憂疾癘某等
守土德政不修召菑實慮內省爲尤某等不德冀神亮 神卽 亮 民相 民
實無辜神所憫矣民卽有辜毋胥殄矣詹叩告哀爲民請命神聽維聰灑甘沛潤
尙饗

詩

古今體詩六十七首

對月

涼月鑿薄幃出幃步清輝樹陰落庭靜秋螢度階遲澄景人襟袖流光嗟芳菲歎
息苦羈旅吟與蟲聲徹
簫鼓沸城隅人語聲喧卑皎月獨照我入座相依依葉露滴輕響清風澹吹衣坐
對自忘寐搔首增愁思

晚眺

斜陽挂樹杪晚入吾門孤煙背歸鴉去市雲水邨水邨復雲邨望遠勞予魂赤
霄有鶴聲六合難爲樊

詩

詩

感興

五八

達人遊天雲昂藏謝籠樊丹邱歷浩劫珠樹森古春拱揖混沌中俾睨安用門
鬱鈞天宴策鼈扶桑噉元化秉其樞彌綸運無垠而我復奚爲歲時警驚奔一寸
縣心旌百年搖風旂道根不可究枝條徒增繁刊落以爲訓思哉摩兜羅

李孝子歌

有序

李孝子名朝欽澄邁人父瑞榮康熙十九年冬爲海寇楊二所擄孝子年十
六哭泣從寇逼父納贖不得臨以刃孝子呼號以身蔽父病瘳手掬穢寇感
動縱父得上岸孝子負父行不數里父歿孝子掘砂殮葬父骸指爪盡血或
見而憫之助以榼厝焉孝子行乞疾病垂絕遇救復蘇歸語其兄借半厝處
昇以歸葬人咸稱孝子按察副使王元樞有傳云歌以紀之

墨雲罩海淒風鳴鼻禽作音鯨鯢橫高檣大戟耀白晝叱縛戍卒如孩嬰磨牙吮
血恣一飽貫髮繫頸誰能撻纍纍擄掠納巨舶暮失贖緩晨爲烹我聞孝子未弱

冠傷父被執從之行家贊傾盡父疾劇雪刃屢試蹄啣拊膺痛號丐父命氣動
白日天崢嶸以手掬穢自浣濯以體翼刃聊措撐悲風怒濤助哭踊能令惡逆憐
其誠小艘出沒縱近岸肩負醫藥顛傾吁嗟父兮隕厥命嗚呼匍匐憐孤悽淋
漓血指力掘地表以藥石爲之塋行乞喘息病垂絕觀者感救蘇餘生竭來航海
十四月負骸歸葬邱首營君不見白虹貫日氣所感精衛銜石波能平自古至性
動天地孝子之行尤堪驚出入坎窞爲救父顛沛萬死鴻毛輕但知所生義應爾
違計身後留其名於嗟乎孝子違計身後留其名

聽何湘文侍御彈琴

海水汨沒山崔嵬刺船何處秋躡飛人間漫說廣陵散卻笑得橫還明瓊先生一
彈砭俗耳俗自落落先生喜虛堂晝靜人冥冥落手自作成連子此琴非指尤非
絃當其不鼓神爲傳心耶聲耶兩莫辨耶穠衆妙難言詮生平不識宮與商譚琴
卻笑驪與黃先生推琴發微笑瞪目高眈天蒼蒼

詩

詠史

六〇

統雲黯咸陽六合無輝光
祖龍漫東遊寧知真人藏
雷雨晦大澤雲氣栖芒碭
宛有黃龍長蛇爲之戕
風霆助暗叱劍光飛秋霜
虵死老嫗泣此龍已高翔
卻笑叢祠狐夜嗥陳勝王

楚陽尊義帝流離怨細瑣
郴州復此戕豺狼滿原林
堂堂沛公軍縞素發車馬
三日哭師中萬騎淚如瀉
鼓行東諸侯討殺義帝者
聲罪凜正辭大義振華夏
魯公有新家泗涕亦盈把
卻怪乃翁羨一杯或分我

楚項立孫心聊用繫民望
羣雄森豺虎磨牙屹相向
崎嶇竟何成委任頗亦當
章軍舊梟雄孱弱不可抗
秦黔水火餘安撫禁殺掠
救趙用羽師攻秦有劉將
入關易摧枯忠厚此可仗
孱王何足言此舉差可尙

祖龍制萬方祇慧發二世
彼備何爲哉輟耕坐歎噉
秋雨愁漁陽叢祠叫狐魅
雖非侯王種乃有鴻鵠志
故人隴間來遮道見嚴衛
夥哉王沈沈富貴果相棄
是時

筠 心 堂 文 集

章邯軍產子發萬騎周文田威及李躡鄧說紛紛失指臂秦疆豈不支備北自非計
備死固應爾備王偶兒戲英英破秦雄大半備將帥或怨備戎首或德備倡義德
既匪備心怨亦豈備事誰令萬乘君乃與備爲懟湯山有備祠龜鑑示來裔棄鼎
寶康瓠驅驥服鹽車龍鳳逝已矣蛭蟻徒紛拏英英漢賈生管樂誠其徒治體炳
今昔雄文振琮琤侃侃治安策愷切多良謨三表及五餌盛氣無休屠絳灌何人
哉不如廷尉吳少年陳慷慨銳志多齟齬古人重藏器撫卷爲長歎

雖陸唐治光德行周政上吾聞萬石君醇謹漢廷望申申復訴訴內政穆和鬯奮
建世其美慶亦能退讓雅化傳青齊千秋祠石相安得培淳源澆風振凋喪

君哲雖至貴不過重瞳儔鼎足不可恃干戈何時休走犬懼禽殫秦鹿豕人求吠
漢非其主爲信良拙謀吾聞食其生掉舌均設游下齊與夔齊烹者宜其優雋永
不可讀百篇徒爾留

伍被事淮南英雋爲上客亡國不受呼囚親勢良迫荆棘露沾衣危論固踉蹌美
漢多昌言過秦事尤覈流涕竟不終隕身爲籌策禍福誠自明因循乃可惜所以

詩

古烈士死生不可易不然介石貞被髮入山澤

立秋日登鎮海樓

蒨葉雄千載高樓鎮五層
海天秋思早懷古壯遊登氣象
三城闢光芒百粵騰雲
山浮靈瀛寶塔勢稜嶸
賴有丹梯步寧虞暑氣蒸人
從高處立景向望中增地迴
金風到天高玉宇澄
虎門開更壯珠海靜還凝戀
闕思飛鳥摩霄想大鵬呼鸞
眞引領朝漢舊墟稱況此佳辰
值超然勝概徵燕天看彩筆
今月更誰能

辛未中秋前一夕朱東洲送予至涿郡家稽山
茂才招飲其家既終宴二子乘月送予出城黯
然別去對月長歌用誌感懷

惜別欲劇語相對無一詞豈繫不能詞未別意先悲譬如皎月待圓時未圓先計
圓時虧人生萍蓬亦何涯缺蟾團桂胡可知嗟予七載燕朔羈對影聊作三人嬉
竟裳月下相追隨朱子標格欽瑰琦誰其同者吾宗奇超然演舉騏驎姿梅花清

六二

瘦寫風儀前身證果吾所師聚首亦願同諸居黯然卻作涉帖思月朔之隔勞聘
馳聚散寧必三五期願各努力崇修爲是時宵涼河漢歎主人勸我樽罍推明月
倒影窺檐鼠闌城踏月相攜持揮手颯颯涼颼吹清光爲我憐別離浩歌一曲行
踟躕來宵月滿將何之

涿州早發

月華露葉望微茫馬色雞聲破曉涼天上觚稜如夢遠故園風景與愁長招邀卻
喜逢賢主謂家務三茂才城市猶能說古皇南去關河多勝概慚無佳詠壯歸裝

渡溥沱

千里畿南壯論開溥沱奔放亦西來黃沙風急天浮岸白晝濤翻地吼雷麥飯有
懷酬主意扁舟猶許濟時才淮河聞道新籌策時自滄溪前盤谷兩江籌復黃河故道何日澄清攬轡

迴

懷秦小峴司寇師三首

詩

詩

六四

北闕挂冠去東山高詠餘林泉供偃息蹤跡寄樵漁道豈全身退吟仍抱膝據遙知憂樂感天地一葦廬

大雅推前輩靈光豈獨尊文章性情事動業口碑存陽羨去何遠惡泉清復溫卻憐君實健高臥水雲村

嗜古成奇癖憐才識素忱摩挲千載意椒醕百年心衣盛慚相負

卸每歲記東波淮海二公莫負拜賦

詩師詩有京梅六度陳椒醕之句詩文許共尋蓉湖歸棹近猶喜聽長吟

平海紀事詩上百菊溪宮保前輩

瀛海蟠龍龜虺功屬詎儒

皇威原止辟民望慰來蘇朱鳥分星壤僊羊奮沃都百蠻臻貿易五嶺號膏腴地
關珠江壯潮通碧澗輪虎門關阨塞鼇背聚輪輸每爲滋豐庶多緣習侈靡史誰
栽荆棘盜正長雀待狡兔潛營窟狂鯨訝資竭沙蟲迷射影蜃霧偃星弧出沒矜
長策波濤實坦途如何持法網頓使漏天誅十郡綏饒地經年擾躪虞乘流疑竊

筠 心 堂 文 集

鼠沿岸歎瞻鳥

聖德安良切嘉猷簡在雷輿情元夙戴公撫粵能歸粵民擊鼓臥朕卜此同符許國忠

心亟成城衆志孚齋糧先厲禁簡卒汰悔粵弁路廢弛公度不用刁斗嚴光弼軍容

肅亞夫鶴鷄群列象地鳥入門圖青海巒馳壁天山夜控怒勢方窮突兇計尙作

疑狐恃有豚魚格真無秦越殊輕紉明坦易羣醜感頑愚匪徒齎詐策抵岸陰圖接濟

版衆祭饗誠相殷然犀照不渝汾陽親悍虜諸葛渡深瀘東海初歸命西師尙萃

通兇豸券涉履老穉競懼呼時東路就平公繼戎親指高僧老幼迎犀手揮熊虎鷓鳴射

鏤鏘轟波騰萬礮動地轉千纒燿骨難相拒狼兇已就俘神功同破竹能事比摧

枯令震鯉身島風嚴雁戶區迴戈迎凱奏獻馘屬認語西路匪逆鳥石二百廿八皆伏法賊遂平溟渤看攷

甲關河儼棄繻煙光迎海若雲氣淨天吳更訊諸群從毋令賊不辜生還餘纒總

故里樂忻愉藹藹柔麻景熙熙作息娛歲時豐蟹稻生計及莖菰恰見救寧速誰

云禮讓迂淳風期上理甘澍快勞數入奏

詩

六五

天顏喜酬庸

詩

帝眷紆綵翎光顧盼文錦重璠瑜方叔猷能壯阿衡德莫踰

平定安國
花翎世同生加宮保銜

上賜公詔

矜榮寵意倍覺拊循瀕走也家荒僻時驚有毒痛關心存故井翹首即康衢再造
恩同戴生全澤共濡長歌上公壽常此翊

神謨

平山堂

隔江矚群山巖則互簇擁棄舟躋此堂山勢不及踵有懷歐陽公構奇傍坡壑呼
山入几樽纍纍相揖拱駢羅見首尻撫摩儼承捧有如遊波魚群頭數現涌又如
渡江馬聯轡致駕翌白日俯陰晴層雲依檐拱高臥枕翠微拍肩失陰聳我來正
末秋草木謝丰茸笑語失崇巒腰足覺餘勇始知形勢奇况乃風流重何時一登
岱嶽學渺邱家

泛舟遊平山堂有懷

雷塘西畔繫歸舟，覽勝登臨豁遠眸。
楊帝錦驅隨水逝，美人香骨與山秋。
空懷苑囿，籠千點漫道興亡貉。一邱惟有平山名蹟在，冷泉翠竹自清幽。

過江風作不得泊遠望金山用蘇東坡妙高臺

韻

大千浩無垠，須彌八芥子。靈鼈冠八極，赤縣渺萬里。
金山浮江中，蟪蛄一巢耳。白晝俯深沈，紺宇鬱孤起。
誰移海上山，來作中流砥。我來風浪惡，掀簸但凭几。
遠潮漂山根，曾臺沒石齒。昔聞三神島，空濛一積水。
嵩岱與秋毫，相形祇如是何當。一登陟，福庭尋不死。

一一樂圖爲葉培根同年作

河朔一攜手，及君觴詠娛。推篷煙水中，遇君如畫圖。

予與培根同年
相遇蘇州園門

君家富楹書，棣

鄂皆酒徒。一卷盡一杯，醉倒蛾眉扶。昔年集英去，高句驚蓬壺。今年滇南行烹鮮。

詩

六七

詩

乃龍屠二者亦偶爾迢然苑與枯
警書與酒味適意寧懸殊
我生坐書癖拚醉聊歌呼
百城慚腹撐三爵虞首濡
書債與酒債往往驚追逼
披圖對君笑奕奕看鬢鬚
行矣君自愛努力宏遠謨
莫惜精進功爲慰同人
吁語久黑雲黯雨霰堆
篷繚明朝放棹去獵獵風吹蒲

贈家雲巢明府二首

萍蓬何處旅愁覺喜觀風過武林
每羨政聲時聒耳偶從歸棹一
譚心虛堂水月浮清鏡照眼
湖山人夜琴最是錢塘江畔
路漁樵工製十奇吟
蚤歲曾乘月殿查因緣猶作
宰官誇花栽上縣工聯句草
寂開庭早放衙十頃湖波
春似海一壺心跡玉無瑕
循良屈指吾宗最儘慰鄉思
笑語諱

過庚嶺謁文獻公祠

長江盡處聳崔嵬鳥道盤虛白
轉迴漫笑漢唐空地闢始知
蠻粵是天開寒梅不作江南
夢過雁偏從塞北來
繼起誰人識風度曲江不是
五丁才

峽山寺追次蘇韻

石勢門水立古碧搖清漪不知山寺高俯首蒼屨顏寒雨暗木葉暮雲閒往還聽
泉識道心窺潭亦潭關我生走湖潁洗眼佳江山安知奇秀鍾招我家園聞南陔
歸去來負郭山水環茲遊亦幻相畱詩贈煙鬟

過庾嶺讀韓桂舫中丞詩有題

北闕咨良翰南溟燦斗台雲山畱筆處旌節自天來野館初逢雁清詩欲放梅歡
聲傳嶺表借得使君回

青海新傳檄潢池昔患深澄清期攬轡忠孝發孤吟公昔年仕粵曾奉
太夫人諱過此叱馭愴懷地

爭轡報 國心他年嶺梅路風度此同欽公詩勸石
文獻祠

呈曾賓谷前輩

大雅豈云歇健者扶其輪文章自情性作者繇其真編剗燭古義卓犖見本根豪

詩

詩

素之所據巍然而輪囷三復先生詩古聲浮秋晏

鸚鵡萎紫芳繁霜肅長松長松有古枝衆芳有春容蒼昊曷云擇華實同一工夫
惟壘韞材鎔陶爲詩雄

凌風大河朔弄水清潁浦有館曰題襟有編曰賞雨邇來听江流春波海濤詞
林闢精舍高風掃庸腐昌詩興昌身吾欲叩坡語鑄金百十篇哦罷一印類

步塵海上山傾心有葵藿嘉章夙所欽未敏長城鎗茲焉惠清風洗耳鈞天樂澹
雲謫春韞汪波注秋壑何當從吟賞晞蹤得矩矱

極樂寺

隨意尋幽也洞天入門呼吸吸新泉等閒韻事數聲鳥消受清風長日蟬過客不
須譚俗諦山僧隱自號花仙池亭莫問前朝劫笑指楓林一抹煙

野花野草碧連天古寺招邀共酌泉慣有閒時僧坐石到無心處客聽蟬懶參禪
味何妨定稍隔塵緣已欲仙歸向官橋隨柳路龍舟隄畔萬家煙

陰雨連旬寂居寡趣籬間偶得小竹植以資韻

望其長也走筆紀此

老可數筆技無比寫生但有剝豁紙渭川千畝縱且橫踰淮而北橘爲枳我家天
南煙水中晨夕之交竹而已自從奔馳燕北來入門有竹便狂喜主人愛竹亦已
奇短籬十個聊爾爾秋雨秋陰一徑寒貓頭暗長蒼苔裏晨煙劇得三兩枝
位置石與水虛堂晝掩風瀟瀟披拂數莖碧照几滋培得氣性所存此君何必淇
泉美瓊玕十丈佇凌霄俯視春風桃李

盧綱堂水部夜間以水仙相惠走筆代柬

飄飄仙子下瑤京羅襪凌波訝有情卻怪夜來非伴侶蕭齋何處異香生
海棠猶待照紅妝睡醒幽庭得妙香幾朵仙姿一卷石宜人卻憶水雲鄉

題文姬歸漢圖

竭來邊塞幾秋風馬上鳴笳併淚紅欲借胡琴寓哀怨玉關明月夢魂中
蠻雨羌風落照殘幕庭東去路漫漫嬌兒不解歸來意猶問阿孃幾日還
中郎才命已堪憐流落嬌姿更慘然卻怪曹瞞偏義膽一般豪傑董公傳
黃金如土貌如花感舊傷離何處家未必塞廷無好事又教長別送天涯
四百餘篇落筆成絲桐重辦譜新聲可能得似班家妹風雅何慚女史名

題負米圖

我讀妹邦誥奔走事長壽我誦蓼莪詩餅罄聆馨缶卓哉吾師仲夫子負米養親
名不朽今之圖者亦已勤此心乃與古賢友渺渺周道疲提攜孜孜筋力數筥數
吁嗟乎子生三年解趨走十年之後能任負願復鞠育皆親憂手足髮膚豈吾有
當其負戴事長途猶復門閭勞翹首况又掉臂事遠遊閒鶩名場趨利藪下坂叱

馭漫云忠出門斷裾良可醜門子何人歌白華高官漫說縮黃綬人生事事譚高
奇往往百甘缺升斗我亦奔馳數年餘京華旅食聊糊口一官妄意慰劬勞萬里
何爲曠澗潯因攬此圖發長歎歸來洗腆爲親壽

題洪和圃小照

密竹綠三徑高梧清四圍琴書自幽趣魚鳥共天機遣興存瀟灑閒情入澗微畫
圖不到處相對挹清晖

題家臬文先生秋雨賦後

秋夜寂沈沈秋聲入苦吟文章性情事生死友朋心夜雨庭梧落秋風宿草深開
槭字不減淒絕感人琴

箚經處匹作賦鵬馬揚吟天地多才忌文章命世心殘編孤實在秋扇故情深畫
雨茫茫感餘悲數曲琴

詩

詩

初冬午睡夢中見坡公墨書因賦

虛堂日午悄無人，微風蕭蕭雲在天。圖史亂積不可數，燈目不語同坐禪。寒十月午睡穩夢中條，忽見先賢展幅髣髴十餘字，字字如作銀鈎鏘淋漓沈穩筆力重紙墨精氣鮮且妍，中有姥字尤劇賞頓令石本無真傳贊以雄厚寧兀謬何當先生一笑晴先生詩文夙所慕，挺特卓絕如飛仙，鄙材攀躋不可到，每慚嗜古無精專，我後先生數百載，片紙胡作金石，怪序塗手跡安可得醒來，猶自心拳拳，海南萬里先生鄉，遺我數字豈非緣，睡起長懷渺何許，白雲斜日空悠然。

坡公生日秦小峴師招同陸給諫言陳編修傳

經秦州牧盧水部文錦敬祀於尚友齋步小

峴師韻二首

健筆誰當轉萬牛，峨眉西望景前脩。一時大雅尊喬嶽，百折孤忠逼勁秋。嶺海奇

筠 心 堂 文 集

遊供嘯詠江湖歸宅笑浮休瓣香許續招魂句渺渺精靈記夢醒

某佳夢實殿見公
以手再卷袖相示

筆墨淋漓迥非人間近玩
登時猶記爲天姥山詩云

桃榔廬小似犒牛遺蹟猶將廟祀脩

吾瓊先生遊蹟如桃榔廬載酒
室潤酌亭開就祀擬議重脩焉

短笠支來黎舍雨

大瓢分得粟泉秋

泉在郡城東北
即雙泉之一

追隨卻喜同君弼市井何當隱伯休

小峴北
已告休

仰止風

流淮海共

秦淮海先生爲小
峴師祖同日並祀

淵源師友一時畱

壽清泉太夫子

南極炳祥星東皇錫永齡春風熙壽萬和氣洽椿庭孝筍森相望慈烏韻細聆息
多沾輟酌愛欲詠原韻文酒供陶寫詩書足典型研池綠草黑墨汁入松青餘串
兼多技傳家重一經藥宮翔捷步蓬觀刷修翎珠玉成行秀蘭蓀入座蓉善應縣
世澤寵早賞

天廷未學慚持燭洪鐘愧叩莖

良觴隨伯始長此祝康寧

詩

壽盧翁

詩

七六

南極輝煌傍斗台，雲芝瑤笈泛霞杯。江門月色春宵近，庾嶺梅芬臘雪開。九老圖中人健在五仙臺，昨客悠悠敲子門。漫羨崇高甚善果，由來手自栽。

瀛島槐槍昔未銷，夷賓番舶雜招邀。烏支海賈勞安集，蒼兕雄師備漿橈。豈必巖廊資轉饋，卻同桑梓慶豐饒。勳酬三品頭銜貴，喜見黃鵬下絳霄。

雪碗瀟瀟記玉川，文章風雅孰爭先。軒昂句有郎中健，美好官還水部傳。會見鳳毛增藻質，相看鶴髮照華筵。登堂他日稱眉祝，預介瑤觴寄一箋。

余居環翠山，名闕志乘願，朝夕遊處不可忘也。各繫以詩。

圓勢嶺

家園東南僅半里有山，特立形如覆釜，圓淨可愛。遠眺極目，頗登陟焉。

家園尺咫周羣山，圓勢迥出青屏顏。當軒卻立侍僮僕，入牖窺窺燿巒。山雨欲來，得奇勢雲頭壓山，溼蒼翠涼飈四面紛。變碧樹千株，訝崩墜有時雲日相鮮。

妍青蔥交輝明原出朝曦東
巖挂銅鏡殘月西瀉光流天
小石牽頑雜齒齒大石
傾危紛崑崙回旋百折升其
顛千里蒼茫渺煙水北眺雲
海疑有無西瞻城邑遠
可翠白雲飛盡天宇高青煙
挿空明浮圖垂嶽崔嵬在何
許裏糴躡屐愁修阻何
處江山不可娛歸來大笑從
樵父

挂勝山

圓勢之南不數武平山橫長俗名九升嶺形家以此爲挂勝山蓋象形云
諸叅東走何雄煞挂勝平列狀伏熬西垂占田山名作平遠北直圓勢相翱翔山
光清曉淨可媚煙霞明瑟蒼迢遙想當大羅列仙籍姓名高挂凌雲霄乘雲飛空
欲下讀拍肩挹袖相招要瑤池高會酌瓊液霓裳法曲鳴雲璈群仙宴罷逝何許
茲山終古天爲高仙人胡亦愛名字時輩矧怪空煎熬覬首勒石志萬古草木同
腐憂徒勞古人得意遺赫奕錦衣木石誇雄豪

詩

香鑪墩

家園之前環以水田中有邱形平而小狀類香鑪稻花秧水周遭環繞亦足樂也

山田田中無半弓厥號乃類香鑪峰頗雜榛莽石鑿鑿周以水田流淙淙山木豈曾沈水蕪稻花時覺聞香濃金祝寶鴨古所貴漁莊蟹斷茲相逢何必披香有侍女騎牛來覓田父蹤

大鼓坡

香鑪墩之西隔田坡陀高者爲阜圓如鼓形故名

厥山類鼓吾鄉有以鼓名山昔傳久琴聲巨響古所稱發棘么纖難與友嗶嗶雅奏張明堂逢逢大聲聞天胡不考擊震遠邇豈爲寂寞藏山岡

黑嶺

家園後枕橫山山之外有峰高聳奇特與圓勢等山石皆作深青色百里

之外皆可識也

黑嶺巉岩插天黑百丈摩空狀方削黑嶺山前有居人高撐遠勢倚挺特何人大
筆飛淋漓隨池遠潏山頭墨榛莽千古無品題試擬雄詞壯山色

水壇井

圓勢山麓有泉出焉茲爲井大旱不涸霖雨輒應云

圓勢山石何磷磷循麓得澗流清泉陰厓幽絕不見日終古寒冽山之垠每當盛
夏苦炎酷臨茲未濯清先皴泉流百步不陟泥淖深沒交淵際距泉十丈得畦畛
跬步震動頻逡巡川源焦竭患旱魃茲泉依舊鳴潺湲昔傳禱雨志靈應壇遺香
幣陳氤氳山神於此宅靈秘雲輿風馬時騰騫噴吸元氣降膏澤蘇枯灑潤占豐
年我聞岱宗作霖雨觸石膚寸崇朝雲何圖荒僻有奇蹟灌纓奚止誇清漣會當
井汲並受福豈徒觴溢流涓涓

詩

獅子山

家園之西半里許山類伏獅形家言以此爲水口門限云

百鬼啼走群蟲馳山風颯颯蹲狡狴深眸仰鼻奮鬣首尻隱隱呈雄奇百犀十象供攫搏餘怒挾石厓岩摧幽燕齊楚督電逝渴飲奔躑臨水滑行人駭愕顛卻走迫視乃覺山屨屨吾聞李廣夜射虎飲羽沒石傳驚疑豈知造物恣譎詭雕刻萬象形迷離方今鳳麟在郊敷胎卵孳育俯可窺偶留此物鎮門闕白邪戰懾靈所司君下見瓊島終古絕虎跡惟覺草木鳥獸相嬉怡

琴嶺

獅山之西有山平正如置琴其下田間溝洫童年釣遊處也

成連刺船滄溟中海濤飄汨鳴天風颯嶸山石無人蹤成虧何必徵與宮昭文不鼓懸解空泉明無絃將無同或者知希曲徒工棄置神物爲此峯平遠貼妥如磨礱徽軫疊石橫且縱風泉響答聲瑣瑣妙音太古聆冲融世閒笙笛驚凡聾擬藏

攀鼎伴鐘鐺

乙亥至都和莫衣堂姊丈紹 惠喜晤之作

小別邢江勸隔年重來攜手五雲邊且欣雙鬢猶矍昔莫問浮名計後元雅操如

君冰比潔清齋許我馨香同懸同寓離海堂憶呼勸進杯中物一曲高歌日暮煙

十載相依是夙緣親情友誼兩殷然高譚漫許同心契要路何須捷足先詩酒等

閒真落落性天隨處見淵淵行藏至理能安遇齋額新額安遇渺渺前脩共著鞭

汪益齋同年銘 謙喜晤有詩即步其韻

蚤歲曾陪月殿槎竭來雙鬢欲霜華蓬山伴侶看君貴粉署才名更孰加清宦故
應饒逸興襟期相許絕纖瑕何當僦屋爲鄰比竹月清輝共一家

閔 先君制後追念傷懷愴然有述

十載飄蓬悔莫追以甲子年北上至壬申春始歸別居十年一年膝下竟終辭先君於癸亥正月棄養歸侍甫及一載本圖薄祿

詩

沾頤養轉爲虛名誤老衰

某歸侍時
君年八十有

一銜索枯魚今已矣繞林鳥鳥又何之

時將歸
堂尚書

屢催就歸
溪主講

驚心此日風庭樹痛斷拔琴輟哭時

已從失恃苦銜悲甘載傷心念母慈

某年十七
見有距今廿有二年

祇喜靈椿增晚健更歎棣

鄂好扶持

某入京家
兄侍養

八旬上壽桑榆喜萬里始歸菽水遲慚愧西鄰田舍叟牽衣常

對牧牛兒

四十年來勤顧復漫將憐愛冀騰騰勞心每爲眠牛兆

先君自卜地葬
先母
先叔歿十年間勞瘁過甚

種德先期駟馬門

先君以彭家言預
決某已已登第果驗

舐犢肯教違職守

某官詞館時
有八翁郵札證不許乞假 慈烏

空自負親恩澁齒縱有崇阡表野草荒煙已滿原自卜羅辰山片壤存山川迴合

大灣村

先君自
卜葬地

千人會葬叨鄉譽

先君歸葬山會葬者
數千人哀榮向所未有

一碣褒榮待

國恩繇牧幸無傷墓木山靈長與護精魂九原永隔垂終古秋草斜陽有淚痕

擬李太白東海有勇婦

太白集注原曲關東有貞女

高要梁翰妻楊氏姑毫弟釋翰疾篤楊刲股和藥以進翰愈楊創發死余聞而哀之

端江有勇婦結髮君子盟君疾弗可瘳悵然悲填膺君姑髮皤皤君季扶牀行君乃不可死妾生復何成宛轉煎中腸沉痛迫中情白刃持素雪蒼天動精誠 剜肉奮不顧摧心慘無聲逡巡勸君飲飲此疴能平妾肉爲君啖妾血爲君傾妾心爲君死妾目爲君瞑父母生妾時願從君死生報君骨肉重况乃支體輕古有報父死傳者蘇來卿縑縈西上書津妾免嚴刑報夫截耳鼻斷臂以自明磨笄舊有山千秋傳其名名亦非所知死亦非所驚卓哉此勇婦凜凜昭日星

早遊寶月臺望七星巖

侵晨發城隈籃輿陟會阜朝曦散鳥雀澹霞薄林藪依岡一再成俯池六九畝密林映石髮漸流澗溪口延臺循舊衛隔壁削新削阡旭蕩平曠巖雲鬱昏黝青碧

詩

詩

八四

嵌巖巖梵宇雜戶隔于外宮
屢廢甍複駢指海造物上雕鏤
登臨得幽助歸途發
遐心願從煙霞叟

謁包孝肅祠

百代端江水風流尙此臺
視沈潭碧甃人去月徘徊
翠竹依嵒細清池拂檻開
星巖舊遊處精魄可重來

一笑何清比高名
震古今建儲開國本
邀福豈臣心
公對仁宗語
品自韓歐匹
情緣
惠愛深
宋史公殿察
兩墨奇刻
端州遺跡在
悵望獨登臨

夜坐

微雨浣殘溽
焚鐙耿深宵
閣階上熠燿
晚條聆秋
蟬靜景物與適幽
襟誰爲描一
縑數緡覆聊與忙清寥

題陸明府玉關生入圖

春色不度處輪臺
西復西圖中傳吉語
天外有歸蹄
老骨森冰雪
邊聲入品題伊

涼悲壯句蒼絕爪痕泥

書伊呆齋狀後

下士遂青紫聞道乃大笑達人不自達高風寄屠釣讀書不章句元旨洞深妙觀物契卜數博涉雜醫療理致此可研旁達蒼衆覲厥行殊可嘉陳情感至孝仁心以爲質懷慨匪望報當其願慶肆備保雜喧噪憤揮事滌濯馬磨恬吸鬧咄哉手一編短彙耿宵照人語寂闕闕往往聞坐嘯鄰媪驚怪市兒聚讓謂借問此何爲掉頭去不告

伊節母狀書後

鍾玉寶白髮燭火光愈鑿潭根蔭十畝霜雪護堅凝禕茲伊母貞森森時千仞十
七爲伊婦廿六孤枕凭黃鶴慘孤飛素幃警身殉七旬侍衰舅痿痺苦踏蹬扶掖
三載餘子職婦亦稱小嫌更何遑大義亮高峻時典釵珥資用贍餅疊馨機杼響
絡緯香澤擲餘膳哀哀將雙雛反哺不及瞬室毀子亦亡鰥鰥泣幽榭血盡使眼

詩

枯蒼天不可信日月壯孤節陰靈豁晝暝孫曾見騰達蕚祿如響應貞珉勒
天褒光風照垂乘永言式澆漓芳徽誦貞愼

題畫鵝圖

芙蓉荻葦風蕭蕭清江弄姿明羽毛紅裳雪衣態百出碧天寫影波三篙山陰道
士昔養此池塘十百鳴喧聒誰其愛者右將軍籠此竟去情陶陶當其下手黃庭
卷意興直與遊波濤阿誰絹素作此本趣閒態遠頗能描愛鵝愛書復愛畫遣興
差比前賢豪

夏雨

晚雷殷曾岑黝雲暮邨樹飛葉隨鳥雀白雨傾如注庭竹低垂風池荷翻瀉露悵
闌紛欲釋幽澗想流澍吾家南海南夏畦病已劇龜紋坼方竅龍骨踣錯互大江
交平疇水車縛園露坎井置塍頭軋數行步山田復何有高岸夾徑路泐溝漸
澗流枯槁不可度蹄涔雜泥沙爬掘供斗斛區僂一勺餘歛傾半反沂長塍虵腹

次沾潤漁沫向晨雞起儕偶邴落聞諱侵曉挈朝饋過午不得顧兒童驅喘憤
沙鷗拾僂船當背曝赤日沐首漬朝霧曝日奚足道漬霧此可慮田家古夏霧主旱且多螟新秧
正抽鍼蠟廢奈殘蠹青斑森蠹動蜿蝻誰能捕以櫛櫛秧閒置春蠶沮洳爲祝田
祖神得此夏雨雨此物付東流晚禾趁早布和甘幸霑足豐稔慰歲俯仰既有
餘租稅此可裕嗟予躬耕人纖悉盡田務卻緣喜雨詩得此憫農句

子明九弟航海至端州

望汝汝不至汝至反增悲海風吹汝衣面目黑以鰲鷓母昨暄忤怒汝無休時汝
云風浪惡此行乃遲遲大瀛海以外汝遊如通衢暹羅過交海去去常如歸習險
輕濤瀾逐利無錙銖往又入黎峒採木黎母陞毒瘴見陰霧長蛇垂樹枝詭狀雜
深目左言紛雕題汝也掉臂過習之如羣兒勸汝無任勞時命安可期嗟予亦汝
爲風雪燕朔馳何有世上名徒幡鏡中絲安得十畝閒與汝長守株

詩

詩

送子明歸瓊並示諸弟

留汝不可住送汝還家園寧知別後淚相視但聲吞汝親驚衰白多病無朝昏我來踰別時掩淚垂潺湲嗟我復奚爲虛名枉馳奔十年客京國孤負生我思此行計歸期祝汝親長存生兒固貴多羨汝多弟昆子職務各盡奉養期加餐尤戒汝諸婦口舌毋紛繁婦舌古厲階雖黃徒囂喧親心旣以傷友愛奚能敦生兒爲養老豈令多煩冤汝也各自思朝夕勤清溫勉勵率諸婦服勞寒與暄况汝得親慈衣食非苦辛滄滄竭馨潔甘旨謀雞豚上以奉嚴慈下以和笮填七旬之高堂百年如風翻莫似予鹵莽枯魚徒悲惜勉哉思此語後悔難復論

閱江樓餞別聶心如

別意不可綰登樓江水長閱江江上月送君歸瀟湘白露下洞庭君歸理輕航蒲颿過沉澁乘風來天開承明巢舊痕容臺舍新香君本天上槎偶泊南海旁寶筏

濟度謂瀾溪主講煙艇頗徜徉此遊周適意况乃遺跡芳君先哲人跡主瑞溪講席江水在君腹江月照君腸耿耿不可極闕江江蒼茫

聞鑾兒娶婦

家室此燕喜壽人猶未歸嘉賓列門戶華燭交光輝遠別昔所苦近別猶相違人生樂聚首營營何所爲

長兒未及冠倉卒爲遠行攜婦擬隨予慰此羈旅情室人及稚子遠道非所勝風霜苦奔馳舟車恐勞形昔離怨別苦今行愁遠程望望在天涯踟躕兩情縈

宋芝山招飲凌芝泉寓次芝泉韻

覓談閒結伴舊識及新歡淺渚當門靜清尊列坐闈便應忘主客底事勸盤餐彩

筆論千古時芝山出示右軍王羲帖墨蹟淋漓氣象干

落落探幽處依依握手歡池痕侵砌淺樹影落庭闈作伴宜鷗狎分甘勸鶴餐出門餘眺望晴日滿江干

詩

詩

桃花庵希賢詩社圖

蘭棹泛幽渚言尋竹西遊桃源在何許
蒨庵俯清幽明湖綠漪淨嘉樹天紅稠
新蕤變佳節雷雨遲良儔寂寥三賢居
縣邈懷芳脩憲風穆佳頌白雲停清謳
古情正渺渺任事良悠悠回首歌吹聲
驚心歲月道春花自開落撫景爲夷猶
昔傳遠公賢乃是澗明流攬圖登古興
蓮社諗千秋

題珠湖漁隱圖

細雨斜風秋滿湖一灣清景上葭蒲
絲綸奇興他年事且伴閒鷗入畫圖

煙艇徜徉雙社湖數聲欸乃出菰蒲
高人自古耽漁釣况有家風射鵲圖

雲臺宮保
有射鵲圖

此爲宮保
弟梅者作

伏狐記爲宋齋堂刺史題

神道有至教祇氛靖細屢綏綏敢跳梁
鬼域擾閭左爲餌成陽曠見抱朴子設
伏革

筠 心 堂 文 集

囊裏見晉書韓友傳 翰之帖耳伏鎮以石墮墮既宥貳負誅乃類支祁鏤魑魅絕羣
歷門門靜帖安吾聞爲政者正直戒偏頗飲羊斂厥跡害馬去必果鸚鵡森搏擊
益竄鼻炎火長林靖啾啾苗稚茂繁夥使君識高卓治體薄庸瑣試作伏狐觀寓
言誠亦可

題宋芝山畫冊

碧葉浣孤秀漸流漱石齒結廬蒼煙間林臥觀太始
遠水落天際滄波繞長林柴扉面江啓自然煙霧深
山靜倚石峭樹老盤厓幽物外愜真性巖居吾所求
雲氣在樹杪坡陀接山麓自然幽澗中偃仰數椽屋
峭壁插天高老幹擎石立綠猗蔭幽園莫放紅塵入
密林蒼以深遠峯濃染黛何當覓清幽一洗塵氛態
水雲浩無際煙雨浮空濛孤舟隄畔行時見蓑笠翁
巖響互嶽嶠邨墟隱林樹仄徑轉復深卻是亭前路

詩

詩

崇巒圍繁林春煙萋以綠重泉樹杪懸翁疑振鳴玉
長松臥古石幽巖見蓬戶平曠有半弓願言尋老圃
遠泉漂山腰巨石立滯澗空山無人蹤高林自秋響
傍水依山地人家啓荆扉披覽供臥遊悅見煙霏微

題比玉女史遺冊

惆悵優曇頃刻花東風吹作紫流霞含情賸有人閒木留得香痕護絳紗

邗上送陳玉方侍御南歸

北闕挂巍冠東山耽林壑飄然丹邱心厭插緇塵脚榮華笑腐鼠清標聳雲鶴平
生沖澹志胡用事羈絡繫昔青雲朝鄂不聯翩作雙飛入承明並翼起臺閣水部
得新句雲司勳忠恪掌銓更清要明慎見廉錫行人避驄馬高風健盤鸚氣誼况
淵懿藻詞擅賅博洋洋富篇什醴醑耐咀嚼入法更精研古筆高秀削賞鑒恣搜
尋元妙洞扁論森森桃李花入座若伊洛往往問字車門巷衆履踴道味相餉

遠雅譚絕諸謔廿載京邑間士論得矩矱邇來苦拘束速踐林臯約春草怨淵萎
棣華蚤零落謂雲香先生眷言慈蔭榮歸侍陔蘭樂釣弋尋昔遊松菊有夙諾黎川
肆游衍暇日陟崇學新芬茂蘭荃老幹侍竹柏學子得誘掖田家或酬酢迺爾泉
石娛超然濠濮託賞心自夷猶至味歸澹泊走也忝門牆某受葉雲香師先生弟也研鑽愧疎畧
春風坐我時雪戶立如作茲來邗上客陪餞南歸酌孤棹渺煙波長天盼邈漠瞻
然念雅範豈但感離索敢自傷沈淪猶願勸藻淪西江有明月南海幸照灼

題家葯房前輩畫冊

曾阿千丈幽古磴百盤曲遠嵐栖蒼煙衆葉浣新綠詩情陟奇勝畫意發遐矚空
亭無人蹤寒泉自鳴玉

又

峭壁蒼厓一望秋疎林亭畔俯長流扶一可爲覓煙霞侶一笑忘機對野鷗

詩

梧齋琴韻圖步蔣丹林師韻

十圍蒼翠蔭窗橫，永晝繁陰匝。地生綠綺伴人香，欲炮碧煙如水夢。初成海山託興神，爲澗壑觸無心物不爭。此日鳴絃聽奏曲，虛堂明月足怡情。圖爲馬路齋同年作時任府學令

題何湘文前輩羅浮面壁圖

弭節旋滇海，攜一邱神。山白雲踐夙，諾清颺拂鄉關。奇勝昔海上，靈秘並風還。丹霞冠高巘，珍幹羅曾巖。蒼莽大瀛圃，瀕洞晨霞殷。股石壇陟窈窕，鐵橋俯澗深。梅夢吐深塢，瀑響聆幽澗。翠羽自啾唧，仙蝶何娟娟。高人萃靈淑，大雅深閔矣。蓬山昔鳳翔，柏府停驂驂。一麾典劇郡，萬里綏群蠻。掉臂厭塵網，投絃窮幽探。選勝嶸嶸屐，遠兀坐蒲團。開招安稚川，侶拱揖浮邱。班夜來風雨，聲澗谷鳴。舒豁嶢嶸嶸，鱗甲張縹渺。笙鐘酣鈞天，盛廣奏仙侶。來趨趨潛虬，媚絕竅臥虎。吟幽菴，煙靄條園鬪。水木清回環，流雲倚峻壁。華月棲晴嵐，心境豁元妙。耳目餘清甘，理致此可悟。勝因

夙所耽紅塵笑飄電白日欺華顏清都邈天宇福庭只人寰高風灑頰靡逸興思
追攀誓將理煙棹來此依雲庵攬圖發遐想綺語何能刪

牛痘詞贈邱浩川

靈樞何處覓神方滋護奇苗試玉漿參得西來真解脫卻令天札濟慈航
文犀一點妙靈通物性從教悟化工爲問陰陽均相業生全奚止卜黃童

題費新橋觀察泛海圖

古郡瀛壖闊滄波地脈連四州環巨浸五指矗長天問俗傳鄒魯觀風尙管絃

皇仁周萬里南顧問旬宣

舟楫南天寄 絲綸北闕尊黃扉稱世業丹地舊詞垣

筠浦相國帥曾爲翰
林察院公其猶子也

吐鳳看

擣藻乘驄凜建言蓬萊曾到處談笑指鸚鵡

浩渺孤帆影蒼茫萬頃濤波開熬青闔山指馬鞍高空水涵深碧魚龍靖怒號中
孚占利涉雲日擁旌旄

節鉞嚴江建樓船父老迎星帽春澗渥露冕惠風清士沐文翁化人傳鄭相登

按公

雷瓊多惠政又捐俸修書院士林德之

濟川真素志奚止壯遊情

壁荔亭

一灣煙雨傍郊垌夏呼朋到此亭水色半篙圍坐處樹陰人影共清冷
驛路紅塵一笑誇且將名字闢詞華儂家卻有煙霞伴雲水疎亭倚日斜

題挂月峯圖

燕山巖奇壯盤田拱宥曉巖雲冠峭嶺華月懸曾嶠磴道官以深澗流紆且遙鬱
鬱澗松秀依依隄柳嬌春風富韶景臘雪凝寒條靈境蔚幽勝佳氣捐煙囂都尉
舊卜宅山水相招邀桑柘圍邨落雞犬滋清寥琴韻答澗響書聲和童謠短衣朝
射獵長柄春鋤苗凭橋矚遊鱗倚樹聆秋蛩惠風拂林麓暖景歸漁樵渺爾謝塵
網逸然想清標故山老松檜新條舒英翹荆關倩濡染林壑窮摹描嶺海緝墨綬

都尉詞竹
樓宰文昌
筓篋攜青
綃勝境餘
優愜令德
思光昭披
覽數繙覆
題詞慚瑯
瑤

題伍青田聞香圖

秋光森桂枝
庭院蕭如水
撲鼻有奇香
清心觀妙理
釋褐事遊宦
投簪遂初服
小山招隱篇
寄與聊自足

題塵緣未了圖

大鈞運羣品
萬彙自萍萃
濛濛黃土搏
蕩蕩浮溷寄
人生於其閒
自無而有致
流水本清虛
空花笑濃翠
醯雞等身名
腐鼠嚇勢利
百年自煎熬
三昧誰遊戲
使君契夙因
妙解西來意
韶訖肄明訓
壯齡崇遠志
觀書鄙章句
砥節高義海
及粵山屢擁
紅塵騎下車
頌生佛所遊
勤撫字此緣
非凡緣塵累
豈吾累始知
未了因即在
方寸地古之
賢聖人法門
乃不二不朽
厥惟三大德
得者四吾性
本大同斯人
安可避煊赫
豈榮名崇隆
詎高位圖中
真面目解悟
妙思議何須
證置曇宗

詩

旨自深至

詩

萬安十八灘

橫舟下南安，逶折依淺渚。章貢匯兩流，稍稍開門戶。頗意幽谷出，或得夷曠所。沿流無暑刻，陡覺衆峰聚。白日懸高厓，蒼壁瞰深釜。大聲發水上，衆竅助號怒。調刁碎風簫，砰匄咽雷鼓。萬騎乍環營，千軍疾赴虜。舟人手篙楫，未至先慄股。湍波噴珠玉，峭壁束罽紉。怪石逼溪流，壘壘詎可數。大者搏熊龍，猛者蹲貔虎。長者巨鐵索，峙者聳柱礎。河瀾激臥牛，罅隙點鼠窟。張口頰，拳石遍斤斧。沙水日潑戲，鋒銳攢萬弩。長流已中斷，前覩無寸土。我舟訝驅車，大行困齟齬。湏臾鳥道轉，漸覺蛇腹吐。詰曲危累卵，迫狹爭銖黍。窄徑已難容，深潭不可俯。當師儼禦敵，叫絕呼其伍。喧聲閩巖谷，衆指紛柁櫓。響震礫，澗水石撞鐘。嗚飛梭，乍離手。枉矢初脫，射箴宕千丈。落迴轉四山，舞耳邊風颯。縮目眴不敢覩，稍寂辨人聲。相視但色沮，回首古帆檣。峨峨埋沙湫，出險就平曠。清月照天宇，青山矚夜碧。平流放柔勝。

雁聲過遠天漁火明遙浦笛師始一笑稽首謝神祐回頭向我言灘名爲觀縷白
淵與棉繩九曲及天柱諸名少雅馴惶恐聞諸古昔傳三峽峻又說五溪苦世路
多崎嶇人情喻險阻生平走南朔舟車歷齊楚況我家海南波濤與遊處鄉園久
離別歲月驚羈旅牛背自穩便馬足漫誇詡卻羨東家某遠勝西域賈

中秋灘河夜泊

月影依人近灘聲向晚多萬山圍夜色孤棹耿秋河佳節馳駒速浮蹤旅雁過郎
州千古照鄉思更何如

縱解長安憶能禁兩地愁鄉心隨水遠涼月照山秋蟲語聞清切吟聲自唱酬珠
江與瓊海南望悵悠悠

題雀閣齋賞菊圖

衆芳鬪春華霜菊經秋好古人重晚節志士徵懷抱翟子今淵明嗜好有同道壯
歲選明經文詞富奇藻風標謝流俗鬚髮未華皓拾衣據磐石秋色來西顧尊前

詩

泛清香籬下無凡草畫意想超超天懷殊浩浩余亦號澹人三徑何時掃

送汪益齋同年 謙 歸粵

秋林響淒風高原肅煙樹闕遠不可極分張怨修路自聞君南行中宵發驚寤攬
袂及君語中情轉回互往予忝賓興與君幸聯步辛歲來春明殿前看作賦昔別

秋方半同君詠歸去我憂君北行

癸酉予丁先君憂
是冬益齋八郡

我來歲云暮

乙子亥歲
抄至京 喜哉登

君堂契闊快言晤室邇宣南坊蹤跡來往屢君家萎靈椿悲痛得遠計君行歸珠
江觀縷伸孺慕願祝荻萱闈健弟妹舉婚娶早從出山駕迎養未云誤即今需賢
亟君才乃優裕報 國固應爾養志此焉寓平生忠孝心早奮天衢步嗟予忝氣
誼蚤盛共依附臨歧忍言別贈語託豪素

邗上哭吳山尊前輩

鴻雪重尋水一方先生亭名兼葭菼蘼露成霜風流老輩嗟雲散水竹精廬自夕陽

挂劍正摧吳季恨，碎琴終爲伯牙傷。不堪回首邢江別，惆悵西風老淚長。某去秋邢江別公面

南公握手垂涕曰僕老矣先生南去不知見時竟成諒議

十年獻賦列仙班，揚馬聲名禁禦閑。鳳閣已應推作手，烏私終許戀家山。燕城甲

古篇章在隋苑，尋芳歲月閒歌吹。聲殘竹西路，二分月色黯前灣。

儒雅眞堪作者師，迂疎猶許共論詩。淮南招隱多聯袂，冀北空羣愧賞奇。公評某詩深於

六朝近代所罕字畫則平生師友劉文潛之外鮮有匹敵鶴去亭虛餘悵望，屏圍有二鶴公病二鶴先逝水流花謝總淒其。平生知

已無多淚灑，向雷塘再訪時。

題松亭觀察春湖夜泛圖

長湖作波漾深碧，輕雲卷空夜寂寂。春風吹月墮波心，拍岸晴光淨如拭。天長水遠兩渺茫，淺渚平沙照清滢。野桃三兩閒弄花，新柳一條翠欲滴。櫓聲何處雁鳴空，小舸載月光盈席。使君豪興富良宵，露屢風巾來得得。琴書靜契餘古懽，鏡中

詩

詩

人泛鏡中月，鬚眉寫影澹清華。此身真作東波百黃頭，小郎解水嬉欸乃，高歌江月白。我披此圖，重低徊，庾樓雅興，供紉繹，使君豸纘，巡秦中，飽看華色，寫奇特，黃河天上，龍門高枕，席洪濤，盪心魄，函關紫氣，真可圖，雲夢胸吞，若無物，米家書畫，何足云，板度汪波，浩難測，君子用船道，在斯，其樞在水，理可識，爲語濟川舟楫，才煙波莫夢江干雪。

題張仙槎寶泛槎圖卽次其韻

霄漢當年泛月槎，飄然蹤跡又天涯。儘教翰墨收靈秘，相對江山照鬢華。老眼閱來留粉本，浮生到處笑空花。白門它日招朋舊，臥看煙雲繞碧紗。

寶籬旅館

暝色下遙邨，征軺夕到門。涵青山入牖，環白水當軒。秋氣空亭得，灘聲永夜喧。憑欄無盡興，未敢息瓊轅。

雲氣山明滅沙痕岸有無孤城圍夕照遠渡隔煙蕪古縣亡秦侈殘碑釣渭誣邑道
碑曰非熊在望意聊將懷古意抒寫向征途
指太公然無可致

山農歎

山行闕若無墟村孤煙隱隱生高墩土門人家穴巖腹有如戴天窺瓦盆巨石嶽
巒峭壁立懸流下作驚濤奔居人三兩出其穴下窺直若猿猱蹲雞犬岑寂聞一
響頽垣仄徑連籬樊出門百折不容足往往屋脊爲田園礮陔犖確不及畝半如
掌跡如眉痕田苗稿萎豆菜惡酸嶒山骨盤其根耕者膚汗日當背併火裂石鋤
間翻茶蓼藜蕞糞果腹婦子稔褐無完禪樂歲勞勤艱一飽饑饉荐至誰圖存道
旁况復達官至計口力役追呼繁吁嗟乎澤農患潦山患旱造物孰與獨煩冤山
農所處况瘠薄雨露不受滋培恩何當采風獻
當宁寬政所及如春溫蒿目鬱悒不能默默息奚補徒空言

詩

一〇四

獲鹿晚眺

迢遞關河日轉轅，晉陽山色見雲屯。
秋風禾黍原頭道，日暮牛羊嶺上村。
倦馬頻嘶夕照征，鴻渺渺度煙痕。
簡書催送當西去，投宿何鄉夜啟門。

溫泉

小澗巖山下，潺湲入座喧。
蘭湯宜夏浴，槐火訝春溫。
方沼澄能鑒，清流灌不渾。
紅塵欣一滌，餘爽挹前軒。

秦家今何在，唐宮蹟已虛。
玉池羞粉黛，金盃出邱墟。
故事空千載，清泉尙一渠。
振衣聊眺望，山色又征車。

牽夫謠

西行途閒出勢險，峻以絙挽肩輿作引舟狀。
輿多者至十餘人，皆科戶就役。然多匿壯者，而以羸稚充之。予憫焉，作二謠。

牽翁謠

予眎朦朧予履跛癱而不見維山穹窿維谷豁豁人馬喘汗脅息撫胸予筋力幾何而執茲工維達官之故兮予無而恫

牽兒謠

予髫初垂予齒初兒予不能誦讀不能胼胝胡業之不習而舍焉以嬉胡行之不能而就勞且危予稚而癡誰使予爲維達官之故兮予無而嘗

大散關

大散雄關矗高峰大梯石棧自重重凌虛屢陟飛雲洞絕頂疑逢羽士蹤北戒山河憑指掌西陲風景拓襟胸馬蹄好助登臨興百折何愁壓蟻封

南天門

鳳縣南山絕頂曰南天門

萬笏層巒亂插空帝閼欲敏鴻濛雍梁地扼秦關壯巴蜀天開漢使通看盡煙霞

詩

皆下界聽來雞犬入雲中高寒已到清虛府俯矚扶桑曉日紅

詩

一〇六

嘯邨圖爲黃刺史題

秋水閒雲別浦夕陽楓葉前邨著筆嘯聲何處空林人影柴門
皖水碧浮天際龍門翠插波心有客科頭得句天風吹送鬢蒼
春雨江南有夢秋波湖北多情吟到杏花香草渺渺故山月明
一曲琴音月榭數聲鶴淚秋空伴我吟懷嘯韻傳來隴首清風

歸棹圖題贈吳蔗鄉大令

廿載鴻泥戀舊緣朅來蹤跡一飄然寫生倩有荆關筆一紙驪歌半樹煙
北走孤輪沒磧砂南來片席趁飛霞曲江對酒多朋輩夢逐離人共到家
河朔高歌醉夕暉篋南山翠上人衣在家漫說爲官好小別林泉又憶歸
河聲華色上眉鬚勾滿仙風一老儒卻被青山笑窮宦買山依舊一錢無
寥落天涯氣誼通三年臭味與君同披圖爲我添詩客回首關山兩寓公

題畫白牡丹

綵筆新生素寫光天然富貴冠羣芳
濃迷玉砌春無影夢繞瓊樓月有香
塗澤幾曾真國色白描原不鬥時裝
長安看徧留青眼肯逐繁華馬足忙

釣鼈圖爲李海颺觀察題

謫仙昔署釣鼈客談諧謔詭恣傲兀
咄哉我友海颺子圖古人圖亦奇特
竭來縱覽滄溟東樽木萬丈生天風
浦口幽闕泉客室飛雲臥渡馮夷宮
洪濤駕天渺一粟鯤鯨鱷狎雞鶩小
施釣餌引六鼈大言奇恣賦流浴我
聞宰治得釣道陽驕棄置鯨魴好大
魚離臘味醴醢會稽浙河厭鱉鮑洞
庭作波霜滿湖釣竿又拂衝雲塢鷓
鴒乍徙海若避鱷不取與情乎古人
玉璫釣渭水投竿海上蘇蘄尾砥今
鼈極度砥平願君經綸佐 丹宸

詩

歐陽公生辰同人集吳蘭雪中翰寓齋次醉翁

亭韻

心香邈曠代椒醴陳遺編西十號醉翁丙戌今其年滄州昔作郡有亭翠峰開頽
然太守醉山翠環尊前林壑蓬窈窕雲泉流涓涓新詩宥以清如撫太古絃山水
得真趣絲管徒紛繁捧手誦篇章洗耳臨潺湲愛樂物與同適意且醉眠平生服
膺心匪唯其語言寤思肅遺像杖屨風儵然

挽吳巢松同年

蕭瑟風吹墮計書驚心朋舊淚沾裾風池毛羽傳家學 螭陛篇章噪美譽才力
幾人推鮑謝追隨似我愧嚴徐頻將契闊晨星感夢向齊東哭素車

憶得霓裳共奏時蓬萊聯袂託襟期左卿詞賦三都貴賈傳經綸一策知滇海昔
傳名士榜珠江人誦妙齡詩會聞宣室垂憐意歎息儲才奈數奇

祇識龍蛇竟莫逃忍聞埋玉向蓬蒿表明憶灑傳經淚吾壬午喪子病肺多緣校藝

勞時論驚傳悲國士朋儕相顧失詩豪清臞豈必非仙骨
淅逝堪傷未二毛

蟹厭曾偕臭味親鋒車常喜尺書頻幸從持枋聞忠告每許論詩契
秘詮挂劍蒼涼悲宿草斷琴樵賴付荒煙天涯寥落誰眞賞灑翰臨風問九泉

題史忠正公手札後

蒼茫邗水波淒愴蜀岡月誰遺孤憤書伸紙氣鬱勃堂堂史督詩時艱困
隳瀧國步餘殘喘闇主自枯枿諫書嘗泣陳選將及練卒北陵發哀憤南冠涕咽
嗚馬阮徒蠅營高劉轉狼跋四鎮况昏驕千言砥强聒要地爭淮揚何人堪節鉞
兵力暨相資義氣或激越寥寥片楮書情勢已曲達當其命筆時壯氣怒衝髮
孤燈伴鬼嘯血淚和墨潑言詞與筆畫棱角峻碑碣索酒偶宵終擊藥聽明發
公誠文武才况兼忠義骨一木困支撐大夏俄傾撥淒涼嶺梅花傷心葬袍笏
聖朝重節義褒獎光銘碣此紙壽金石精靈詎泯沒持此正氣歌大義千秋揭

詩

詩

樓桑邨

潭根十畝望冥冥移向中山蔭野羽葆昔年徵吉語宗支終古識炎靈興王業
已三分定喬木名猶百世馨墟落叢祠間遺蹟巴雲西眺萬山青
古柏舊傳丞相廟樓桑尚有帝王村長條臥雪燕墟冷獨木撐天蜀統尊早信兒
嬉驚里巷思回厄運濟中原永安宮外離離草待賦歌風已夕昏

題乞食紅袖圖

江君示我乞食圖蒙袂躡屣來于于高門華室連長衢問君買何之乎寺鐘早
罷朝將唾簾聲忽過青樓隅樓前綽約臨雙姝客何爲者非狂奴鬚眉七尺憐長
軀胡麻相餉兼屠蘇勸君一飽爲君吁男兒生願青紫紆食前方丈圍羅裙不然
豪俠高陽徒笙歌買笑千金輸佳人滅燭客欲遮名姬夜授銅虎符不能具食豈
丈夫王孫何事哀窮途吁嗟乎世閒乞態千形俱大小工拙胡懸殊酒肉屬饜顯
者餘播間何論蹴與磔中庭相向淚欲枯施施猶自驕妻孥儀秦况乃妾婦呼牙

慧足飽千株，儒知君幻相。工拙琴勸君，此圖慎藏諸。毋令訕笑議，在疎

皖江賑饑圖爲朱恕齋刺史作

皖江城頭飛愁霧，皖江上哀鴻。音松林樅陽百餘里，洪濶拍岸秋濤深。青嶸緣樹渺，何在炊煙寂寞淒。淫霖存者男婦類，鷗鴛浮沈澤畔徒。哀吟聞道賢侯來自霍，春風有脚噓幽室。洗穢楫周巡，日百徧忍自饑渴。爲饑黔小舟數葉，載餅餌太倉。千斛煎釜，餘生一飽食。侯德救死千輩，知侯心除盜。本是救荒策，安集况乃繁。刑禁我聞長孺擅，發粟河內安撫弭災。韓富在宋講賑卹，青州善績尤所欽。我披此圖識循政，如聽歌誦留棠陰。何當傳播告司牧，直將繪事爲官箴。

又題攀轅圖

惠留南嶽蔭甘棠，霍山一名南嶽童叟歎歐別。路旁一幅生綃難寫意，口碑他日古桐鄉。

箕裘家學縹緗尊，朝望清華重王昆。謂德齋師黎庶豈知門第貴，祇從身受紀

詩

深恩

菁莪芄黍碧油彌望雲山佳氣留卻羨壽春甘雨足

君新除岳州刺史

麥疇桑隴又歌謳

抱經草堂圖爲楊鑒泉同年題

九疑蔚深秀三湘鏡澄瑩結廬絕塵境選勝開柴荆水木自明瑟花竹含幽清精

舍出林表中有絃歌聲遺經志獨抱世業存兩楹研香得澹味洗心此草精

研香洗心

二堂名堂構緬前基圖畫餘深情

明經有高位繫豈在爵祿六藝道德本節文著經曲叔季勝詞華鞏紛藻壽夫知重手澤古編事耕剛名教師儒賞經術治理足願將惇庸經永錫烝黎福披圖自珍惜前光志詒穀

靜軒給練小像

虛堂晝敞清如水先生抱膝憑髯休几古懽雅愛圖史陳道心靜契虛白旨碧潑牛

頃光涵天翠篠千个寒浮煙澄陰倒映衣袂溼淨綠寫影鬚眉傳筇節初臨淇水
碧臣心坐對江流白朝列頻聽鳴鳳聲高人自畧釣鯨客我披此圖得懸解人生
即事供瀟灑天南會尋水竹居風月何須一錢買

顧南雅學士爲陳望坡尙書畫滇南唐梅

昆明碧波龍蛻骨幻爲古梅僵屈鐵誰將老筆圖寒枝畫蟠素壁作龍掣人言此
梅傳李唐千年瘴霧埋蠻荒南詔爭餘斷玉斧江山久閱成滄桑老幹迸出春萬
斛孫枝已看蒼千尺漫天風雪螺山青倒影杈枒華浦碧此花自古誇清奇美人
翠羽徒妖姿豈知南荒挺鐵骨不數東閣騁新詞尙書摩挲舊所喜學士縱筆弄
奇詭鄉夢我亦羅浮顛虬枝森森鐵橋水

題郭蘭石所藏谿山無盡圖

蘭石示我谿山圖殘楮澹墨雲模糊云是作者方方壺虎兒房山存形模老毫騰
躑疑鴉塗麻披斧劈法豈殊崩厓禿樹石髮蟲點墜墨凝元珠風颯變滅疑有無

詩

詩

一一四

伐毫得雞寫，髯蘇枯椿繫馬噉。倪迂當其下手，思榮紆人間。何處雲水區，武陵桃

源真仙都青空在胸難可摸。圖成擲筆傾屠蘇，左題識聊自娛。豈計閱世來延

譽，文衝山周六止董思白陳眉公稱董孤。鼓詩志賞相嗟吁，煙雲半幅留題書。最後

我友煙霞徒，謂聞石寒窗披曉青燈孤。五年頻護煩奚奴，此卷石既得復失者數次風雨敗屋窺

穿窬，半江水翦無淞吳。此卷爲竊兒持去歸爾石時題其後半斷痕脂輻珍瑤瑜，我聞此語爲胡盧。失弓

得弓均癡愚，谿山萬古雲卷舒。造物無盡供，歡愉買骨奚。若干金駒臥遊條，忽仍

子虛荆關妙蹟成，狗芻留君杖頭買山儲。白雲深處營吾廬，歸從田父謀樵漁。棄

君此圖息壤如與君拍手撫吟鬚。

蔣耕青海天清嘯圖

何處凌虛託素襟，江湖睥睨笑蹄涔。剛風天半聞長嘯，雲海蒼茫萬頃深。

豪氣峻嶒不可刪，振衣清嘯翠微閒。繪來空闊無前景，響到蓬萊山外山。

蘇門鸞鳳紙，纖聲雲水高寒大海橫。百尺魚龍千尺浪，人間何事著蛙鳴。

超然設想劇恢奇，不數乘風破浪思。我亦高歌來海上，爲君青眼報君詩。

送譚石甫

瑀

佐牧鄞州兼簡吳牧蔗鄉

曾對鄞州月

余道光三年八月按試鄞州

來遊又見君，十年憐舊雨。一第渺浮雲，

石甫再試春官不第出歙州佐

僻官逾貴身，閒職易勤遙。知山暑夜吟，賞到宵分。

自覺征途慣，安知作別難。關河千里夢，書劍一肩寒。墟里餘淳俗，煙霞稱冷官。奇

辭詢老牧，清興未應闌。

送王霞九侍御出守曹州

千將萬辟鋒，騏驎千里足。利器有銛鋌，遠馭謝塵躅。王君金馬客，文采耀球玉。霜

簡諫垣，高星軺。漢江曲國計，陳訏讓正學。振頽俗，臨淄方須理。

嚆咨此焉屬，宛胸古晉封。四塞控員輻，地大而物博。稂莠閒潛伏，邇者號能吏。追捕尙嚴酷，往往武健才。屢書上考牘，赤子爲仇讐。赭衣富，犴獄擊斷固稱賢。哀矜自幽獨，我聞受牛羊。本爲求芻牧，豈無駒虞仁。徒事鷹鷂逐，禮義可已亂。教化馴。

詩

親睦往訓匪迂圖致行在誠慤才德君恢恢允卜蒼黎福龔黃當復見郇召尤可
勗據謙況下問芻蕘豈足錄勉茲效贈言敢云當忠告春水鴻雁來送君極遠目
因風寄好音循良傳可讀

題姚笙華同年樟遺照

論交廿年餘錄別又十紀令德遽云徂清才長已矣矣嗟予識君時奏賦 明光
裏聯衽接研席千言訝翻水旋捧閩海檄政聲滿人耳銜恤竟歸來壯遊窮海底
弭棹珠江寬乘風瓊島駛繫余方休官偃臥粵山巒孤吟雲汗漫弄月水清泄投
刺知君來披衣吾倒屣握手疑夢寐相視各悲喜此時顧虎頭謂耕石同年視學來
桑梓慨慳感夙歡文酒敵堅壘怡嬉正未終聚散旋此始應 召余方行佐幕君
爰止顧子先朝露高義聞君美耕石身後事
笙華經理 強臺余再登誓墓君不起噩耗閱星周
涕泗重拊髀天道竟茫茫幻相徒爾爾令子肯堂構示我尺素紙鬚眉訝君存謹
觀淚盈背宿草劇傷神悲風雲溪淚

題唐敬楷同年 鑑 讀父書圖

蒼茫沅湘波黓黓岱雲色丙舍悵歸來賸有藏書室傷心易簪時手指縹緗帙百
城豈侈富一語詔作述讀書不聞道鞏輓空藻飾讀書不濟用鈴肆徒佔畢聖賢
所詔告體用皆篤實君學有本原省察務誠一往年守桂管尸祝今不忒以此稱
讀書庶幾勤學殖况乃嚴親遺丹黃存甲乙心傳匪文字手澤重珍瑛謳吟發忠
孝摩挲劇感側嗟予廢蓼莪潸然念罔極手鈔並口授兒事猶堪憶書田坐榛蕪
寒竿遶啾啾令名無善詒遲暮砥心畫攬園增感慕與君各努力勉哉紹前修相
期崇令德

雜詩

秋風颯已至蝴蝶下幽草娉婷山頭花強作嬌女老江瀕有翠竹獨伴松檜好結
根苦不深時榮毋務早努力守歲寒有終慎自保苑枯自有時悠悠付蒼昊
碧荷生幽泥花葉灌以鮮白鷺啄沙蟹皎皎毛羽新二者長美好任質乃其天在

詩

詩

涅貴不淄人生期自全不然守吾素墨絲悲前賢

芙蓉在秋水幽芳委流波波長不可極望遠當如何瞻然念馨姿言采欲遺它美

人隔千里盈盈阻秋河懷袖有清芬中夜勞吟哦不如付流水天涯或相過

曉行見白露團團被江皋秋枝鳴商飈寒蟬肅以號時光委逝波華髮空蕭騷百
年自電泡榮名昔所褒何以勵芳脩翹首古賢豪

五丁峽歌

七月十九日行寧羌道中距州三十里羣峰壁峙迴無人蹤循壁下深峽
懸崖際天潺湲永聲蓋漾源云峽行里許徑路又絕捫壁而上踰嶠冢絕
頂迤邐而南有碑曰五丁開山處予感其事爲賦長句

我誦青蓮蜀道詩浩歌縹緲仙風吹我登蜀山千萬仞青天尺咫浮雲垂屨屨最
風不可數懼魂落膽慙攀躋朝循大麓暮陟頂馬蹄踏血輿徒悲妄思脫險就夷
曠百盤萬旋滋驚疑陡覺崩崖劈面立上絕雲磴旁無蹊輿人大呼捫壁下出坎

筠 心 堂 文 集

入宮臨危溪懸崖再斷得仄徑側身容足嗟傾欹怒猊跡象疊亂石澗泉咽澗沙
流漸漢源漾水僅涓滴一口可吸難盈卮行人蟻附涉水過穹巖上戴危累棋蒼
天一綫見明滅白日晝晦幽難窺千丁千步出戶牖迴看嶄絕山中歧斤癘斧跡若
可辨碎石亂下森矛鏃何人飛空斲山骨天旋雷動搖坤維僕夫爲我道往事五
丁開鑿誇神奇我聞秦女嫁蜀國途閒修蟒形夔踞壯士大開掣其尾巖窟石迸
山離披又聞羸氏計餌敵金牛溲勃愚堪嗤蜀王贖貨發力士剷除芳削爲平夷
當時譎計飾豔說流傳詭異成譚資太華竟等巨靈擘山勢直訝愚公移豈知造
化顯奇奧幽阻萬態無窮期想當混沌始創關洪鈞鼓鑄區崇庫此山陡峻絕蹊
徑特遺神力司鑪錘雷奔電奮丁女赴豐隆扇炭飛廉椎太乙下攝百靈走媧皇
喘汗夸娥馳饜風怪雨助號怒雲根石髓紛支離後來翦伐繼人力縋幽鑿險茲
焉施况乃暴恣若秦政醉飽豈慮形民疲長城北築拓地表會稽東鶩窮海涓役
徒殿屎旋潰叛頑石亦受鞭與箠三山神山在何許童男童女空歲時區區茲山
置臥榻何難叱咤成莊趙宰割已覺並中夏開鑿奚止雄西陲當年諛媚貢詭語

詩

五丁力士嗟爲誰，方今皇圖鞏燕朝。
撫綏西顧周崦嵫，山川依然設地險。
仁義豈復勞鞭笞，門閭中外罷偵候。
山靈面內朝京師，我時奉使歷舊蹟。
攬奇懷古生遐思，河山豈爲助蠻觸。
秦蜀空笑爭雄雌，舊聞聊述作譚柄。
長言寄興供解頤，曲終上馬去復去。
颯颯衣帽吹涼颼。

同州早春郊行

平蕪澹晴旭，遙隴凝朝煙。
宿幹吐新條，麥穎弄清妍。
簞笠聚三五，嫩草除新阡。
邨墟靜，煙火桃杏抽葩鮮。
感物固偶爾，觀化爲怡然。
行役未云久，流光如奔川。

試竣示同州諸生

馮翊古勝蹟，彬彬此青矜。
章逢稱法服，言行先王箴。
讀書不務實，樵牧譏纓簪。
愛敬性所鍾，罔極思恩深。
鞞棠棣華，絲絲葛藟心。
枝葉藉以芘，斧斤毋相尋。
鄉風肅齒讓，觴豆無犯侵。
廉隅重砥礪，名節古所欽。
以此重芳脩，無愧儒雅林。
經學探

探要旨義理滌凡襟文章固淹雅行誼抒悵忱時光東逝波好愛分寸陰天與我
精力聖賢固所任青春枉棄擲白首徒悲吟勉哉共無斃振作方自今

銀夏渡河

沙磧靈州路臨流見素潯河聲寧夏壯山色賀蘭高地迴煙浮樹天空日麗皋平
生山水興隔岸喚輕舸
村落平蕪遠人煙野色青衆岸連絕漠一水護孤城墟邑饒生計奮奮勸力耕鄉
心頻觸撥卻忘朔方行

賀蘭山寧夏城西

黃河北挾群山馳賀蘭崑崙奔熊羆榮青綠白不可狀太古雪色明朝曠天風吹
凍山骨裂下見古樹垂嶽嶺西距番部不百里屹立外戶爲藩籬朔方築城古設
險匈奴右臂茲拘麻漢唐以後議邊備受降城下牽荒陲元昊豎子頗猖獗敢窺
宋塞逞睥睨梟好埋骨山靈怒至今樵牧睡且噉元昊葬此山興亡閱盡青山老瘳

詩

詩

一一一

光野火徒紛披

皇圖清晏靜斥埃一家中外咸恬熙使節西來一俯仰地靈欲向詢英奇

西涼除夕

旅况驚時序光陰感歲華邊風來地表蠟思又天涯酒醒鄉心遠詩成燭影斜
涼有春色可到寓公家

韶傳經年迫羈愁向晚增鬢華添曉雪鄉夢託孤燈解憶憐兒女柑擘慰友朋來
朝心戀 闕冠佩記晨興

永昌西風竟日

捲地西風撲面來永昌城外聽喧嘩玉關春信遲聞笛時新正九日鐵甲秋聲訝吼
雷萬斛塵昏欺白日千峰雪色變黃埃行人莫唱伊涼曲無限邊聲已路隈
絕漠征塵滿客衣那堪蕭瑟更寒威焉支古塞迷沙磧老上荒庭失落暉山色西
來增蒼莽河聲東下聽依稀驃姚戰壘頻相問惟有長空敗葉飛

墮地殘鴉凍不鳴，蕭森萬樹迸寒聲。
斷雲黓黑軍于塞，黯日昏黃寶氏城。
弱水作波春淼漫，天山飛雪夜縱橫。
倉皇僕馬愁相失，細辨鬚眉一笑生。
邊關閱盡首頻搔，塞上長歌輿轉豪。
夢斷鄉心餘繚紲，鍊成詩骨伴蕭條。
斷裘亦解迎星使，郵落相攜看節旄。
却羨文風被荒徼，征貂蓬轉敢辭勞。

甘州校射

射圃甘泉近，城隅止數弓。
禿襟看健者，投筆卽元戎。
怒馬盤空出，鳴鴟破的工。
願將好身手，禦侮壯邊功。

張掖郊行

南峯鬱深蔚，北嶺森嵯峨。
平川得廣路，夷曠無坡陀。
涓涓甘泉流，悠悠弄微波。
沙石漱細溜，泉岸旋洄渦。
白日暖春晝，輕風動巖阿。
邨煙出土舍，負戴行相過。
回番雜部落，蹠裘比紉羅。
地利苦磽确，生計將如何。
我行采風謠，民氣恬以和。
衣食願霑足，禮教相漸摩。
撫茲重歎息，攬轡爲浩歌。

詩

肅州試院作

詩

酒泉古邊郡土風亦清嘉我來正春半生意初萌芽禽語話清晝老樹含新花青
矜聚鉛槧布席交橫斜沈漏闌魚鑰隱語墮蜂衙揮毫掃春葉搗藻抒春葩憶余
童試初非角垂髮髮秋風數北渡千里乘枯槎壯歲、明光宮

天語聽宣麻蜻劫上朝旭繭紙披晴霞廣場衆佛選大羅羣仙家新章聽雅頌妙
驚驚龍地霓裳倅聆曲藥榜添榮芬中秘書可讀文枋

恩頻加風檐劇甘苦月日虞外差廷尉得賈生國士誠堪誇琢玉勤礪錯披金出
泥沙願言媚學子佩實兼銜華敦行務植基學術勤梳爬智珠擴古籍心鏡毋塵
遮誠僞辨出入義路嚴回邪行遠始跬步絕境無幽遐踰驥驥之徒大水豈無涯
生材不擇地邊塞誰疵瑕劫哉愛春光期許情常賒

酒泉贈蓋星僕前輩

芳塵步蓬島仙譜聯霓裳乘輅空回西復此親休光蚤歲 明光宮奏賦聲琳瑯

春波沛通潮嘉澗滋南完

全曾在澄邁令

甘棠正陰蔚慈竹傷繁霜我借諸童叟臥轍徒張

俚謁選上計部人海相徜徉捧檄西作宰錄別情徬徨自從一揮手八載乖參商

河朔春樹青隴首秋雲長况復人事牽萍梗飄江鄉烹鯉不得書候雁遲南翔比

來奉秦使姓字詢芬芳嘖嘖賢刺史峨峨縮金章酒泉古邊郡凋剝鄰西羌中原

此扼塞繁劇滋疲厄往者登帑緡羅粟資軍餽儲備既耗竭敵政如秕糠苛虐去

害馬芻牧無墳羊轉輓得饒邑休息蘇舊傷救養漸淪浹訟獄欣平康水澄山日

適滯遠

此志誰能量令德勉無斃宏謨邇揚我來持鉛槧握手登琴堂舊雨慰

離索清風襲馨香兼旬別仍從梁月遙相望天涯恣遠遊知己何茫茫願言公宰

各努力及此乘春陽 盛時正需彥翹首看騰驥

肅州竣事東行途次有作

雲容卷晴空春光在原野風煙染淺黛林旭散微緒邊氣戀餘寒傲貂不可捨丁
役西復東流光付與馬

詩

詩

一一六

春仲由肅州取道西寧復經甘涼故道至蘭州

途閒得詩二十首

來往邊關道風光瞥眼新輕烟千隴活細溜半渠春薄暖催耕近初晴脫絮纒纒
絲閒指點邨落記前津

小沼多清意寒柯有碧條鳥喧暖樹人影聚春橋雪澤田家訊風光客路饒欣
欣觀化意不覺馬蹄遙

黑水春流潤天山雪化膏清波圍舍近嘉樹繞隄高甘肅二州水何積渠可及引連積得資灌溉雲插周

千蹕霜吐長半笛漫言砂磧地滲滿亦神臬

幾度春風急東臬有犢聲馬蹄黏雪壞人語趁春晴汲甕提攜出耕犁僮僕行前
邨憑眺望煙樹一川平

林寺層沙阜清池半畝開蕭條遺碧瓦寂寞伴黃埃古道通邊徼淒風上佛臺卻
憐僧眼碧闌世付塵灰

筠 心 堂 文 集

勝國分藩地甘泉作鎮州祗今遺玉輦不復問金甌

甘州魏戎署前明蕭藩始封之地尚有甌存

甲第

樓臺迴名園水木幽將軍留飲處春思爲寒留

齊總戎儀招飲方值春寒木竟游覽

卻過焉支地風沙石峽狂衆峰圍翠嶺一徑扼邊荒峻坂羊腸曲繞關虎翼張版輿今億萬不問資融鄉

九十春深後淒淒見雪花餘寒欺絮袖飛霰入窗紗節物臨邊改光陰遠道賒山

中頻問訊三白歲豐誇

地以山中得雪夏資灌溉占豐

一水中分處諸峰北走雄

永昌以西弱水黑河皆西流東則東流此

山脊也 峽雲棲驛路斜口送溪風隘塞重重壯溝涂處處通邊山群拱北憑眺九涼

空

客路初聞雁重來有故人相門傳綬冕邊吏出風塵

武威梁大令錢唐文莊相嗣孫

勝會冠裳

集芳尊笑語親

堪觀容立亭應麟戎監大令署中

將軍勞餽馬髀肉本儒臣

總戎馮余良馬卻不受

古浪千山裏森森峽路長虬蟠峰向背螺轉徑微茫白日懸崖壁晴空照雪光低

詩

一一七

筠 心 堂 文 集

詩

一一八

徊關隘地來往亦康莊

深山閉春色三月無鶯花歎仄荒巖路蕭條野老家細流穿雪澗崖樹倚雲斜驛
路郵亭報暝煙歸夕鴉

小隊郊行處山河間鎮羌歸雲戀巖壑晴雪滿陂塘生聚鄰番部煙蕪有牧場地
形仍設險千古重邊疆

曉出平番郭霏霽幕煙水痕侵路細雲影落溪鮮谷轉幽藏日峰多翠接天盤
輿正西望青海浩無垠

蒼然西去路杳緝見冰溝古洞陰疑雨穹崖氣欲秋迴旋風掠耳孤迴日當頭絕
壁森霜雪千年化碧流

亭墩西羌間峰腰臥古城虎牙堆石峻雄堞與雲平一徑青天上千峯翠壁橫龍
駒儻可索青海舊知名

微雨金城路新晴曉氣鮮地蒸雲縷活山淨日華妍煙樹森長夏山花憶隔年春
光容易老于役正悽然

峽轉驚濤壯東流走塞河平生頻濟渡此地復經過地東金湯險舟聯鐵鏢多孤
城山萬仞疑譜白雲歌

羌番鄰部落作鎮有蘭州鼓角諸部壯山河百戰收將軍勞燹伐遺像肅兜鍪

城西有阿文成公祠喜歷邊城路烽煙靖戍樓南郭闌近諸峯倚碧霄懸泉爭石竇紆徑抱

山腰煙火孤城聚荒祠半嶺遙登臨聊縱日閒趣羨討樵

湟中使署鴻雪軒那繹堂尙書題額也賦此以

贈

乘傳西羌歷鄯州夸虜彝鼎雜歌謳何人卜築班超壘有客高吟謝眺樓隴首看

雲依碧落槐眉呼月伴清秋泥痕絮影真無定回首遑波勝跡留

闕苑瑠條蔭紫芝巢痕雲護最高枝風苞五色新羽毛鵠印

三朝舊鼎彝未必邊陲勞士馬卻教部落識光儀羌風朔雪供籌筆閒愛飛翰戲

墨池

詩

詩

三〇

家學韜鈴衆所尊，登壇巾扇亦清溫。奇文合檢庚丁秘，妙策何勞戊己屯。作督八州春共滿，清吟半榻月無痕。旅懷遺興憑揮灑，覘首他年欲並論。仙籍蓬壺許步塵，天涯萍梗亦前因。佳詩萬手傳鈔舊，妙筆三椽脫穎新。事業夔龍身健在，生涯儒素口譚頻。滄河東下龍門近，可許乘槎一問津。

題獨絃吟詩彙後

錦瑟怨如何，悽絃賦素娥。百年憐伉儷，卅首贈悲歌。雖鳳清聲在，離鸞舊恨多。黃門哀豔句，手澤重摩挲。

雙烈篇

會寧張某妻范氏以吞苦杏殉夫死，其媿和氏亦然，作雙烈詩。

正氣存巾幗，貞名重瑾瑜。推心甘殉死，齋志竟捐軀。碧玉香魂斷，青天血淚枯。年年紅杏節，行路痛雙妹。

忍見卷簾秀，愁看杏子黃。一門棠棣恨，千古蕙薇香。

國典褒貞烈家聲嗣顯駁採風來隴右彤史把芬芳

春波洗研圖爲除星谿都督題

牙蘂高撐渤海雲如椽籙筆矯妖氣只今曲水春波賦洗研池頭憶右軍

尺五莊宴集次聶蓉峰前輩韻

城闌尋小集野色對芳卮弱柳青圍榻滑波綠到池清光供客醉涼意聽蟬知
慷慨心趣陶陶向晚時

肯負同心約難辭入手卮酒杯浮樹色人影落荷池騁駿多新句盟鷗感舊知

勤圖繪意泥爪記他時

同人
爲圖

曾賓谷前輩招同人李氏園看花卽席賦此

寒雨暗長晝微煙護園芳招邀命儔侶選勝酬春光入門得仄徑夾路森修廊
白步劇幽邃數弓綠垣牆覆簷出部婁拳石羅琳琅苔痕綴點點樹影搖蒼蒼
楹屋

詩

如漁舟位置花中央窗牖見窈窕几席圍清香海棠繁英桃李妍新妝清趣愜
笑語幽芬人壺觴此園孫若李歲月經滄桑不見種花人攬古空徬徨吾儕寄所
託取樂原無常春花自開落榮悴堪兩忘引杯且盡醉道與多清狂吟賞不覺晚
林表餘斜陽

題顧瀕洲竹趣圖小影

南無前
輩弟

吳雲隔川路燕月思容暉誰從煙水中圖此泉石姿翠篠束千个枝葉紛一威蕤涼
痕浸寒水碧影搖蘿衣掃石寫玉筋君工篆移榻彈金徽高風憂清籟滴露明朝
曠哲兄感離別寤寐親鬚眉芳節各自葆老幹遙相依古梅寒待開菖蒲花已肥
我家水竹居遠在南天涯伯氏廿載別旅雁何時歸攬圖發長嘯愧續棠華詩

殘詩感舊圖爲王南陔中丞

紹蘭

作次朱文正

公韻

驛路風篁碧僧寮石磴青煙去留翰墨神物讓簪冠英蕩掄才節瓊杓弼帝星鄂

不有佳話文正接兄行
君園中學案鄭重紀途經絕學千秋闇孤燈一炬青高文會粉黛衆響息
盆鉢物望爲霖歲公名戴斗星畫圖增氣誼衣鉢重傳經

題潘星齋絳廷昆季月底修簫圖

一曲參差月在空埭篋琴瑟共冲蝠家聲舊冠裳譜會聽鈞天謁 帝宮

題張南山郡丞維屏黃梅拯溺圖

匡濟歸儒者民生繫幸官曾逢漢流潰誰宅澤中安激水魚龍怒浮家雁鷺寒救
荒豈無策漫笑手援難

片葦乘流楫兼旬望救聲爲憐萬人命奚止一官輕區畫危時審安全定後驚黃
州有詩句半作雁鴻鳴

題沈飴原宮詹郊君圖

崇林茂脩柯澄瀟瀟煙濺作賦嗣郊居信美乃吾土結廬傍洄流啓軒面林塢南

詩

一三四

榮茂琴書東臬眺農圃青青原上苗泛泛波閒櫓菘蒲冷寒煙蟹稻豐秋渚小別

林泉廬會振 承明羽新

恩冠華蓋宿夢繞田墅繼繼盼南雲寂寞聆夜雨聊寄蕪鱸思擬竟漁樵侶攬圖
意縈紆心跡共相許

題查九峰西陲轉饗圖

得失何須悟塞翁邊風闕取共飄蓬功成漫訝歸裝疾隴月秋雲照案中

天山百捷陣雲深士馬歡騰凱唱音共道蕭何能轉餉幾曾陸賈載兼金

題譚康侯民部 敬昭 遺照

清臞而長軒且昂自從膠庠遊 天閭榮無宿糧歌琅琅有詩在口酒在觴權杖
呀肝肺生幽香得句大笑驚清狂吏卒醉呼聞隔牆搔頭不語天蒼蒼誰從粉署
圖仙郎織冠長裾聊時裝豈知大隱惟朝廊俯視華賞猶批樓頰毫難寫冰雪腸
百年大夢真堂堂一編可許留遺芳

和黃霽青太守見懷原韻

重披簡牘訝髯蘇，醉墨縱橫態不殊。
好憶西湖美景嶺，南曾似武林無
文章舊價擬韓蘇，嶺海知名豈昔殊。
峽雨衡雲今古共，風流莫道眼中無。

南屏山館倒屠蘇

嘉慶庚辰君守信州余南旋酌別於此山館署中別業也

一醉何知世路殊，卻恐狂譚嫌惡客。梅

關十載一詩無

便應投老伴樵蘇，豈意

天恩眷特殊，重掃巢痕懷舊侶。好詩清絕似君無。

哭兄

鶴原淒悲風雁聲，咽南湓凶音海上來。
開緘淚如縷，少兄十四年依依可歷數。
四十餘年中，僅爾半相聚。生離已足悲，死別尤更苦。
手足竟塗人，微名究何補。少壯事遠遊，吾兄輒沮之。
黯然謂予季，富貴徒爾爲。人生貴適意，行樂能幾時。

詩

集 文 堂 心 筠

詩

一三六

鴻逢兄志嚇鼠誠予癡豈如林泉中慰此聚首思悔不從兄言哀哀終古辭
子少六七齡從兄赴鄰塾飲食藉調護衣被數翻覆夜來風雨惡颺母攫前屋吾
兄負之趨昏黑困淋沐水深無津梁寸步躡溝澗有兄弟不死有弟兄不獨踉蹌
扶病歸相向嚴慈哭悵然悲往事灑淚痛心腹

往予十四五隨兄試童軍前茅屢並列人目機與雲譽榜偕兄登頓宮采香芹予
弱兄已壯提攜多欣欣渡海赴大比追隨千里勤舊事今已矣分飛痛難論

吾生歎飄蓬十載客京國嚴親七旬餘扶持賴兄力寒家罄罄瓶往往詘衣食嗟
予痛鮮民有兄供子職白首仍仇讎奚以報兄德子弟事未能悲來填胸臆

少年侍慈病醫藥兄所知治療極勞勤予惟繞牀啼歲君患氣滯口吮兄不辭嗟
余復何狀慘惻何堪追今日兄長逝含斂不一窺平生嗟跼老飲恨無窮期

吾兄穎敏姿下筆千言富書畫既兼長醫卜况神授餘技及雕刻斤削娛長畫木
石羅几窗人物雜岩岫箏笛製能工絲竹時競奏爲憶瑣箎聲人琴增心疚

兄年踰七十神明喜康強靈靈保桑榆景風雨歸對牀胡爲忽庵逝無病尤堪傷

兄赴周表親家
食頃箸落而逝

醫巫復何及藥餌苦未嘗朝露果易晞電光倏靡常大運終已矣何

從問蒼蒼兄子悲早亡節婦以烈殉莞莞之兒女衷腸割寸刃嗟余羈薄宦有子

遣省訊豈知復云殂痛哭兄臨殯

丙戌秋遣長子鑾歸代
省親竟以病歿於家

老大傷懷抱百憂積疾灰人

非金石壽百年嗟易盡

闕服予北行涕泣與兄別休官予南歸瓊海仍阻絕一別十六周此生竟永訣鄰

家有昆季皓首共怡悅踽踽予何辜戚戚歎推折漬淚誌哀思寒風夜嗚咽

送家斗峰同年南歸

明簪京邑盛同選又逢君嗜古貧非病搜奇老更勤異書譚禹貢創解注義文此

去臯比擁無爲騁異聞

題劉柏鄰印譜

天雨粟鬼夜哭成句獵獵灑灑灼燿燿字青石赤不可讀俗工眩管手瑟縮阿誰干

詩

詩

一三八

榻撐腸腹雕精鏤魄思翬翬蟲鳥蟠結變繆曲厓階逸斯孕澁澁銀語劇泥銅
玉壘疊几案堆拳石品風臥榻背叶燭撫絃潑墨自蹠蹠君黃鼓琴勸君等刀憤藏
樸母令風雨攬老屋

題朱海谷前輩堦陰膏雨圖

嶺海嚴疆壯高廉古郡開地憐湖劫甚人望召郇來翻鳳樓蓬觀鳴廳重柏臺絲
綸昭簡在霖雨濟時才

移節從閩海鯨波靜不揚觀山高州山名冠剖璞珠浦夜還光蔭隔蟠根大對衢
玉醴香雷瓊來往路遺愛繪桐鄉

題竹溪試研圖

篔簹萬个籠炎暖寒碧空翠侵人衣廣文先生據磐石科頭兀坐忘朝饑雲影泉
聲落戶牖錦繡繹軼羅左右古瓦何年木蝕餘寶氣森森新入手當年百丈筇危
臺魚鱗萬疊晨烹開塗袞詭譎那可道澄泥百汰成奇材閱世興亡憶歌舞飄零

寂寞飽風雨，薜斑苔秀原。草蕪精光夜，作秋螢聚何人好？
工研搜紫雲，端石難與壽新泉。一沸寶光溢，古癖一旋清。香浮君不見，千年銅駝臥荆棘。
百仞金人終踣躓，古人恣睢劇可笑。此瓦區區況堦墮，傳銘曾識南宮藏。
瓦背有宋元章銘某年日月驚滄桑，魯鼎何從核疑似。鄴識更與精推詳，我生磨鐵尙如故。
往往臨池學垂露，多君古物供摩挲。竹石煙雲共朝暮。

題丁筠浦授經圖

五家漢學傳丁公，誰其嗣者爲公宗。堂構相承闢扇鑄，奮翫圖豐禾稷我聞榮。
郁有著述駿吉繼，業時所崇中壘有子亦濟美。賈逵受書方童沖，多君此圖得至樂。
珍休桐縹帙光簾，槐婉樂青衣手一卷琅琅振玉聲。摩空人生有子萬事足，況乃世業尊彝鐘明經高位。此可致茲金奚必遺財豐。

讀鄧篔山先生名宦錄題後

青峰湖上秀靈鍾，先生德州浮梁人早向閩關叩理宗。集著懋亭文字富，還將胞與拓心胸。

詩

詩

一四〇

秦中宦蹟人聲歌楚蜀輿情共飲和到處桐鄉遺愛永一輪明月照人多
誰將尸祝紀新編輿論千秋信史傳丹荔黃蕉同仰止溪毛長薦萬家禔

石門江行

葦蒲獵獵作秋聲盡日濃陰倦旅情煙樹遠迷孤棹轉半林紅葉隔溪明
雨斜風細又前溪渺渺新橋拍岸低秋穫人忙蠶已熟柘陰濃碧尙垂隄
襟吳帶越古雄關往事煙雲付等閒郵落即今豐蟹稻墟煙漁火過前灣

連陽秋凱圖爲管椒軒都轉題

衝粵陰霾蹙跳梁付燼灰將軍誰勝算幕府有奇材凱唱秋山笈甲懽聲夜吼雷論
功頻晉爵圖繪擬雲臺

吳舜華孝子遺冊爲其孫杏舒墨客題

一掬泉魚淚窮途負骨時
舜華實粵海上
舜父骨供母養
白雲天共遠黃海暮生悲慘澹龍賓術經

營馬鬣資松滋仍世守煙靄鬱孫枝

題湯雨生都督令慈楊太淑人吟釵圖

笄磨玉碎歎休休手澤悲酸往事悠歲月關山無盡淚那堪重疊憶從頭
忠孝流馨聚德門吟圖更頌壺儀存漫誇風雅千篇和難報春暉一寸溫

題富海颿中丞松陰補讀圖

蒼虬吟清騰碧陰落岩曲空林悄群籟書聲出幽篴盤陀坐偉人瀟灑脫巾輻凝
思洞元妙沈慮在簡牘編昔登文壇詞泉湧萬斛天質既穎邁儒宗况陶淑

公受業故

相王文瑞公又由申敬亭侍郎門

蜚英甲科譽釋褐寅清勗三禮杜陵賦五車臣朔屋芸編盛纒細

容臺典繁縟久知卓犖觀深鄙章句俗况復匡濟猷經術佐辰告閩黔並楚越屢
擁高牙纓可體契前修清風激貪竇一卷方自持羣生此錫福何必未見書待補
舊時讀豈知一編中不厭百回復聖賢所詔告義蘊瞻芬馥往往尋常言妙理試

詩

翻覆三百詩可蔽。畫易已足史百家。言江海滙羣瀆見淺與見深引伸可類
觸陳編雖筌蹄理趣出精熟。心白日光闇室孤燈煜拭拂澄古鑑洗刷快新沐
豈惟勤可補實爲德所畜。津津趣有餘拳拳膺斯服不然笑斲輪肯自圖捫燭昔
賢汲古功畢生思純。習作賦簡札隨帶經樵牧屬愛書復愛松卽景偶寓目撫此
味醞醞伴我聲。謾攬圖得深致雅興共瞻矚永保歲寒姿行著名臣錄

十二月八日查賑秦州舟泊繁汊

臘八行糜叻佛家餘糧豆麥雜胡麻。豈知乞食城中路半是哀鳴怨語譁

賑撫江北由繁汊晚泊楊家莊贈王竹樓大令

並示同事諸君

雲水蒼茫一棹過。遠天如夢奈愁何。江濤路渺寒潮急。村落煙微敗屋多。豈有長
牙蘇衆困能救。瀕死沐

恩波斜陽極目迷離處鴻鴈聲又隔河

枯樹荒村此地過淒涼風景更如何頽牆埋雪炊烟斷小艇衝寒破絮多爲惜芸
生依澤國慙無長策障江波頻將宣洩咨賢令匯海曾經議導河

下河州縣衆水由興鹽歸海余曾建議疏

引今與王竹樓大令議修白駒天起各開以資宣洩庶少水患

甕牖柴扉逐戶過時抽查妨奸爭奈救饑何早知教化凌夷甚敢怪輿情詭詐多

比伍若行周禮法滄溝能禦陸沈波料民自歎諸君拙更類投膠止濁河

蕭條城郭乍經過卻爲瘡痍幸若何百萬泉刀民命賴一夫饑溺

聖恩多謀安南國嗽鴻宅爲激西江轍鮪波更祝陽和新歲近綏豐吉語滿關河

張船山前輩畫冊楊子堅上舍 鑄題

墨痕偶爾傳真蹟青眼高歌賞軼才千里峨眉山上月流隨江水照君來

題陳碩士侍郎二百三十三士亭圖

攬奇漫說海隅偏遺韻猶當繼昔賢雅愛雲根聚靈秀好修月斧就方圓百年文

詩

物存風節一片韓陵結勝緣莫訝歸裝圖畫重袖中嘉話豔林泉

詩

一四四

題陳芝楣方伯 鑾 棠芝圖

炳靈江漢鍾殊祥天教草木生輝光翊館况復兆嘉瑞奇花瑤井迎仙郎憶余知

君三十載當時罷罷聯名場已科余諡君於陳閣中冰姿玉立見仙骨霜鋒雪鏘驚文芒慙余

先鳴復何用知君屢躋神寶揚江湖渺渺斷首耗姓字耿耿銘心藏十載之後客

邪水聞君捷音喜欲狂謬擬君第與余合適符名次羣驚惶笑余臆斷復何謂毋

乃標榜相揄揚邇年武林共宦跡湖山聯袂相迴翔芝蘭訂交夙緣在棠棣同譜

增芬芳君從元其山與余鄉會同年藩翰須才應世瑞楨幹國器徵人望出圖示我重離索祝君

德業方輝煌造物生材意有在豈徒韻事誇文章科第拾芥亦偶爾名節樹木毋

相忘甘棠作歌貯盈耳靈葩兆吉非尋常攬圖千篇盛文藻慙余秃筆徒軒昂

七月十六張家口渡黃河

莽莽沙隄望呼舟又渡河南來方息轍北去訝飛梭舟楫原期用風煙但覺多
聖明何以報未敢借蹉跎

憶昔分巡日脩防吏勸蓄魚龍驕未懾鴻鴈聽增哀三策徒思買千金孰識隗

余有下河水利三論張益興化詩皆與上竹樓大命言王徒薪非上客誰是濟時才
其以爲可行王樞與化術張氏治與借上游少一證者

兩漸羅山海魚鹽益度支未能裁冒濫奚以贍分私省費財斯裕德奢習易移
漫言桑孔術徒爾斲刀錐

陳臬闢民命刑章豈易任好生天地德禹汝聖人心化導愆無術哀矜感倍深還
憐諸父老惜別意難禁

吳越軍回首湖山感旅情

聖恩遷執法時公大理寺少卿內召臣職愧持平宦跡琴書共關河歲月更瞻雲心戀 闕

旦夕計郵程

詩

詩

一四六

四月于役黃梅出城口占

冠蓋相從郭外煙，榜人催上渡頭船。
萬家閭閻餘生聚，十里帆檣尙管絃。
信美江城眞畫裏，放晴天氣是詩緣。
扁舟漫道登遊覽，可爲宣防冀障川。

迷離煙樹俯江皋，鄂渚山川氣自豪。
有句且題黃雀後，好詩相對白雲高。
漫推奇蹟談風月，誰濟時艱屬俊髦。
南紀祗今資保聚，忍聽中澤賦鴻嗷。

丙申夏周閱漢隄舟次蚌湖阻風

乘旬周歷困炎暄，挂席眞如不動旂。
曉日遠驚豚浪赤，暮雲浪壓蚌湖昏。
千山怒嘯增潮勢，百里掀騰失漲痕。
却喜陸陸尙無恙，未妨行旅滯江村。

夏至日蚌湖舟中喜雨

周巡月半值液台，揮汗衣纓自土埃。
水氣聞腥宸澤竭，雷聲送雨壓山來。
喜聞春揭天工助，俗傳作曉得雨尤爲鞏固更羨蛟螭愿氣摧。
所發各竭因旱致蝗遇雨應息起舞舟中歡達旦，遙知農畝

氣佳哉

蚌湖卽事與潛江楊宰

蚌湖停棹水如天前宰遺蹤衆口傳

陳士諤司馬前宰此邑係巴東今利縣

千丈虹隄資保障一方雁

戶慶安全從知兌悅忘勞義始信咸孚佚道賢隄說更聞經畫善

楊宰著隄說等篇

風流

相望楚江邊

漢神廟落成紀事

漢水出秦嶓冢山漢中郡廟祀焉東趨滄浪經緯三楚利賴孔長乃廟祀弗
崇誠闕事也某白大府建廟郢城道光十有六年五月落成適某閱隄至此
率屬奉祀將以妥靈而佑民也詩以紀之

幡冢連雲峙秀雄靈源西導衆川通東流漸滙秦關大南紀攸瞻楚望同雲雨百
靈資潤澤波濤三澨仰沖瀨精禋尙闕浮沈禮爲補熊封廟貌崇

詩

詩

一四八

翬革崔壯殿楹冕旒瞻視肅虛清朝宗既比三江列侯伯應從四瀆名祀典於
今崇德報恬波終古奠民生椒馨躬薦酬靈貺降鑒從茲福荃荊

漢延熹華山碑拓本次朱竹君先生韻爲梁茵

憐中丞題

華嶠巖巖竝嶽時赤文綠字難可磨瑩維一震石夜走楮本猶得供摩抄四明完

贖幸披覽

此本爲嚴徵阮雲臺
相國所藏後曾寫題

板華吟舫類相過

竹君先生齋名某與其
嗣少河友善數談及此

長垣一紙入王邸

前邱陳伯恭先生藏
長垣本後歸成邸

如鼎時足傳無訛書者蔡郭頗聚訟徐記洪釋互切劑集靈望僊

此所紀監掾市石何殊科遺文祀志攷酌祭古物石鼓尊白窠當昔建武禮從省
侯維安國銘可哦二千石主是秩望壇場共肅陳舞歌歆芳禮札民所悅吉祥肇
斂仍駢羅豐碑特紀延熹歲京兆欽若爰磨磋此碑焜赫照巖麓樵牧或被靈之
訶宜峙萬古通流湊金大神宅居同那夫何陵谷祕奇迹變遷歲月如流波僅傳

搢蠟自趙宋奚翅古樂聆雲和曾聞郭髯遶山史佐史裝製文無顏笥河主人號
精博什襲珠笈森峨峨羽人古異出僂骨毛女婉姬迥霜娥蓮華十丈開玉井影
落紙墨香痕多中丞嗜古富搜討對此據案欣摩厚千金市駿有奇癖傳觀衆口
咸呵呵古色斑駁壓萬碣墨痕光澤煩千螺名花供養僂彝鼎秘文璀璨同斗蠟
有田迄今盛歎識 國初諸老親婆娑寶閣堂增希世珎叙以古 唐墨初 恍憶登華
披煙蘿觀碑何湏匹馬駐移石奚用千牛馱點畫上追澤山石被礫卑眠家文
此本示我得古法如導尾宿探黃河公攜此冊歷柱筦精氣遠耀光自佗願公巨
筆摹百本南雲寄我情如何

梁芷隣中丞過鄂同人集黃崔樓中丞有句

間楊雪椒廉訪韻詩次韻奉和

久別重逢快此遭江亭秋聚俯銀濤鴻泥舊跡留仙駐鶴影新聲伴笛高出處襟
期雲共遠英雄名字浪難淘嶠帷南指仍登眺旄節爭看麗漢皋

詩

樓迴天空看鶴回江山如此舊追陪肯教詩筆經年閣莫漫郵籤計日催竹騎已
知迎桂管棠陰猶記詠蘇臺中和樂賦增莊句傾耳新篇北雁來

送梁芷林中丞撫粵西次程春海侍郎韻

志士經世期逸人功名薄趣向所歧分方員異柄鑿小儒震組圭大隱豈林壑夫
惟通方彥明志常澹泊庭趨竹林清學富芸簡博蓬山蚤回翔榕海謝羈絡十稔
賦冥鴻三年仍屈蠶

帝咨江淮最特畀封疆託桂筮亟撫綏苗蠻冀清廓勝地號驂鸞公行砥琴鶴佇
臚邊毗艱入告明光閣雲雷莫屯膏英俊與縻爵目公高隱者盍與究遠畧

長淮逼黃流浩浩滄溟東衛民與濟運隄堰圯防雄宣洩或非宜平陸洪濤中利
一而害百卓見無苟同公去麾馳騎民宅爲蛟宮爰秉青齊臬榛莽無伏戎江表
重屏藩蘇臺蕙清風美灰暫息羽匡濟情無窮此出爲蒼生昔退不言功

卅年海上山望塵許步輟捧檄闥門過欣讌祖席設楚江仍濫竽蠶嶠瞻特節公



集 文 堂 心 筠

行萬里餘隴雲水鳴咽霜蓬入鬢鬢浮萍感離別傾耳終席言洗心三伏熱英蕩
炎微驅驂篠黃童悅邊陲識天使勦伐勒雲岳咸欣祚席安何令舜堦微嗟我愧
素餐才力困疏拙馳驅慙良圖景行企前詰南雲鬱佳氣東旭照餘烈公題馬援
柱定有鴻泥雪作誦無清風拈韻闕時傑瓊章或報我能共梅花折

蔣丹林師童子釣遊圖次韻奉題二首

共仰雲光世所稀鱸尊信美不須歸新培國器門高大舊夢江鄉跡是非影寫鬚
眉看鶴骨神傳曙展映漁磯釣鼈巨手公門盛又見傳衣數款扉

漢源會歷記依稀漢出嫗家某奉使秦蜀經此

東下滄浪衆壑歸農畝祗知居有所宣防豈信計

多非邇日秦山盡鑿沙土流激血下游民爭水地故漢江漸淺且險隄防益難

金隄儻作迥瀾柱碕岸依然釣月磯更聽師言

徵博利雁鴻安集滿郊扉某任楚三年治水情形終歸善策語師詩善句倦懷梓里故次首及之

鄂中白雪亭懷古二首

鄂中才俊嗣離騷搖落知希祗自豪白雪誰傳千古調青山空對一亭高難期識

詩

詩

一五二

曲心同賞爲叩仙音首重搔傾耳祗徇人不見石城江畔浪滔滔

楚調昔聞歌白雪蘭臺况復賦雄風高才豈惜知音少譎諫還徵萬諷工舊井江山餘藻繪并在郡中荒亭景物半蒿蓬登臨更憶靈均蹟渺渺千秋悵望中

春雲

春雲戀曾阿杏藹去還復濃昏閤谷口空濛滂巖腹我行值連陰積雪照林麓繚白漾飛絮縈青窈幽木連巒或露現隔澗自追逐春風吹出山爲霖雨萬族舒卷亦何心長空送遠目

喜晴

層甍卷晴空白日照原野江臬媚暖景綠波淨如瀉秀草搖煙青林花映嵐縉麥浪既連畦菜花亦盈把遠村散雞豚熙熙弄春社

郊行

林青色明青隴春江蕩碧波桑煙圍舍近林旭散晴多啼鳥移鄰樹閒牛臥遠坡悠

然觀物意徒倚到芳柯

野望

東臯聊縱目風景曠相怡
遠水兼天淨閒雲度嶺遲
舊山餘繾綣投老厭奔馳
自笑耽吟興歸來有和辭

潛江勘閘隄工

不盡滄江日夜東
布帆孤棹碧波中
魚龍作窟天垂險
雁鷺浮家水接空
三楚孰資舟楫利
一竿遙憶釣絲風
維舟且爲籌筵竹
可恃金隄保障功

天門舟中

扁舟朝發動淩鴉
人望人居傍水涯
小艇柴門斜繫柳
短籬菜圃欲開花
難教澤國安鴻宅
儘擬開身付釣槎
老我風塵竟何益
鷗盟有約覓煙霞

詩

詩

一五四

題徐訪巖廉訪灘江話別圖

花朝發桂管綠水搖春波蒲帆下洞庭佳節方清和片石輕裝水程速使君已泊
江之陀相逢握手看須髮百語不盡離情多我昔逢君邗江溪皇華使節照江水
竭來典郡溟以南延謳黎頌傳梓里七閩五嶺紀壯遊巡方所至欣有鳩皖水

疇咨重淑問

宣室前席陳嘉猷灘江江水來皖江江水去三杯君莫辭七稔我重晤披圖賦詩
誌別離更崇德聲慰傾慕江流無盡知我情明月隨波到君處

送丁興齋同年傑歸滇二首

蕊榜同登再蓬山接席頻襟期孤月共詩酒卅年親遇寔名逾重官榮老更貧還
聞焚諫草秋興在盤蔬
慷慨論交重天涯手足看班曾聯玉筍誼更契金蘭老病憐君去狂疏爲我寬滇
雲南望處珍重慰加餐

皆大歡喜堂圖爲程春嵐廉訪銓題

閩海烟澄日正遲風光端爲使君怡庭花早報春消息恰是琴堂坐賞時

北堂謏草正春長南國顏繁發異香笑對鯉庭閒指點欲尋樂處已相忘

十分和氣藹沖蝠動植怡熙物我同尙恐盈襟春盎盎無言真趣畫難工

誰從榕海寫丰標移節荆江樂更饒芳艸堂前楚北泉生泉意滿待圖濃翠亭額補歌

諸

題韓銅士通守江上蒼茫獨立時圖

早歲乘槎入漢輕宰官名譽曠方成文章三峽驚濤壯心跡千潭映月清宦海幾

人看壁立江鄉有約泛舟行風波東去頗回首不盡滄茫望遠情

擊楫慙予鬢已斑多君高致水雲間寒深草閣鷗同夢笛遠高樓雀待還萬頃烟

波蒼莽外半生吟趣畫圖間垂竿正憶滄溟闊好共攜筇海上山余近作滄溟亭釣圖亦李生筆

觀我生圖爲羅茗香茂才士彬題

詩

詩

道通利萬物生生易所宗觀象之六三下上潛其中近則不爲國遠乃不爲童至
理妙密幾大道存虛虛徇人誦脂韋觀我惟昭融多君洞象數斯義能無嘗避年
肄保章絕學研精通文品曰儀鳳科名滯達鴻攬勝遼海北探奇會稽東邇來作
楚遊江上三秋風圭組聽時命筆咩爲尸饗行年屆知非寫圖託深衷嗟余愧鳴
鶴眊君猶負蛩相看輔頰毫照我冰雪胸易象理可悟占玩情所同還期泛滄溟
釣侶招鄰翁余有滄溟垂釣圖
又約君粵游故及

題朱容舫鄂渚望雲圖

幾度春風鄂渚煙歸原相對喜聯翩卻思子舍雲深處回首山陰路渺然
黃鶴西樓嘯詠初白雲依舊滿清虛豈知閣筆非雀句根觸鄉心爲倚闌

題陳碩士侍郎韜光步竹圖遺照

西湖汎綠波迤邐入古寺山光淨如拭篁陰碧在地風雅老宗匠呼僂曠幽思星

辰此盞簪冠纓况氣類非聲答泉明衫影濕岩翠我昔筮浙仕適公奉詔使尋幽
忘力疲對坐輒心醉文酒聯舊懽臭味親夙誼斯圖紀勝遊繫我已分轡流光速
傳郵清景縈夢寐更憶何水部謂何仙
槎尚書星節亦此至圖中四五人強牛列位次後
先互輝映離合頻憶記蘭亭感今昔興懷乃一致爲公發長吁攬圖悵箕踞

花間補讀圖爲朱久香司成 蘭題

忘士惜短晷古賢重分陰及茲芳菲節悠然觀物心玉堂有仙客文品珍璆琳昔
探長安春馬蹄驟駁駁綠草長瀛洲繁英滿瓊林尤喜未見書十載披魚鱗一編
入吾手幽芬襲清襟洎腹覺味永斗室如山深葶甲出生意浸灌成書淫邇來種
桃李公門多楚琛栽培得植幹臭味聯朋簪攬圖識鬚眉風度瞻惓惓君名重槐
市我意餘苔岑賞奇或相寄折梅來江潯

送鄧雪帆同年 應熊 致仕歸里

卅載蟾宮折桂枝穗城同詠大羅詩與君屈指攀仙籍相對蒼蒼感舊時

早歲分符向楚荆，循良到處共知名。孝昌此日留遺愛，何必高官戀宦情。
我來君已賦懸車，于役徒淹數載餘。漫說沈淪關氣運，同升愧乏薦賢書。
蕭條歸棹客衣單，松菊秋風興未闌。却笑杖頭無一物，舊山聊作買山看。
吏部文章作士師，謂區仁宰官仙侶愛襟期，謂何介峰張南山二同年歸來把臂君偕我，相訪羅浮賦好詩。

倚竹看山圖爲于蓮亭前輩克襄題

卅載京華話夙因，披圖喜晤頰毫真。年來玉筍森成束，回首蓬山第幾春。
萬疊黔山齊雨濃，蕭蕭楚竹拂和風。豈知宦跡清外許，卻在無言坐對中。
此君真不愧吾師，况對嵐光太古奇。虛靜由來參道妙，超超元旨更誰知。

題抱琴看鶴圖

香枝發清籟，有士憑盤陀。朱絃方在抱，仙侶來相過。羌無搏拊音，天廟咸韶和。
羌崑圓心俊，翮蒼穹摩縣解。悟成虧天地，忘網羅示我。寫生圖，遺我郢中歌。與君

聽玉笛危樓俯江波

戊戌長至閱視沌口入江水道議疏淪以分漢

流舟膠淖中舍而登陸用行到水窮處爲韻

詩以紀事並示同行楊蕉兩郡守周宜亭別

駕

大江王百谷浩浩趨東行細流本不擇元氣歸含宏汪洋漢廣波大別看奔騰滄浪暨三澨儼建屋上瓠生齒日以繁田廬繼且橫就下失其性搏激安能平何以澹沈蓄其咨爲民生

吾頌神禹功百川利疏導又聞賈讓策游波殺怒賦防川患大決滌源乃宅隴恬波由地行奔流終海到汚漢共朝宗衽席安倪旄慙無奠川能敢冀成功告

江漢滙流開涓涓惟沌水注江亦附庸去漢不尺咫議將施疏濬澄汰去泥滓尋

詩

詩

一六〇

源亟相度歸派得條理舟行漸平陸闊日不數里埋壅固使然春揭從此始
朔風動寒氣短景何忽忽邪許聽榜人泥楫難爲功屈指歲云暮雨雪虞休工轉
盼春水波坐使弱流壅予行雖云憊民事何由終蒿日語同人輟轉情何窮
筍輿暨暨行高下困沮洳夕陽上墟煙投宿更何處我本田間人蓬華固安豫耄
穉環聚觀絮語不肯去憫念脂輿膏違問祝且詛苟難拯阡危何以答黔庶竟夕
起攬衣徬徨常達曙

潛江閱河即事

風煙三澁渺津涯蘆伏河邊滯漢槎每向秋防愁瓠子擬占春汛問桃花排沙渡
名漫說桑滄改通順支河名難將竹箭誇疏淪祗今籌利導可能祗席到田家

涓口阻風

陰霾如暝晝難開孤棹迷離曲岸隈十尺鼃鼃噓水立一天雲霧壓江來寒增薄
絮蒙頭句醉倚萬歌入手杯老去未應吟興減關河風雨漫相摧

沌口舟中

長隄疎柳有人家，幾處柴門傍水斜。
髣髴防秋邗上景，八年回首又天涯。

召堞隄邊浪泊天，鐵牛灣下繫孤船。
驚心談虎當年事，夢醒西風倍悚然。
于辛卯觀
察江兩防

汎河
隱事

沙湖晚泊

蒼蒼暮色下江隈，半幅蒲帆向晚催。
隔岸漸聞人語雜，居民爭看長官來。

沙湖臨水雜人家，團圍口宵笑語譁。
共說鄰舟來漢上，今年米價賤堪除。

袁口登陸

郵落傳呼結隊迎，何勞着艾衆觀情。
使君已向風塵老，香案誰知舊吏名。

竹根灘有感

榆關城外憶征程，無定河邊奉使行。
予親學陝北
所經沙漢地誰道此閒同塞上，江聲寂寂白沙

詩

橫

詩

排沙渡

潛江城數里
沙厚成陸

渡頭一望間津涯隔岸微茫破艇斜陸徑未曾愁病涉可能疏浴學蘆沙

潛江曉發

輕煙澹澹霧遙山細雨斜風送客遠墟落曉雞聽斷續數聲柔櫓過前灣

多寶灣

多寶何從浪得名祇園孤閣隔江明輕舟儘被空回笑豈識豐年喜告成

彭市晚泊

歸鴉萬點暮煙生柔櫓聲聲雜雁鳴遙指浮家投宿處數星漁火隔溪明

賦

慕猗亭賦 有序

鄂解鹵偏橢圃數弓右十餘卷雙亭頽然頷甌墮塗葺存其一時竹百
个已生意矣以名斯亭匪敢希嫩衛武覲以蘧學自鍼焉因爲賦之

廳事之鹵雙亭倭篔簹飄搖而邪圯雜榛菅以蒙蹊三春艸長衆綠煙迷作者誰
氏穢焉不治予迺移屨傾楹搯筇類棚翳翳觀石劇壞規坪廢一以讓梅梢選一
以當蘿根執椽脂瓷實措實撐僅輪二輩斨斧無聲曾不崇朝吾亭適成爾迺縣
繚藩壘雲根榴條剔繁蒿光宛小山之嶸嶸出仄徑之婉婉召籟龍之百竿垂文
鳳以面軒甘夏雨之濯枝牽醉日之清魂走園丁以相諏矚碧筠之浮痕肇嘉名
以永好綴清景于小園山房尺咫亞蘭徒倚春昕秋澈風酣月美輕雲流天碧空
如水影濃翠以鬢歷節浮蒼而聳峙滴露葉之宵涼跼風枝而雲委疏花澹其照
灼瑤艸鄰其靄靡儻千畝而有餘肯一日而無此我所思兮淇園懷有斐兮君子

賦

一六四

謫夫會弁秀瑩圭璧金錫風矢弗諉雅肄戒抑監史是陳德隅是飭飲而悔過毫而學力絜彼美之芳躅諒提命以矜式懜番著以寄情與猗猗而比色爰類叩以興懷匪流連而自適懼不殖之牆面晞前修兮如隄爰爲歌曰瞻彼菜竹亭是麗兮我思古人景聖容兮又爲歌曰柯葉不改兮今古肯頌聲在昔兮民所型臧否自知兮祇茲亭

春霖賦

有序

疆圉作噩莫春三月余還自都河洛而南春潦方盛舟滯漢皋語云三日爲霖非時且病農也爰爲斯賦

繫余逃職朝京兮諏孟春以遣行歷河朔而懷寒兮黃塵乍起而鸚鳴闔兼旬之晴霽兮盼雪澤于春耕林岵色曠其曠燥兮衢埃滿乎衣纒泊上巳以來思兮見霏霏於都城經畿南以千里兮聆夜雷之訇訇喜澍潤于春膏兮謹聲聞乎農氓爾乃呼榜人以渡河兮記郵程于宛葉凍雨浙以飄灑兮斜風歛而獵獵陽光闔而

筠 心 堂 文 集

雲蒼兮雲氣紛其沓疊，嗟馬瘠而僕庸兮步泥淖而震懼，時宵征而暮驛兮嘆整
蹕而塞茶誰疲頓而余不悔兮，力共慶青疇之浹洽迺逶迤而南邁兮，記里屆乎
楚疆欣輿馬之息轍兮，棹花楫于荆襄擬掛席以釋勞兮，一葉穩于輕航羌風雨
其未息兮仍維繫傍徨布淒其飄石兮逢臆颯其清涼曉滑湧其霧塞兮夕瀟
浙于風檣望春疇之麥秀兮極遠日具蒼蒼際長天，碧色兮搖舄頃之青芒喜
吾農，有歲兮卜自天之降康胡淫潦之不節兮慮陰淫而萎黃况郢中之力作
兮亟畚揭于隄防役千夫於凍塗兮勞筋力其堪傷恐遲緩其不濟兮凜挑漲之
奔狂日殷憂而獨坐兮夜頻起而惶惶冀皇天之垂佑兮斂陰霾而不敷暄春煦
于芳隴兮扇和氣於豐稂爰披衣以染翰兮聊寄興而言長亂曰秋霖爲愁春霖
何尤損吾田疇吾何以休兮勞胡泥，逸胡流中鼙鼓召工曷禦奔洪兮肅時雨
若又時暘若憫茲民瘼愧吾涼德兮

賦

菊屏山賦 有序

一六六

瑤圃觀察官廨鹵偏有菊屏焉縱橫各仞趾廣崇銳厥象山矣觀察觴
詠於茲予爲之賦

秋景方澄秋光滿庭天沈寥而曠朗風瀟浙而淒清憐披靡於衆卉見璀璨之繁
英主人觴賓集菊而屏宛山形而髣髴極意匠之經營爾迺壓肆擔來編籬疊起
盜壘百層堦垣十咫萬葉堆成千花轟峙簇翠羅青圍紅錯紫綺雲黃稠繁星白
委香國花交錦城枝疊眩五色之紛紜雜九光之綺靡訝錦樹以屏高伴叢桂而
山擬時也森鳴短晷雲卷長空露團庭畔月皎天中音流塞雁咽寂寒蛩裏問階
之翠篠飄別院之丹楓主人乃命疇傍檻布席依叢暉交繡幕影徹銀缸濃聚衆
香之室光疑不夜之宮旣餐英而百朵儼滴酒之千鍾恣主賓之幽賞極歡宴之
未終賓乃作而稱曰夫物號千名情匪一致甘可調羹苦還類葢或藉獨疴或能
益氣或爲隱士之儔或倫仙人之餌延年鄴谷之泉獻壽慈恩之寺茲之地判低

昂品殊位置將香色之攸分抑功用之異類靡得而詳願申其義主人笑曰唯唯否否夫上士聞道齊物全天境何崇庫態何醜妍試與客研猶龍之旨紬夢蝶之編固將混美惡一憎憐等夷品彙穠秣跣蹄筌羌薰齋之異氣比蕭艾之同倫忘朝菌之之晦朔齊大椿之歲年極遊目於元覽任造物之自然悟曩脩之懸解謝俗士之拘牽客喜而退洗蓋敷筵予繹爲歌以終斯篇歌曰鬱鬱澗底松離離山上苗結根各有依奚論庠且喬矧茲傲霜枝所性謝塵蠹造物任適然元旨常超超又歌曰山苗固嘉種澗松乃奇質居高貴不危處下仍挺節佳色不自炫晚香匪時悅各葆栽培心素位行貞吉

著意屏山乃不泛作菊賦以齊物爲波瀾以素位爲歸宿庶幾麗則之遺自配

擬潘岳射雉賦 以題爲韻

伊羽族之蕃滋兮有名輩之綺靡緬華蟲之觀象兮名鶴鷄而號美每耿介以自

賦

雄兮時眊眊而翔止匪雲羅之可張兮避風繳而遽起充弋楮之何慕兮非扇翳之能擬爾具朱曦乍啓青陽載園綠蕪望遠碧浪痕寬桑田蘆翳麥隴彌漫草蒙茸以蔚蒼木莽茸以椽欒慮垂翼之未戾冀從禽之可歡或命侶而盱食亦凌晨而韻潘步焠光之旭景涉原壘而饜嫺時猶未覩原禽之矯翼也而預圖夫媒若翳之先安則有采隲霞明繡項錦濯翹展絕標翻斂翠駿勁匹隼鷲文如鸞鷲紛迴翱翔迅往還蹀躞龍鬚隱約鈎心鬥角義鳥乃出若鳴若啣若奔湍立如峙岳若卽而乍離疑眸眩而神眊非射雕之絕技豈貫蟲之可學於是望審心平神凝形釋廓彤窗以諦觀障齒葉而熟覩或往而迎或來而迫黃間徐以方張白羽瞥其若擲眺義媒之雙影始省括於一射霧卷風馳洞膝刷翻若夫願望懷疑竭來徙倚草動森逝形藏雲委若門若怯乍驚乍喜窺問向背商度遠邇相予而縈隨儼目覩而手揣擅能事於遊畋終譽命於射雉然而文采徒矜明哲多誤雌雄是司弋獵是務快彼盤游縱情騁鷺老氏之所不爲君子之所不慕豈若範我馳驅安吾履步誠機事與機心惟守眞而守素冀端操之不虧爰摛毫而作賦

敬勝怠賦

以莊敬日強至誠無息爲韻

厥德曰吉厥儀孔臧頌歌有恪謨戒無荒攝百骸兮順正崇一心兮齋莊盡德業
所務飭羌神聖而敦康儀昔尙父拜眉丹書對揚寶命洋洋著謨疊疊維敬箴機
銘孟單心謚性室个懋慎冕環凝正聖人所以帝天式臨而神明自鏡也敬德弗
疾意用自出匪斂而忮或盈而溢姤然若不足行儻乎如不終日視蔭而媮受賑
而泆額頽者遊媿媿者逸儼入主而出奴迺此得而彼失然而勝物爲剛自勝者
強齊不齊者以致潔懋而怒焉以有常性其情而情自正斂其肆即斂一方雖理
欲之倚伏砥操舍爲存亡惟屏驕而去泰迺洗心而泯藏諗夫郊壇歌饗假誰
肅敬學也斧環紛辭碎稷祗值敬位也躋垤則慄馭朽則懷敬志也火揚口垢水
修兒澤敬事也匪事曷不匪志曷萃敬位攸既敬司弗替昊鑒民喆弗渝弗戲怠
之泯敬之至也繇是滌瑕蕩穢保泰持盈妯晏之源滅醜粹之心牛懷乎履錯抑
平謙亨既憲憲而受祿迺穆穆而迓衡答三靈之蕃社綬億兆而叩成天人叶應

昭假一誠禱哉敬德恭壽垂聲粵稽象箸乾惕正美德隅欽明溫恭放唐孕虞日
躋而帝命式祗承而文命敷縉熙考訓待旦陳謨老臣禱首誥后都兪一敬相授
千載同符

聖天子撫九有奉三無凝庶蕃室虔鞏蘿圖愆勅乎時幾之旨優游乎道德之途
乾猷懿鑠兌澤涵濡微臣載筆效此蕤芻其詞曰維后綏猷曰維敬德背敬則怠
怠迺敬息而覆弗怠亦維敬克兢兢愴愴祇祇翼翼銘茲虔恭永錫爾極又曰敬
所域意所愿志攸節心攸職儼天人守密勅聖人篤恭君子內直曰寅曰恭曰順
帝則

竹鞭賦

以雨傾沙岸
竹鞭鞭爲韻

漠漠兮沙堤濛濛兮細雨驅馬兮東郊送人兮南浦金鞍騎去迷草色以如鉤玉
勒歸來縮柳條而似縷種檀欒之萬箇綠暗汀洲垂鼻娜之鞭青搖野鳩夫其
翦蒙牛畝芟茸萬莖千霄蔓連傍谷摺撐抱綠筇兮節勁迸青鞭兮心貞茂籜籜

筠 心 堂 文 集

兮密葉茁簞箒兮修莢莫不葳蕤遣興舊蔚移情隨雲拂牖移月依楹石磴紛披
對客之棋恰就茅檐左右賞春之酒頻傾此則竹枝之窈蔚而未睹夫鞭影之縱
橫若乃輕煙密雨澄水淺沙貓頭攢簇她跼橫斜憶錦綉兮春暮參玉版兮思餘
草長嘯腰茁蘚苔而迸裂泥鬆屐齒橫水石以槎枒釀春雨之番番剛抽舊節附
孤莖之寸寸漸放新芽於是玳瑁簪拋珊瑚節燦珠重星連金堅指僕纔揮軟玉
之梢乍韞玲瓏之幹幾度影投涓水欲斷清流儻教枝鼻華林真驚赭汗騎并州
之馬供綏策於平林化葛陂之龍振長筆於雲岸則有曲塢尋春幽園訪竹冒雨
拖筇遮雲采箴挈酒榼於山邨指鞭梢於茅屋燒筍而配花猪折簦驅而野犢藏
來離嫩露冷纖纖狂逐艸長徑穿簇簇春歸董澤雜蒲劍以迷離秋入薊田共蘆
鞭而反覆別有綠波送遠碧草傷離銀鞍悵望寶馬驕嘶執鞭而寫別寄竹素
以懷思楊柳絲長竝柔條而遠贈杏花羈羸挂短策以低垂亦復效壁州而遣句
望淇澳以噲詩無恙思君綠葉成陰之曰平安訊我韞鞭進筍之時要莫若古心
自策貞節堪傳貫四時而不改瘳一著以爭先勵凌霄之志願儼策蹇而周旋况

賦

當紫脫長生之世值竹葦受

德之年棲鳳叢生何事贈繞朝之策聞雞舞起誰當爭祖逖之鞭

調水符賦 以題爲韻

昔蘇玉局之籤判鳳翔也孽勝煙蘿遺懷雲嶠雅興風生高情月照厭案牘之勞
形歷仙潭而寄眺霞深石洞流玉女之潺湲月冷松扉叩山僧而吟嘯勾留大半
抽身雲水之間風味平分洗眼林泉之妙幾度芒屨蠟屐逢折簡以招邀何期水
誓山盟儼剖符爲徵調爾其石鏡泉明簾鉤月倚歲晚楓零人歸霧起咽玉液之
玲瓏獻靈根兮清泚階前汲井之人洞裏吹簫之子爽沁心脾寒侵齒牙大瓢貯
月澄宵斟酌之餘小勺分流春藝提攜之始惟予取而予求羌誰瑕而誰醫迺笠
屐之歸來倩瓶罍而挹彼茶鑪拭就憶兼度兮一方荷露濃時佇清冷兮十里况
鷓鴣之疑更實淄澠之難指竹鞭仗去何妨命彼奚奴柳筒將來安得信如符璽
卻憶留賓之處截得青筠幾同操券而償盟如白水觀其裁來勁節剖類堅瓠質

簪破碎翠碧縹糊刮摩左右挈量鐮鉢桐削圭而製古蓮刻漏以刑殊倚樹深山
頻聽郵籤之報披雲古徑何來竹使之趨忙到僧家瓶鉢傳喧之地涼生齋閣風
煙荷擔之途吟來流水月明前身合契恍覺清湍修竹此地同符彼夫製美金魚
形殊銀兔銅鑿堪珍誇癡誚誤或刻木以守防亦畫桃而永護向迺號召林泉馳
驅節轡擬丹印以封茶等金莖之承露白頭乞得流傳世學之間赤伏持來管領
煙霞之趣豈知象取虎龍詎若機忘鷗鷺翠瓶之智徒工抱甕之心可悟惟

秦運之平康欣棄緒於道路詩歌豈弟爭傳洞酌之篇言愧流泉願獻衛尊之賦

石攻玉賦

以他山之石可
以攻玉爲韻

士有砥行成器納誨陳歌躬持圭璧善謂觀摩蜚祥輝兮光藜鼎騰瑞采兮壯巖
阿比於玉則含章在我介如石而有耀自他以人治人貽我百朋之錫因物付物
取材一卷之多徒觀其虹光韞岫雉彩浮山靈精掩映符炳爛斑藟瑤華兮霧谷
吐瑤蕊兮燿髮也質含文脰渾醞醞晶霞暮靄瓊氣回環孕山骨之峻嶒光含五

賦

德護雲根而蜿蜒結貴重千鏤所以昭三采之玉而隆六瑞之頒然而自完太璞紵埋淑姿精英未剖攻錯俱施緇連戚之可貴或三刑而見疑雖兀瑤白珩未浣青蠅之點而荆璆魯瑤猶來臙鼠之嚙積巖嶽之鍾英韜光瑟彼俟磨礪於剖璞待買沽之則有氣結重巒形成峭石犖确浮青嶽崎隱碧野草烟深荒苔路牽點則乃以盤陀綴岩隈而絡繹藉磊磊之貞姿成熒熒之白璧柳氏司工聖人執役宿類雲消瑕癘霧闢剔晶肌漸磨靈液日月研銳堅頑變易既比絮於方員亦重裁於寸尺光瑩委粟之英靈護浮筠之魄取諸於其類固以堅而攻瑕染其所自牛爰因損而得益於其用配球圖無處坎軻聖昭質之晶瑩燭祥光之燦瑳區形於瑋璧瓊瑣增輝於辭灤泉火阻琮璧羨待用之無遺朝饗裸將亦何施而不可此日瑛盤燿碧詎不琢而不雕當年石氣含青即生我爲成我蓋其蘊蓄玉英胚胎石髓質雖異夫精蠱形特分於表裏藉彼堅貞俾無枯砦譬升金之在鎔異蚌胎之出水比之自內識椎鑿之可加美在其中悟精華之有以惟石也既選地而能良惟玉也乃成章而通理爲模爲範詎苔莖而岑同相應相求爰釋回而增

美酒有圭璋象德砥礪爲衷存理同於瑾握過欲比諸堅攻緬玉音兮在谷思玉
樹兮臨風莫不借資人巧用極天工固玉成之愛我同樂石之治躬君子不去諸
身匪外觀之焜燿天下皆知其賞鑒內美之昭融此則質抱真純品超塵俗同境
瑒以騰輝豈瓊珉之可辱材擬席上之珍人號豐年之玉

聖天子道輦金甌時調玉燭璣璇在懸玕玠來屬豈直鹿臺龍首長昭川嶽之光
佇看延喜昭華永繼

陶姚之籙

綱舉網疏賦

以去弊拯民必存簡恕爲韻

昔晉劉頌之陳政也理握綱維治賅細鉅惟張弛之咸宜措黎元於得所有舉此
加彼之要固惟一而惟精存疏節闔目之心亦不遺而不禦如裘挈領旣扼要以
不煩若網在綱更推行之有序此所以俗美化成風清弊去也蓋政之有綱也天
地爲經倫常爲繫仁義總其敷施禮樂分其調劑操政刑之樞機準剛柔以宰制

賦

既維繫乎正甲亦包舉乎微細有其舉之莫敢廢將一視而同仁得其主焉以有常可萬世而無弊至於法令之繁幾與網等雷電勅而昭昭象魏懸而炯炯重申以命惟三章之法可師令甲嚴頒豈一日之羅可並亦以見庶政之必修而念羣黎之是拯然而弛於綱者治多雜密於網者政未純務審量乎輕重乃敷布之平均張乃四維凜綱常於永久開夫三面覺網羅之徒陳握要以圖理不煩乎刻覈居中以馭化每決夫臣民夫惟混彼貳三昭其畫一括庶績以凝熙極單心之寧壹乾綱坤維身度聲律執左契以成功任前禽之是失凡布政以優優皆大猷之秩秩鑿治絲之誦覺結網之已非求更化之方悟臨淵之不必遂乃令行流水澤若泉源調喜怒而成過孚勸威於不言法繩其束縛令戒其紛繁將見羅雀庭閑吏爭崇其雅操何曾吞舟網漏人自踰其短垣蓋恢恢乎雖疏而不漏惟憂憂乎政舉而人存誠以握萬化之原合兩儀之撰惟慎憲以成書若昆吾之銘版既允釐於人官亦昭蘇於物產極宏綱之畢舉道在執中豈小物之克勤教以行簡於寺文肅青漁心雁朽馭治具聿張周法不御除苛解繞陋學畫之多端放準循繩

仰經綸之懋著拔西河之寒雅擅賢聲投東海之竿功成王助聖天子德洽飛鴻
恩霑黎庶聯天埋物羣欣

邛治之光昭錫極誠民共沐

皇情之仁恕

摺疊扇賦

以金石絲竹匏土草木爲韻

赤日卓午炎精鑠金歛蒸熅燿潏沈沈疊雪六銖之服薰風一曲之琴時則人
揮素筵地迴青林輕盈入手瀟灑當襟巧製新奇半幅清涼之趣形成舒卷幾經
慘澹之心攷摺疊之攸稱璧嘉名之自昔當趙宋而流傳出朝鮮之荒僻玉幹初
裁彩箋乍擘割鳳尾而縈青箴魚網而漾白敷素練兮重重排綠筠兮窄窄可人
雅製相逢泉竹之林惡我清冷坐對松風之石成偶成奇或合或離或如積算或
如半規或雲卷兮乍斂或霞撒兮乍歛或香檀兮掩韻或文竹兮參差或擊如樹
羽或卷若韜旗或望留仙之綉或聽響屐之移或如玳押春閒挂湘紋之縷縷或

筠 心 堂 文 集

似蒲帆風滿牽錦纜以絲絲八素挽而玲瓏冷然香也曳生綃之旖旎風以動之
皎潔齊紈紛紛披筵竹勢揜圓輪形成轉轂既半展以成圭亦全開而運軸仲祖之
畫堪施逸少之書可讀航頭夜雪之圖隴首秋雲之牘林風澗水儼翠疊而濃稠
霧靄煙迷乍迴環而往復展碧闌之曲曲爽借秋光搖素彩之層層涼生夏屋遂
乃寒盟恥訂雅客論交有奉揚之惠無襤織之嘲與篔簹紋而共展聽篋韻之初敲
雞鶴翎而輕拂伴塵尾而斜捎予取予攜善藏斯便奮雨今雨夙約寧拖旣什襲
之堪珍何憂藏笥豈炎涼之頓改竟等懸匏蓋其體方用圓上規下矩秉節操以
自持挺堅貞而永樹陰陽調寒暑之平用舍慎行藏之主張弛而道咸宜屈伸而
時可觀攝尺寸之柄贊和氣於上天導薄暢之機布仁風於下土若夫揮鵠翅以
招涼揜螢光於清夕削六角之壞奇豔九光之珍惜攜來寶月入閒之酷暑全消
引動輕颺座上之煩襟盡釋蒲葵松梢搖曳多姿玉唾銀絲翦裁無迹夸二面以
表繁華或一麾而退兵革詎若繭紙生瑩環鑲碧雅稱提攜義徵翁闢因時制
宜而惟變所適也哉方今寰宇同風

集 文 堂 心 筭

宸居錫福祥生蓬蒲之英瑞紀華平之木開五明而
泰運隆樹九華而景風穆螭頭日麗敷和氣以調元雉尾雲移扇涼風而率育

賦

一七九

訓士錄

刊印告誡

爲刊印示文振興士習事使者通籍詞垣清華列秩經學詞章是其本業然尤以廉隅勵品公正持躬無負

國恩無忝科名爲念茲者恭承

簡命視學陝甘重任叨膺冰兢益切所期拔尤選俊弊絕風清以正人心以厚習俗庶仰副

聖主整飭士風墩崇實學之至意矧關中隴右形勢稱雄連終南太華之高導積石洪河之壯扶輿磅礴鐘毓英賢周漢以來盛傳儒術晉唐而後代有聞人焜耀旂常輝光史冊多士景仰前修涵濡

聖化觀型有自奮起奚難所期篤信古人不欺暗室上以應

朝廷樂育下可使俗尚敦龐此使者所爲夙夜銘心多士所宜勇往思奮者也且

集 文 堂 心 箴

夫爲士必先立品爲學要能讀書不立品則習俗易移不讀書則鄙陋貽誚願立

品以聖賢爲的而必先絕下流之歸讀書以淹貫爲能然必先嚴俗學之戒

絕下流即

聖子之品戒俗學即一貫之學

凡不重倫常不存忠厚習染浮僞干預非爲皆下流之歸也凡不究

經史、誦名文沈溺庸腐剽竊劣皆俗學之弊也知隨波逐流之害而後士行可與知沿譏踵謬之非而後學術可正誠能深恥無品之行則圭璧之檢束必嚴深戒無用之書則金玉之光陰可惜於斯二者持以自重自愛之心加以勿助勿忘之刀天姿雖有高下學力雖判淺深要皆有與年俱進之功斷無學生陷溺之患况平日之學習卽應試之章程真能立品則自無苟且徼倖之爲真能讀書則自無舞弊作奸之習使者披露胸臆鍼砭膏肓申若鐸于徇同木鐸或導以步趨之準或嚴其匪僻之防所有張挂示文皆出勸勉至意茲以詞章繁複剽成編多士尙其畱心觀覽矢志振興儒立頑廉易如指掌超凡入道只在存心勉之慎之毋怠毋忽

訓士子立志

士爲四民之首，士習不飭，則風俗無由振興。然未有趨向不端，而習俗可期不變者。記曰：士先志。孔子所謂志學，志道。不言孟子所謂尚志。韓子云：非聖人之志，不敢存。蓋志之所向，是非異指，邪正歧途，能謹乎此，而後入道有基。隨其天姿之厚薄，學力之淺深，而皆有所得，不然則舍是而從非，趨邪者肯止，不但天姿日就消削，即學力適以助其乖戾之資。夫學以求道，而志向背道，而馳，是猶北轍而南轅，卻行而前人求及，不亦謬乎？士子自束髮受書，即誦聖賢之言，矻矻窮年，讀惟恐其不熟，講惟恐其不明，此何爲者？耶？誠將以聖賢之言，求聖賢之心，信之必真，體之必力，定乎此，則庶幾聖賢之路耳。

中訓只數句，已盡人德大旨。○孟子則揚墨告子，以其充塞仁義也。韓子則佛老，以唐世君公士，皆崇釋教，不復知有聖賢之道也。凡普人化世之作，皆對症用藥，起廢疾，鍼百病，非徒才雄文也。近世不惟無揚墨之害，亦并無佛老之學，只有八股科第富貴利達一條繩索，永爲禁錮而已。茲調推剛聖道，使人立志以聖賢的所謂，固狂瀾挽頹風，其功不在韓子下者，十室之邑，有忠信百人之中，有俊傑，蓋必有見道入道之士，奮然而興者矣。且夫聖賢所言千頭萬緒，要其大指，無非教人爲人之理，其大者，則君臣父

篤 心 堂 文 集

子兄弟朋友之道其小者則日用動靜事爲行習之宜吾旣已於此誦習焉則倫常之間必求所謂孝弟忠信者而服習之作爲之際必求所謂仁義中正者而踐履誠以聖賢教人之理如是而所以爲人之理本如是也今有人於此勉之以聖賢則駭然曰此非所及也然謂其不能聖賢而直目之以狂蕩凶悖之名則未有不怫然怒者此即蓋惡是非之心人皆有之發明先生所謂便是良知不假外求也便於此能擴而充之則聖賢不難至矣非然皆自棄者也殊不知此志不立卽是自絕於聖賢而日趨於狂蕩凶悖之域蓋順逆之勢殊而向背之志異也是故士子誠志乎聖賢聖賢言孝吾未卽能孝然必先戒忤逆亢戾之爲言弟吾未卽能弟然必先凜厲牆詬誅之禍以至言仁則必先絕殘忍刻薄之端言義則必先嚴苟且妄爲之漸夫不能孝弟仁義而必先勿犯夫不孝不弟不仁不義之事此志卽聖賢之徒而可以漸求進益者矣偷終日讀書漫無提醒警省之志雖手披萬卷下筆千言無論其背聖非經不知別擇卽四書五經正大之言徒以科場題目冀取功名必當溫習嗟乎以千古聖賢諄諄告誡開導來學之菁衷而特爲科場題目而讀之其視聖賢所言與我奚涉無惑乎估學習之身心違之口誦

詩書躬履汗穢求一言之體驗而不可得今之學者要皆以四書五經爲科場題
目之故而後讀不然不難高閣束之矣

明道先生年十五慨然以斯道爲己在陽明先生年十五聞其父與師讀書何爲客云取科第也陽明先生曰

讀書止此耶父師乃大惑近世人材不如古者于無志然登高者不呼士亦不知大抵儒更有
爲聖爲賢一項事只好以四書爲題目之書非我所可學也茲訓詳勉懇到入道形爲簡捷

此書如

此他書可知名士如此中材可知言及此有不顏顏汗下者乎夫豈非志之不立
以致此乎非但此也志向既乖習俗更謬嘗有談及正道稱述聖賢者則衆論譁
然羣以道學之名迂腐之日非之笑之指且遠之若視爲渙我累我而極力屏之
別毛髮扶肺肝痛發流俗惡忌保之習閉邪稱正之功爲不小矣父兄先生以斯爲教子弟朋徒以斯爲學此不但

以聖賢爲可法直若以聖賢爲畏塗風俗人心江河日下勢將率學者去聖賢而
趨於狂蕩凶悖而未有底也豈不惜哉豈不惜或茲使者奉

命爲多士誦自顧所學於道未深然趨向之閒嘗以義理痛自刻責汝多士驥首
章縫廁身庠序生文武周公之地手孔孟顏曾之編其務翻然改圖矢志正學
陽明先生云夫過者自大實所不免然不容其卒爲大賢者爲其能改也但能一旦脫然洗滌舊染雖昔爲寇盜今日不害爲君子矣况身列士林克念作聖人亦何憚而不改哉正學之志力

行爲先家庭之開孝順親愛族黨之際和睦悖厚師友交接之道尊信謙遜由是勵廉隅崇禮讓嚴非僻謹步趨出之地和氣盎然名教之中真多樂地以此薰善良於鄉里播休譽於

朝廷固聖賢之所許而登崇之所必及以斯爲志不亦美乎若猶以爲吾雖誦聖賢之書實不必志聖賢之志則自家門里黨以及待人處事皆將反其道而用之暴戾不戒廉讓不修放蕩不檢以至於縱恣妄爲干名犯義貪得唆訟武斷把持種種劣蹟無所不至自罹憲網辱及先人所謂不爲聖賢而甘居狂蕩凶悖者趨向一乖人禽永判

讀聖賢書而不辨人禽之別怪哉

使者教訓不行孤負

聖恩羞對士類言之悚然多士尙其審是非辨邪正無負國家崇尙斯文之意與儒者自愛自重之心是所厚望也夫

訓飭學業

讀書之道高明者以悟入沈潛者以學成聰敏者漁獵百家魯鈍者支吾數卷資

質不同習業亦異然爲學之道總求有益於身心有裨於實用爲本是故博而不失之蕪雜約而不病於庸陋則所讀之書湏先與講明切究便習業既正流弊不生是可得而詳言焉士子自童蒙就傅先授以四子書次諸經次序自屬不紊然各書非可以約畧盡也有宋程朱諸子於聖賢之義理身體力行口講指畫實能發經書之蘊以詔來茲承學之士必先求之宋儒傳注使大義顯明然後知聖賢之指歸皆切於日用踐履之實而非徒託空言若夫經書中名物象數制度典章則漢唐諸儒如馬鄭賈孔之學去古未遠家法師承源流有自更湏考證參稽庶不致空疎無據斯二者非宋儒之不精考據而漢唐之學之不曉大義也

通儒大公之論如是

如道本一貫而學各有長參觀而取焉庶幾不偏耳今學者習誦四書之後或肄業一二經畧窺高頭講章便肆力於浮濫庸劣之時文口沫手抵窮年矻矻貪常嗜瑣孤陋寡聞直以爲學問之真傳科名之左券而間有一二矯其弊者則或專崇漢唐譏詆宋代剽竊古義自詡新奇偏旁點畫之間異文詭字之說力求隱怪

篤 心 堂 文 集

厭棄中庸往往經書中大義恆言或叩之而先昧

此風爲害亦鉅世間多少才人名士大抵玩物而不求道者皆坐此弊

二者空虛而鄰於固陋駁雜而徒競艱深守約者等諸執管窺天務博者歸於玩物喪志齊楚俱失厥弊維鈞豈所語夫有益身心有神實用者乎今試觀宋儒之書如朱子之集注章句或問語類二程子之傳注遺書張子周子之二銘通書等書大半解經之說然皆闡發性命之旨喫緊爲人之要學者雖不能遍觀盡識然就中得其一二書切實體驗窮究指趣庶義理浹洽涵泳從容立身行己之閒真可立懦廉頑奮然興起至漢唐之學則十三經注疏具在注疏之學以鄭氏爲最著尤以毛詩三禮爲最精高材者固可盡覽其全即中下天資亦可於或詩或禮中以數年之力究其一經此經既熟自無難旁推交通以及其餘至

御纂四經

欽定三禮折衷諸儒至精至當尤宜服膺研究以定所宗如此則經書既得其要然後考之史鑑以究歷代得失之理旁及子集古文大家以極前人議論之歸要之以精勤加之以虛心毋囿於習俗毋驚於詭奇毋急遽而雜陳毋作輟以中廢

立定課程積之歲月隨其資質之敏鈍而得尺得寸皆有所成以此養其德行有陶淑變化之資發爲文章多深厚爾雅之作出而有爲有守不愧通儒處亦可法可傳無慙名教庶幾本末具舉體用兼該所謂有益於身心有裨於實用者如此使者學力疎畧於道未深然以三十載游歷南北所聞師友之緒論而參酌其中竊謂入德之門與科舉之學雖似相妨實無相背者庶幾在此朱子云科舉何嘗累人自負科舉陽明先生多士以有用之居諸富強之云志立得時千軍萬馬只是一學讀書作文安能累人人自累於得失耳學者果能不爲得失所動雖日習舉業亦與聖學不相妨年力往往以正學爲迂塗奉時文爲活計究之窮通有命特立在人必至於皓首庸流終身汨沒而後悔辨之不早不已晚乎尙各勉繹斯言力崇學業毋忽

釐正文體

文章之消推輪於諸經濫觴於左國年代緜邈體製攸判乃有古文時文之分古
文自經傳史漢魏晉以逮唐宋體凡數變時文自有明化治嘉隆天崇以逮國朝

文 堂 心 籍

體亦數變顧其變者體以代殊其不變者理無二致也故古文與時文異流而同源今之時文與有明及

國初之時文更循塗而合轍故不治古文則時文不能精不治有明及國初之時文則時文尤不能稱所謂取法乎上僅得其中在能自得師毋固習俗而已國

家損益前代首重經義取士伏讀

世宗憲皇帝曉諭考官拔取之文務令清真雅正此千古文章之樞紐也嘗敬繹之蓋文以義理爲要不清則蒙翳不真則龐雜理義何由而明文以體裁爲宗不雅則俚俗不正則險怪體裁何由而立故必洗伐榛蕪除去煩濫使意度之閒水淨沙明乃可言清深究理旨體會題神使證發之際切實諦當乃可言真鎔鑄經傳醞釀深醇自無淺陋粗鄙之說則雅之謂也宗法先民趨步繩尺自無踈馳詭譎之患則正之謂也今學者於此四者童而聞之率皆不求甚解至所爲文則一

切相

反何也今日誦習腐陳濫惡之文不拘何題輒搥詞句蒙頭蓋面滿紙語言無性靈則何足以言清捕風掠影似是實非如題言性率用於穆太虛題言

誠率用元亨誠之通利貞誠之復題言學即泛填精一執中題言治即鋪敘三謨二典不按實理不求的當影響含糊隔壁聽話何足以言真至於不知雅俗之別不但詞意俚淺言論庸俗即沿用陋套如鄭重分明躊躇四顧以及靜按重按虛擬實究吾思之吾重思之之類均不知避不知詭正之殊則橫驅別騫截題強串串題強截分題強合合題強分另立宗旨橫生枝節武斷翻案全無發明或又沿襲王允優孟章李以及剽竊奇書詭說埒摶古文異字施之經義均屬疵類以求佳文猶斷港絕潢欲望至海島可得乎今必先去諸弊然後加之以理法詞氣文以說理故理須明理得而法生焉故法以輔理詞不備不可爲文則宗經據傳佩實含華矣闡理行法運詞必資乎氣則氣不可不講矣其所誦習則

欽定四書文去取謹嚴批抉精當可爲圭臬餘則王已四八集程墨所見及何義門汪武曹諸家評選慎擇百十篇不可不精熟不可太貪多以便肆力於經史古文俾增長見識涵濡義理推拓議論波瀾一切惡劣時文嚴行屏絕或參閱時墨必以先正佳文爲的立定主見以爲棄取斷不可隨波逐流如此用於清真雅

筠 心 堂 文 集

正之義庶有合乎至試帖詩則導源唐律而參觀

國朝館閣之作總以平正工雅格律渾成爲宗若俳纖瑣晦滯雜沓即非雅音律賦則材取文選格本唐賢館閣之篇亦須別擇與試詩同此皆應試之藝至於研究古文旁及駢儷並詩古詞章皆有門徑多士未遑徧學故不及詳若夫文者道之著言者心之聲必須敦品積學涵養性情其文乃有光輝篤實之能優柔平中之旨則即文可以規行有德乃能有言此尤爲學之本原立身之要務多士矢志進修不甘卑下則使者稱引皆平實中正之論幸其畱心觀覽擇所宗焉

運河北行記

余生長大瀛以南既壯由楚南北走京師又北遊永平盧龍眺山海關嗣奉使入巴蜀西至酒泉張掖歷青海西北至寧夏榆林北地上郡邈年宦跡經江南海門東至會稽舟車數萬里凡江淮河漢皆屢涉顧獨未嘗經運河運河者元都燕轉東南漕始治此河明及

國朝皆加疏濬爲轉輸利其道由江南之清河縣入運口至通州凡爲程二千七百里有寄爲站二十有二爲閘七十有二其受水者爲黃河爲洪澤湖爲微山湖爲濟爲汶又北受衛河由津門入海漕利大患亦鉅余所記者行旅耳行旅之利與患耳水道淺隘無波濤潮汐之險一利也所經江南山東直隸驛閘有官有役自漕督總兵道府州縣文武員弁相屬於道無宵夜之警二利也程與陸遠近等而行李僮僕裝運比輿馬廉而便三利也乘坐安逸雖風餐水宿而無車馬顛蹶胥征農起之勞四利也閘蓄水濟運非時不啓易致守候一患也或值重運或遇

回空首尾相銜縲索相亘千夫邪許萬斛壘雲桅風檣壞涯塞涖勢險而難避地隘而難容二患也連丁水手每多橫強闌口吏胥或多訛索三患也水或大或竭或凍或溢苟非其時必形阻滯四患也爲利爲患行者自酌焉余癸巳秋由浙臬蒙

恩內召始經行此與舟子約廿日至通竟未逾期然旦夕兼行又船名蘆蓬小而輕詢之則曰昔年閩貢荔支用此船也

聖人在上屏却珍異此船棄置河干等諸無用而余得以濟吾行豈獨余之幸哉并記之以告行者

七月十四日至淮安府拜周聽松太守齋費州人淮安頻年被水所轄鹽城阜寧桃源山陽皆有水患太守率屬撫馭得宜辛卯年余任常鎮道奉

命總司江北振撫事宜數至其屬與太守共事知其能拜山陽縣張用熙桐城人與光栗園徐詠之二同年皆有戚誼余前年查賑至桃源張君時權縣事拜毛小秋年姪在秋伯同年寓館時秋伯北上門巷蕭然破琴舊冊皆屋漏痕也小秋留

余飯余辭歸舟開行至淮關監督慶公琛向水來往遣人投一刺而過即晚抵清河漏再下矣

十五日拜河庫道李春曉同年湘菴水遇拜河帥張芥航先生時乞病欲往揚州及游杭尚未行談次王香湖觀察青蓮來會河帥留飯余辭隨拜淮海道文三兄麟淮揚道王耕雪貽象裏河廳王廷彥署清河縣陳俱不遇歸舟飯後李春曉來王廷彥來張河帥來前揚糧廳孫國壽來同里河員顏爾懋來俱晤即日舟行過清江關水甚溜抵張家馬頭離黃河岸甚邇

十六日早陰風微雨肩輿登河岸呼舟渡黃至楊家莊換蘆篷船時眷屬舟亦俱至

十七日由楊家莊安頓眷口各船畢單舟先行北風細雨舟子登岸牽挽甚苦晚至衆輿集計程七十里距桃源縣十餘里

十八日北風微雨水泛漲牽迫亦漫舟行田地中時復阻淺舟子通宵行

十九日晴霽未刻至宿遷縣計程白二十八里縣有關淮崗分查處過關連宵行

二十日未刻至岳灣口計八十里此處店市人煙頗衆有水通鄰城縣舟過宿灣
通宵行

二十一日早過王母山有引河水沖出色混勢溜過梁王城關此入關之始自此
關至南旺上關計廿二關均上水晚至臺兒莊過關地爲水陸馬頭人家頗衆

二十二日巳刻至韓莊關臺兒莊至此計程八十五里中歷八關侯選頓莊丁廟
萬年梁橋新關石關此間有微山湖周百八十里湖水澄碧可愛此日遇漕帥貴
雲西師過船謁見留談竟日時廖儀卿同年爲江西糧儲道督運至此握晤雲西
師舟中晚飯畢余歸舟漏初下催促開行此日離彭家莊三里許有十字河沙泥
淤淺江廣後幫漕船重每以爲患湏蓄水浮送故關不能啓

二十三日早待放關開廖儀卿船不遠坐已船訪之晤面見其姪三齡及其新舉
子纔七月貌甚佳也詢其近作以所辦糧儲詳稟各稿相示皆手著也儀卿達治
體處舉事精細詳稟雖專主漕務而恤丁除弊體國愛民之心溢於言表閱未
竟榜人促開關行矣既過關風色甚順蒲帆高挂兩岸欲飛自楊莊啓行以後無

此也未至南陽關之數十里運河右左夾以大湖望與天際湖隄豐茸灌莽紫花
彌望芳草湖邊荷正作花亭亭可愛湖之東北長山崔嵬緣亘千里氣勢雄拔
中有地勢至湖邊作虎形頭戴石磊磊以形家言考之當吉隔湖不能諦觀也此
地詢爲魚臺縣所轄其湖長歷千百里多淤淺處水草豐茂一望青蔥余意能用
溝洫灌蓄之法擇其低窪溶爲巨澤水有所歸則平土多膏壤大約高者培以爲
隄低者疏而爲川因勢利導當易爲力方今生齒日繁地利且盡必須悉心講求
以資民食不然概以爲沮洳無用而棄之然則天下豈有自成之田畝歟

二十四日至濟寧州有太白樓望之神往惜未登也東南門皆有闌城小而人煙
輻輳貨物雜沓爲水陸衝東河帥吳霽峯前謹署在此時防汛公出留寄一信拜
晤敬觀察文前在浙爲嘉興守初擢運河道也又拜州牧王公鎮未晤遂訪州倅
同里丁瑤泉宗洛余舊好也其署在州署左旁紆折而入窮巷蕭條至大門榜聯
云吏民莫作長官看法律要與詩書通瑤泉筆也登堂至客舍荒落殊甚舊書滿
額案法帖文墨狼籍而已瑤泉舊袍古帽出握手敘十年別官甚苦然瑤泉意頗

筠 心 堂 文 集

適余謂君未仕時能肩背衣物步行數百里入都常自言日可數錢度其刻苦乃爾何官不可做耶余又曰古人抱關擊柝多吏隱其與高位速誘者奚若乎然余尤爲瑤泉論其署榜曰分州余曰此分知一州事實同知一州事然則州之吏治民情瑤泉豈能以不事事相諉等語抱關擊柝之稱職甚易乎瑤泉領余言余留信屬瑤泉候眷舟薄暮歸舟通宵行尙有閘且糧艘壅滯甚難行耳

二十五日過分水龍王廟此汶水分其七分南行三分北行自此至天津皆順水矣廟有額曰左右逢源不署名旁爲禹王廟想土人建者此日過閘後北風大作雨亦甚舟子終宵鼾睡耳

二十六日晨起晴霽然北風極猛下水槽不能搖仍與糧艘爭縴舟子終日聒聒耳此日發漕帥費雲西師一信附浙江英尙衣緘又桂杏農一緘內有理安訪夢圖記又高淳亭胡途農二郡守緘均由英尙衣轉致本日寫記並各信發時未刻矣臂痛作苦久搦管所致

二十七日晴霽船下水頗疾櫓聲作雁鳴日不去耳黎明過張秋鎮夜行六十餘

里耳已刻過阿城上下闌此處泊大船載糧鹽甚衆午刻過東昌府城樓翼然人居稠密河環城東地畝夷曠暮過清陽闌水溜甚船略撞牽不損夜行六十里達曉至臨清州

二十八日在清臨過關臨清有闌蓄水待糧艘不肯開亦不强也舟子量水水過闌板四尺余舟受水二尺餘因去闌上橋放舟由板上度如人步越圓矣闌外水低尺餘舟頗震動亦無妨也不二里有板闌與前闌同必俟糧艘過前闌入此塘中乃啓舟子欲用前法然量水闌外低至二三尺險不能度守候至次日乃行

二十九日舟順水而北風不利行百二十里至武城縣瀉再下矣聞有紇歌臺夜不能見晚仍行達曉至鄭家口初見朝曠

三十日早由鄭家口啓行未刻抵故城縣計七十里仍行三十里至四女祠申刻未歇也此日遇回空糧艘頗多晚發大北風旋即平仍暮行過德州聞前路閒有宵警乃止

八月初一日早由德州開行晚抵東光縣爲羅茗香寄信巡船并不泊舟達曉

抵戚家堰

初二日早遇顏魯輿方伯扶尊人惺甫先生樞南來過船哭之唁魯輿談半响而別歸舟開行午刻過博河驛晚至興濟仍夜行過流河驛晨抵雙塘此日夜甚得順風

初二日已刻過靜海縣晚泊天津此日風逆而微舟子併力搖櫓故能至

按天津有七十二沽水東歸海向聞可與水田之利惜未周歷細觀大約此間爲水歸宿下流沮洳卑濕兼恐潮汐斥鹵之害欲興水利必去水害非築隄防水疏溝殺水不能經費已難而大水潰防溝洫不能消納終難免害此在小民手足勤動與水爭咫尺地旱則收潦則廢如欲圖長久非大加籌畫得人經理殊未易言前年有津門人餽余稻米潔白如玉炊之其香滿室所謂香稻也詢之稱此地所產因與講求欲募南氓來耕然欲籌有利而無害殊無善策頃過吳門林少穆中丞談次慷慨至有欲棄蘇撫而就天津郡守之言叩之則曰將欲行水利於畿輔可以減東南之漕持論甚大所難得實心實力設法興行爲諸郡創耳昔程月川

中丞被

命以少司空出辦畿輔水利當時蔣礪堂相國爲直督相與商榷竟無所成少穆云月川所辦是去水害非興水利前顏魯輿方伯亦曰月川所辦未善余以爲果能去水害則利即易興但恐所謂去水害亦終子虛耳非常之事必得非常之人及臻厥成天下晏如安得有其人而專任且久以冀有效乎

余自七月十七日楊莊開行八月初三日晚至天津計十七日其中臨清候放閘一晝夜龍王廟守風一夜彭家莊待放閘一夜共延一日三夜如無阻滯止十五日可至矣由津門至通北河水淺兼重運回空往還相屬不絕尤難暢行余於初四日早登陸抵都止二日耳初六日入都城并記

公牘偶存

安撫資送災民勿令遠涉苗疆滋事議

竊惟禁流徙者莫要乎撫綏靖邊固者必先乎治內楚北襟江帶湖頻罹水患被災窮民謀生乏策以致紛紛外出或投奔各省或混入苗疆均所不免本司等悉心籌議安撫禁止之策謹陳管見備採擇焉其一曰留養災民安土重遷民有恒性苟非習慣游蕩何忍輕去其鄉惟災歉頻仍田廬荒蕪不得已輾轉流散背井離鄉此時苟給以饘粥之資救其須臾之命豈願間關跋涉覓食嗟來是故留養爲要應請於災區左近州縣查災民之出境者儘先收養其井疆接壤鄉音易辨名姓易知稽查不難詳悉酌定大縣以收養四五百人爲率中小縣以次遞減或名數尙多即資送鄰縣以次收養數亦如之不許其徑行遠去地方官責成里保登記名口或擇廟宇或蓋廠棚令堪棲止每大口日給錢二三十文小口半之老弱者給予強壯者責令傭作病施醫藥殁給棺具由官籌費仍不時稽查彈壓別

男女戒爭鬥嚴盜賊務期安靜毋令奸宄潛跡滋生事端如此則災困之餘幸有更生之樂離鄉未遠時懷歸復之思民人必無捨此他適之理蓋留養災民則未去者不致外出矣其二曰資歸流民凡災民之已經遠出者或備作度日或貿易營生甚則流寓爲家例所弗禁惟成羣結隊曠日經時既無本業可圖即屬游手無賴請飭地方官查明各流民原籍何所姓氏里居一一登明酌給路資並予牌票沿途通知一體遞給送歸故里明諭以田里涸復亟早歸耕且既有留養近鄉何須遠涉如違拗者責懲遞解到籍收管如此資歸流民則已出者皆可還矣其三曰查禁姦民凡撫災民宜寬治災民宜嚴本災民而雜入姦民者約束不難實姦民而冒爲災民者究懲亦易蓋災民景象必菜色藍縷俸存殘喘餘生若姦民則詭譎情形即令多方裝點亦難掩飾且必懷挾貨財布置羣與其行徑與災民迥別故其小者混入苗疆租占盤剝其甚者煽惑苗衆潛爲漢姦應請於湖南貴州苗疆毗連關隘之處嚴行查察並咨明各省督撫責成苗疆印委各員認真稽考分別辦理其僅於租種圖利尙無惡跡者再酌分久近新到苗疆者立飭遣歸

勿許逗留如居止已久者勒以年限令其變產回籍至煽惑漢奸即當嚴拿盡法究辦若其初將混入苗界者應仿照西北兩口外永不許內地人民擅行偷越綠邊防要地與內地各省聽民人移徙實遷者不同即防察過嚴不慮滋擾耳如此留養資歸則災民之混入苗疆者已少加以查察防範則姦民之爲害苗疆者亦可漸無恩威兼用庶幾安謐無難矣

飭行各屬札

爲飛飭確查認真辦理事本年三月日奉兩院札楚北江漢兩水因近年大汛長速消遲以致底墊日高隄形低矮轉飭各府州縣細將各屬境內隄塍里數丈尺險易段落若何宣洩若何脩防務將地勢情形悉心講求星馳通稟核辦本司自履任以來夙夜焦勞寢食欲廢每與各屬暨諸紳士晤談旁諮博採求於地方稍有拯濟現楚北情形沈痾迭告死亡流徙觸目愴懷 國賦屢懸民命何賴當此辛苦墊隘之時上費

宸厓下闕民瘼吾輩服官斯土敢不思艱圖易竭智殫心卽不能爲一勞永逸之謀亦必當圖盡人聽天之道仰各府州縣認真籌畫稟明核辦萬勿因循貽誤大千罪戾此札

籌議留養貧民詳文

爲酌擬留養被水貧民以示體恤而免流離事竊惟救災患者必審權宜禁流亡者必先安撫本年襄河頻漲致潛江天門隄防漫潰民田被淹並沔陽漢川下游各屬間亦淹浸查今春二麥豐收且被患者不過一隅未便奏請撫賑但居民驟遭水患雖據各屬稟報尙無坍塌房屋並經捐給糜餅未致失所等語惟恐閭閻窮民情形不一地方官暫時接濟豈能經久或實有艱苦無告棲止無地之民既堪閔惻且覓食無所勢難禁其四散逃亡復出滋事查前年遠出流民甫經奏奉諭旨嚴飭認真稽查並委員攜資押遞回楚此時又遇偏災儻復再出尤屬不成事體必須酌定截數留養方可禁其紛紛星散本司等悉心籌畫擬於潛天沔漢

四屬受患之區每屬約截留二三千人其餘毗鄰之鍾祥京山荆門監利應城各屬每大縣酌留千百名中小縣酌留數百名以上人數能多更善各擇寬廣廟宇或搭設棚廠並於四鄉市集分設置所以資棲宿除斃力強壯可以謀生者不必收留其餘老弱廢疾男婦均令酌量截留由該府督率州縣汎委武弁各員委派保正丁役詢記姓名籍貫來蹤去跡隨時查點不許逃散滋事每日酌給大口錢三十文小口減半以資糊口至秋後水涸隄墜開工既可仍歸室家並可負土版築以工代賑再酌將老病少稚不能力作者仍留養過冬至明年春暖遣歸如此則被水貧民既有棲止之所養贍之資必不至輕去故鄉離居蕩析儻有藉詞漁利之災頭復敢引誘煽惑即當嚴行懲辦其出境之關隘要路亦即特派委員實力查禁勿令潛逃至此項留養經費前於災民過境曾經詳明由各屬捐廉勸輸並院司道府扣養廉一成發領辦理在案此次應請先籌發經費每屬若干即委幫辦委員先行解往給領濟用並本屬捐廉勸輸外其有不敷仍將院司道府所扣養廉一成酌爲分給俾辦理益臻寬裕不致徒託空言至此外或有被旱歉收

乏食貧民俟再飭各屬察看情形酌量照辦庶民沾實惠地方可期又安鄰封亦免滋擾矣

留養章程

一災歉地方貧民其強壯尚能力作無庸留養惟有老弱男女饑餓菜色者每大口日給錢三十文小口減半每日點名散給先由本縣設局取留約一二千名如人數過多酌爲資送本省鄰縣大縣酌留千名小縣七八百名以上人數能多更善此救患之方恤鄰之誼均不得推諉膜視

一留養之地各就城外寬廣廟宇分起安置或擇曠地搭蓋棚廠俾資棲止再於四鄉中酌市集處所責成汛員並選擇公正紳士經理各設簿冊登記籍貫姓名其續收者或出去者確查來去踪跡分別註明以便稽查毋令逃散並應查明男女非夫婦親屬不許雜處

一稽查之法派委佐雜各員不時查點印官亦須親自赴查丁役弁兵夜間彈壓

巡邏查察火燭其有聚賭酗酒盜竊等一切不法從重懲辦其或街道村莊乞

討嚴禁惡索滋擾所有委員及武弁兵役薪水酌量捐給

一留養之民或有疾病必須籌備醫藥因病身故者捐給棺木歛埋插標存案如有刁徒藉端妄告嚴行究辦

一留養之民如值水涸修隄或時屆耕作可以貢土傭工可資餬口即查明節令散去各自營生其有老弱疾病者仍酌留過冬候春暖方行遣歸

一留養經費先籌給每屬若干其該管府州縣並量力公捐或勸諭紳商富戶捐輸善舉如不敷由院司道府扣捐一成養廉以資接濟將來州縣及委員辦理妥善詳請記功獎勵辦理不善記過示懲至紳商富戶捐銀三百兩以上者奏請議敘三百兩以下者給與花紅匾額以示鼓勵

飭各屬留養貧民札

札某知悉本年襄河屢漲各境隄潰被淹幸麥秋尙屬豐稔被患僅係一隅未便

奏請賑賑但貧民乏食勢所不免情殊可憐且恐復致流散奪前逃亡遠出男女結伴流蕩經年不法災頭挾以漁利擾及鄰封惡習流傳廉恥道喪職司民牧愧報何堪兼奏奉

諭旨森嚴多方招徠驟難安集此時儻不預爲籌畫不能使有故土之樂豈能治以游蕩之條現計被害之區丁口雖繁除尙可自存及強壯堪任力作之外其老弱廢疾頭連菜色之民尙可數計唯有分別情形設局留養果能認真經理儘可實惠窮黎本司業經詳院奉批迅速查辦現即預爲籌欸先發該州縣銀若干兩委員解往即飭幫同辦理合亟札飭札到該州縣試捫心自省上之既不能感召祥和消弭災患次之復不能宣防保障捍衛民生下之若並不能救患扶傷稍蘇喘息爲民父母將何以仰酬

聖主俯對寸衷務各激發天良細酌現發章程悉心經理勿託空言無不被澤之一夫博濟雖聖人猶病乍兒入井之孺子惻隱則凡人有心本司覬覦官謗砥切兢惶該牧令蓄目民艱毋辭勞瘁聆茲苦口勉矢單心此札

浙江飭正民風札

札某知悉查錢塘江一帶向有江山名堂等船攬載商民往往匪頓婦女冒爲家屬豔妝誘客彈唱賭博酗酒洋烟其他匪類局誘騙詐無所不至商民受其蠱惑喪費累身若不嚴禁何以整風化而正人心歷經札飭查禁並令各具各船地保不敢隱容切結按月呈送迄今未據詳報該縣境內有無此弊亦未據申復畢竟各縣以爲不能查禁抑以爲不必查禁耶如其不能是各縣令不行禁不止此事乃爾他事可知若以爲不必則是各縣之視民心風俗竟若無闕吏治而置之不問矣夫果勢有不能或意存不必卽令按月取結詳報不過徒費楮墨既無實事何取虛文無惑乎各縣之漠然也本司以爲既任民牧教化爲先聽民爲非何用長吏苟以爲不能是溺職也竟以爲不必尤諍論也本司意不在催取結報而

亟欲知各令之命意與其所行也不然或該縣所轄民俗盡醇頓改舊習無從結報此循吏之效本司夙夜懸企即亟一言相慰該府廳一體飭催無忽

上 閩 浙 總 督

本月十三日經歷丁溥解到已革外委張名彪等十名到司當卽委杭州府高守督同龍游令周榮縣丞徐起渭等聽候審訊嗣撫憲行知憲臺咨文並該犯等初供飭交本司訊擬詳辦竊意刻扣爲營弁習弊而外委之挺身稟許詎詐顯然該營長受其挾制本非無因至冀守但知外委狡猾之可忿而不自知其藉公道以逞奸者衆怒難犯耳常鎮會勘緝私委員未免膠執不思未協輿情曷期有濟本司前已札致常鎮王道現與藩司會致宋運司囑其順道親勘情形或較妥協崇明洋案現派劉守前赴會審麗水案提犯未至訟棍聞風恐難驟獲教案陸續踵至所患人數過多難免波累現在審訊難以傳徒經卷勅章圖記等分別首從但

浙省崇信釋氏誦經茹素不可枚舉幸風氣柔弱故自前明流傳至今從未聞滋
事與他省邪教不同將來辦理尤所酌奪以昭平允運司庫支斷以帥前院初定
額冊爲準業已核計無浮總冊分冊候卽繕造呈覽緣交代期近運署支放塘工
河工及京餉諸事紛集又臬署讞案頗繁致難迅速謹附以聞

集 文 堂 心 筍

公 願 備 存

212100



海南書局

各

種

碑

帖

漢碑錄
右軍父子四人法帖
何掾夏行書摹迹
何子貞臨張遷碑
何子貞書石門頌鐘器碑
刻石庵精書摹迹
譚祖安先生書臨始僊撰肥
唐拓夫子廟堂碑
翁覃溪藏公同堂銘
宋揭越湖楷字帖十一種
朱文公倫語集註草稿異跋
南唐李後主真蹟
宋捐龍山寺碑
宋拓多寶塔碑
南海書局藏忽六十詩稿
翁覃溪手札墨寶
魏高貞碑
魏司馬景和夫妻墓誌

一元八角
一元八角
二角五色
五角
六角
三角
二元四角
一角五色
一元八角
四元二角
三元
二元
五元二角
六角
一元二角

吳清卿書說之解述首
錢南園楷書墨蹟
何掾夏書寶觀察嘉書銘
周孟鼎銘
魏敬使君碑
趙松雪黃庭經真蹟
東坡春帖子詞墨寶
孫過庭書譜序墨蹟
錢南園爭座位
鐘鼎楷篆大觀
近代碑大觀
近代碑大觀續集
漢碑大觀
金石索
刻行書墨蹟

二角
二角
二角
五角
六角
八角
一元六角
四元六角
四元
十元
八元
八元
八元
十元六角
十元六角
六元
三元
十元

